

SAMU NA YINKI BETO

KELE DENOMINATION VE?



Ya kele mbote mingi na kuvutuka diaka awa na chaire, keba ve na manima, mu banza, keba ve bangonda tatu mu me vwanda ve. Bampadi me kuzwa ntangu mosi ya mpasi mingi, mutindu mosi na munu. Oh, kasi, ya ke na kusala mbote, ntangu yayi, mpe beno ke na nsatu ya kulutila mingi ya kuvutuka diaka na kisalu. Mpe mu zola ntangu yayi kubanda sabala yina ke na kwisa, na nkokila ya Kilumbu ya tatu yina ke na kwisa, kubanda balukutakanu ya reveil kaka awa na tabernacle. Mpe kana Nzambi zola, mu me kuzwa mutindu. . . Mfumu me sila munu mutindu ya kisalu ya luswaswanu mpe malu-malu. Mpe kana Yandi tala yawu mbote, mu zola kubanda mutindu ya balukutakanu ya malu-malu yango—yango na sabala yayi ke na kwisa, awa na tabernacle, mutindu kisika ya ntete.

² Mpe na manima, mu ke na balukutakanu ve yina mu me kubika, kasi kaka ya Australie mpe ya Nouvelle-Zelande, na Ngonda ya ntete yina ke na kwisa. Mpe dyaka ya kele na Mpangi ya bakala Osborn yina vwandaka zola ti beto sala lukutakanu mosi kintwadi na kutala mu silaka yandi yawu awa mwa bilumbu me luta, na Tulsa, kasi yina ke salama na mwa bilumbu yina ke na kwisa, kasi beto me kubika yawu ntete mbote ve.

³ Kieleka ya me vwanda mbote, Mpangi Jeffreys, na kupesa nge mbote na manima awa, mpe diaka kuwa mwana ya nge ya bakala kuyimba nkunga yina, mpe nge kubula yawu. Mu zola mutindu yina, tata na mwana. Beno zola yawu ve? “Longa mwana nzila yina yandi fwana landa.” Ya kele kieleka, Tata Guenther, beno—beno zaba ti ya kele kieleka, beno nionso zole zaba yawu. “Longa mwana nzila yina yandi fwana landa, mpe na ntangu yandi ke kuma mbuta yandi ke zimbana yawu ve.” Mpe ya kele kieleka. Na bantangu yankaka yandi lenda katuka na yawu, kasi yandi lenda yambula yawu ve. Beno me mona? Ya ke—ya ke vwanda ntangu nionso na kati yandi. Malongi yayi yandi me kuzwa na bumwana mpe nionso yina ba lenda longa yandi na kusala, kieleka ya ke—ya ke bikala na yandi. Ntangu yayi, yayi kele. . .

⁴ Mu me kutana na Mpangi Jeffreys na nganda kuna, mpe mu vwandaka tuba, “Mpangi Jeffreys. . .” Mu banza ti, beno zaba ti, ntangu nionso mu ke sepelaka na kumona bankundi ya munu nionso bayina ke kwisaka kutala beto, kasi wapi mutindu ya nkokila na kuyamba mpangi-bakala yina me kwisa kutala

beto! Yayi kele kaka nkokila samu na bantu yina ke kwisaka awa na tabernacle, na ntwala ya balukutakanu ya reveil. Yayi kele nkokila mosi. . . Beto zola kubaka nkokila yayi, mpe mbasi na suka, mpe mbasi na nkokila, kaka samu na yina beto ke kwikilaka awa na tabernacle, samu na ku—samu na kutubila diaka yawu diaka. Beto ke na balukwikilu ya mutindu mosi ya yimbi mingi, ya ngitukulu mingi, kasi na mutindu nionso beto ke monaka yawu na kati ya Biblia yayi. Ya kieleka ya kele na kati kuna.

⁵ Mpe ntangu yayi, kana ya lenda vwanda na kati awa mpangi-bakala to mpangi-kento ya nzenza, yina kele ya denomination mosi, to—to yina ke ndimaka beto ve, yina kele awa na nkokila yayi, beto zola beno zaba ti beto me yamba beno. Beno me mona, na mutindu nionso beto me yamba beno. Kasi ntangu yayi mu banza. . . Mpe beto ke zonzila yawu na mutindu mosi ya ngolo mingi. Na yina kana ya vwanda mutindu ti beno lenda ve kundima na yawu, mbote, ntangu yayi, beno sala mutindu mu ke salaka ntangu mu ke kudiaka tarte ya bambuma ya cerise. Mpe na yina mu ke na kudia tarte ya bambuma ya cerise, yina mu zola mingi, yina mu ke salaka ntangu nionso, ntangu mu. . . Na ntangu mu ke na kudia tarte, kana mu tafuna mbuma mosi, mu ke losa tarte ve. Mu—mu ke losa kaka mbuma mpe mu ke landila na kudia tarte. Na yina, to mutindu mosi ntangu beto ke diaka nsusu. Ntangu yayi, beno nionso ke zolaka nsusu, beno me mona. Mpe ntangu beno ke tafuna mukwa, beno ke bika ve kudia, beno ke luta mukwa mpe beno ke landila na kudia nsusu. Mbote, beno sala mutindu yina na nkokila yayi, landila yina mu ke tuba awa, beno. . . ntangu beno ke kuma kisika mosi, beno tuba, “Mbote, mu—mu zaba ve. . . Mu me kwisa tala bawu kaka, na balukutakanu tatu yayi ke na kwisa, ba ke na kulakisa mwa Malongi ya dibuundu. Bawu ke na kutubila diaka yina bawu—yina bawu ke kwikilaka, mpe ke na kuvutukila yawu.”

⁶ Mpe mutindu mosi kaka na kunata muntu na kukwikila na Yawu, ya kele kuzonzila yawu bambala mingi tii yandi ke bakula ti Yayi kele ya kieleka. Ya kele kaka na mutindu yina beno lenda sala ti yawu kukota. Mutindu kaka nkundi ya munu mosi, Tata Wood yina vwandaka na munu; kana beno sumika kaka nsonso ndambu, mpe ti dibaya me kangama mbote ve, ntama mingi ve mupepe ke nata yawu. Kasi beno fwana kusumika yawu ya muvimba, samu yawu kota mbote. Na yina ntangu yayi kana mu vwanda mwa ngolo na bisika yankaka, mpe na nkokila yayi samu na beno banzenza yina kele awa, mu zola ve—mu zola ve kuniongisa beno. Mu zola kaka kusala ti dibuundu yayi kuzaba mbote yina beto ke kwikilaka. Ntangu yayi beno nionso yina me kuwa yawu mbote, beno tuba, “Amen.” [Dibuundu me tuba, “Amen.”—Mu.] Mbote mingi. Ya kele—ya kele mbote. Mpe ntangu yayi mu ke sukula maboko na yayi. Mpe kuna—kuna. . . Bawu ke na kubakaka yawu, mpe nionso yina, samu ti na bilumbu ke

kwisa, kana na mwa ntangu mosi bawu zola kuzaba yina beto ke kwikilaka, mpe na yina beto ke sikamaka, yayi yina bawu ke na kubakaka ke zonza yawu. Mpe na yina beto ke salaka yawu ntangu nionso, samu ti bantu ya malu-malu ke kwisaka mpe—mpe beto ke kwendaka na ntuala. Mpe ntangu yayi beto lenda ve kutala Malongi nionso ya dibuundu, kasi kaka ndambu ya yawu beto zola ku—kuzonzila. Mpe ntangu yayi, na nkokila ya Kilumbu ya tatu, kuna, kubanda . . .

⁷ Ntangu yayi, na Kilumbu ya ntete mpe Kilumbu ya zole, mu ke kwenda, na kusambila, samu na kukubama na balukutakanu ya kubeluka ya nzutu. Mpe beno lenda baka alo-alo, to nionso yina beno zola, mpe kunata muntu nionso yina beno zola, samu na balukutakanu yayi ya reveil yina ke na kwisa. Mpe beno tuba na bawu na kukwisa ve na nswalu-nswalu awa, bawu kwisa ve, na kutubaka, “Mbote, ntangu yayi mu ke kwenda na nswalu kuna na nkokila yayi, samu ba sambidila munu. Mpe mbasi na nkokila, nionso ke . . .” Beno sala mutindu yina ve. Beno kota mpe beno kuwa fioti, samu ti beto zola kubaka ntangu mpe kulakisa Ndinga yayi pwelele ti diabulu lenda kuzwa ata mwa kisika ve samu na kusala. Mpe kuna ntangu beno ke kuma na nsuka ya lukwikilu ya beno, mpe ti beno me banda na kukwikila, na yawu beno bika mbanzulu ya beno kusala kisalu, na yawu lukwikilu ya Nzambi ke kwisa sadisa yawu. Na yawu beno lenda kwenda. Beno me mona?

Samu ti, lukwikilu ya beno lenda sala mingi ve. Mbanzulu ya beno fwana landa nzila yina lukwikilu ya beno ke na kukwenda, mpe kuna lukwikilu ya Nzambi ke sala na manima mpe ke siamisa yawu nionso. Beno me mona? Kasi, kana ya kele lukwikilu ya beno, “Oh, yinga, mu me kuzwa yawu ntangu yayi!” Mpe ti kana mbanzulu ya beno, kusala mutindu yankaka, na kutubaka, “Mu zaba ve kana ya lenda simba na munu?” Kaka kuna, ya lenda simba ve. Beno me mona? Na yina beto zola ti yayi vwanda ya kieleka lukutakanu mosi ya kubeluka ya nzutu. Mpe ntete muntu nionso kukota na bivinga, mpe nyonso yina, samu na kubeluka ya nzutu, to samu na balukutakanu yayi ya malu-malu, mu zola ti bantu kubakula mbote samu na yinki bawu ke na kukota kuna. Na yina beno bambuka moyo, na kukwisa tala beto, mpe beto ke sepela na kumona beno.

⁸ Ntangu yayi beno bambuka moyo, awa, ti mbasi na suka, beto ke landila Malongi ya dibuundu. Mpe mutindu mosi mbasi na nkokila. Ntangu yayi beno lenda kwisa, mpe muntu nionso lenda kwisa. Ntangu nionso beto ke sepelaka na kumona muntu nionso. Kasi yayi ke basika awa, na nkokila yayi, kele samu na bantu yina kele ya tabernacle awa, bayina—bayina ba me longa na Malongi yayi. Kasi, kuna na nganda na kisalu, na kisalu ya kumwangisa nsangu, beto ke zonzilaka kaka mambu ya ngudi, ya Malongi ya nsangu ya mbote ya Masonuku. Kasi awa na tabernacle, beto kele na mabanza ya mutindu ya beto mosi mpe

beto kele na balukwikilu ya mutindu ya beto mosi, mutindu—mutindu—mutindu dibuundu, mpe ya kele yina beto ke zonzila diaka, na nkokila yayi.

⁹ Mpe na ntuala beto zibula Ndinga ya Yandi ya lusakumunu, beto lenda kulumusa bayintu ya beto na mwa ntangu fioti samu na kusambila?

¹⁰ Nzambi ya ngolo nionso mpe ya lulendo, Nge yina, ntangu yinza bandaka ntete ve na kuzungidila mwa mbuma ya ntete, Nge vwanaka Nzambi. Nge me soba ata fioti ve. Mpe ntangu ya ke vwanda diaka ve na mbuma na kusimbidila yawu, mpe ata yinza diaka ve samu na kusimbidila, Nge ke vwanda kaka Nzambi. Nge kele ya seko, mpe ya seko. Nge kele Nzambi. Ata mbala mosi ve Nge kuzwaka mbatukulu ya bilumbu, mpe nsuka ya luzingu. Nge ke vwanda ntangu nionso. Mpe, Tata, mutindu Nge kele na nsuka ve, mpe beto kele ya kusuka, na yina beto ke lomba mawa ya Nge ya Bunzambi, Nzambi, samu ti beto zaba ti mpeve ya beto yayi ke vukana na Seko, ya ke basika na kati ya ntangu, samu na kukota na Seko. Ya kele samu na yina, Mfumu, beto kele awa na kutala mbote kitezo ya mpulusu ya beto, na kumona wapi kisika beto kele landila Ndinga ya Nge, mpe na kumona wapi kisika beto kele na bimbangi ya beto. Ti beto ke na kuzinga luzingu yina ke sepelisa Nge? Ti mpeve ya beto ke na kupesa kimbangi ya Mpeve ya Nge? Ti malongi ya beto ke na kupesa kimbangi ya Biblia yayi? Mpe, Tata, bika ti mosi na mosi, kutala yawu mbote-mbote, na balukutakanu tatu yayi ke na kwisa. Pesa yawu, Mfumu.

¹¹ Sakumuna pasteur awa, ba-diacre, ba-administrateur, mpe bandimi nionso, bantu yina ke kwisa na dibuundu yayi. Katuka bilumbu ya munu ya ntete awa, Mfumu, mingi, mingi ya bantu me yikama bayina mu zaba ve bankumbu, to bisika yina bawu me katuka, kasi mu zaba ti Nge zaba nionso samu na bawu. Mpe beto kele awa samu na lukanu mosi, na nkokila yayi, Mfumu, ya kele kuvwanda kintwadi pene-pene ya Ndinga ya kusonama. Mpe pesa beto Mpeve-Santu na baluzingu ya beto, samu ti beto vwanda na ngemba, mpe na kusakana ve, mpe na kubanga Nzambi, mpe kutala mbote-mbote baluzingu ya beto na nzila ya Ndinga ya Yandi. Pesa yawu, Mfumu.

¹² Mpe na kati ya yinzo yayi, na nkokila yayi, Mfumu, ya kele na bankundi ya munu yina kele bantu ya kukangama na mutindu yankaka ya—ya dibuundu. Mpe, Mfumu, mu ke na kuvutula matondo mingi ti bawu me kwisa kuvwanda kintwadi na beto. Ya lenda vwanda ti beto kele na ngwisani ve na mwa misiku ya Malongi. Kasi na yina me tala musiku ya ngudi ya nene, beto kele bankundi yina ke nwanaka kintwadi na ntuala ya mvita. Na yina, O Nzambi, bika ti yawu kupesa kikesa na ngwisani ya beto—ya beto, mpe ya beto. . . mpe ti bansinga ya lemvo mpe ya zola ya Nzambi kuvwanda ya kulutula mingi na zulu ya beto. Ntangu yayi, beto ke na kubakula, Mfumu, ti yayi kele kisalu

ya kulutila nene samu na muntu na kusala, samu ti yina beto ke na kutala, na nkokila yayi, ya kele luzingu ya mioyo yina ke na kwenda na Seko. Na yina beto ke sambila ti Mpeve-Santu kukota mbala mosi na Ndinga, mpe kusemisa Yawu mpe kutendula Yawu na mutindu ya Yandi Mosi, na beto, bima yina Yandi zola ti beto zaba. Pesa yawu, Mfumu. Mpe ti ntangu bawu tatu. . . ntangu balukutakanu yayi ke suka, bika ti beto kwenda na kuvwandaka dibuundu mosi ya ngolo, ya bantu mosi, kuvwanda na bantima mpe balukanu mosi beto nionso, na bankundi ya beto ya Kimfumu ya Nzambi, mpe kukwenda na ntwala mutindu beto me salaka yawu ntete ve.

¹³ Mu zola kutonda Nge, Mfumu, awa na ntwala ya dibuundu mpe—mpe ya bantu yina kele awa, na yina Nge me pesa munu basabala mingi samu mu pema mbote. Mu ke na kutala mbote na nkokila yayi samu na Kwizulu ya Nge mpe samu na lusakumunu ya Nge. O Nzambi, beto ke sambila samu na mpangi-bakala awa, mpangi ya beto ya bakala yina ke zyeta na basimu yankaka, kuna na bayinsi yayi ya mpimpa, ya mpasi, kisika yina yandi ke pesa luzingu ya yandi na lufwa. O Mfumu, sakumuna Mpangi ya beto Jeffreys na yina yandi ke kwenda, mpe mwana ya yandi ya bakala, mpe kento ya yandi, mpe pesa yandi bambuma mingi. Bika ti yandi kutobula mabulu na kati ya mpimpa tii Nsemo ya Nsangu ya mbote ke sema bisika nionso. Wa beto, Tata, samu ti beto me lomba kisambu yayi na Nkumbu ya Mfumu Yesu, Mwana ya Nge. Amen.

¹⁴ Awa, na nkokila yayi, mu ke tanga na kati ya Biblia ya munu ya fioti ya Scofield. Mu me luta bamvula makumi zole na tanu, ntama mingi ve. Mpe mu lenda tanga yawu diaka, kasi ya ke na kumonana mbote ve. Ntangu mu ke tangaka mu ke lwataka maneti, mpe na yina mu ke mona mutindu ya ke vwanda na nkokila yayi, samu ti ya kele mbala ya munu ya ntete.

Awa mu ke na malongi, ya mutindu yayi, yina kele, “Dibuundu fwana . . .” Oh, bima mingi, kana beto lenda tala yawu. Mosi ya yawu kele, “Samu na yinki ba ke bokilaka beto Dibuundu? Samu na yinki beto kele denomination ve? Samu na yinki—samu na yinki beto ke kwikilaka na lukengolo ya Seko ya moyo ya mukwikidi? Samu na yinki beto ke fundisaka bakento yina ke longaka? Samu na yinki beto ke botikaka na kukotisaka na kati ya masa? Mpe Dibuundu ke lutila na Mpasi ya nene?” Mpe mingi ya malongi yayi awa, mu banza ti mu lenda vwanda na kumi na tanu to kumi na nana ya yawu, samu na bankokila yina ke na kwisa.

¹⁵ Na yina mu banza, na nkokila yayi, ntete, na kubanda, ya ke monana ti Mfumu me tula na ntima ya munu dilongi yayi, ya . . . *Samu Na Yinki Beto Kele Denomination Ve?* Ya kele samu na yina . . . Ntangu yayi, beto kele na diambu ve na bantu yina kele ya denomination. Beto kele na diambu na bawu ve, kasi mu zola kuzabisa beno samu na yinki beto kele ve na kati ya mosi

ya ba-denomination. Ba tumbikaka munu na mwa dibuundu mosi ya ba-Baptiste, mutindu beno zaba yawu. Mpe dibuundu ya ba-Baptiste keke denomination ve, to ya vwandaka ntete ve, tii ntama mingi ve, mpe ntangu yayi ya me kuma kaka denomination mutindu bayankaka nionso. Kasi, lukanu samu na yinki beto me kumaka ata mbala mosi ve denomination . . .

¹⁶ Kasi, beto keke organisation. Beto keke organisation, ya me zabana awa na—na luyalu, mutindu organisation, nkonga ya bantu yina ke vukanaka kintwadi samu na kukembila Klisto, kasi beto keke ve na kati ya denomination mosi. Muntu ve lenda yala na zulu ya beto, beno me mona. Ya keke denomination ve. Ya keke—ya keke kaka organisation, kimvuka yina bakwikidi ya Baklisto ke vukanaka. Bantu ke kwisaka awa na yinzo-Nzambi. Mpe yayi me kuma yinzo-Nzambi ya bawu kana bawu zola kukwisa, luzingu ya bawu nionso.

¹⁷ Mpe bawu lenda kwisa awa mpe kundima ve nionso yina beto ke longaka. Nionso yina keke ya kulunga. Beno ke kuzwa ntangu nionso, kana kaka beno vwanda ntangu nionso Muklisto, beno lenda kwisa kuvukana, mpe kuzwa diboko mutindu muntu nionso yankaka. Beno me mona? Kana mu tuba ti mu ke kwikilaka na mbotika na kukotaka na kati ya masa, mpe ti beno ke kwikilaka na mwa kumwangisa ya masa, mpe ti beno keke ya kukangama na yawu, beto ke landila kaka na kuvwanda mutindu beto ke vwandaka mutindu ti beto zole keke na ngwisani. Ya lenda sala ti beto mona mambu, mutindu mosi ve. Kasi ntangu nionso yina beno ke vwanda Muklisto ya bakala to ya kento, beno lenda kwisa, beno me mona, muntu nionso.

¹⁸ Na yawu beto keke na denomination ve, samu mu banza ti denomination ke kabulaka kimpangi. Ba yankaka lenda tuba, “Mbote, beto keke na kima ve ya kusala na reveil yina. Ya keke reveil ya ba-Methodiste.” “Mbote, ya keke ya ba-Baptiste. Beto keke ve. . . Beto keke ba-Methodiste. Beto keke na kima ve ya kusala na yawu.” Mpangi-bakala, kana Klisto keke na kati ya yawu, beto fwana—beto fwana tala yawu nionso. Beto fwana kutula . . . Ya—ya keke Nzutu ya Klisto yina ke—ke na monaka mpasi. Mpe mu lenda mona yawu mingi na kati ya bayinsi bubu yayi, mutindu beto ke . . . Na kutala, ata mbala mosi ve, ata kilumbu mosi ve, ti Klisto bongisaka denomination mosi. Yina, mu me tuba na beno keke kieleka.

¹⁹ Ntangu yayi, ntangu yayi, mu ke lomba beno samu na mbasi na nkokila, kana beno zola kuzaba mosi ya bima yayi, mutindu mambu ya ntama yina mu me zonzila, to kima yankaka. Mu ke na ntangu mingi ve samu na kuzonzila nionso, kana ve mu ke baka dilongi yankaka ve, samu ti beno lenda baka kaka basabala na zulu ya dilongi yina. Kasi kana beno zola kuzaba kisika yango, to kima yankaka, beno yufula munu kaka, mpe beno tula yawu awa na zulu ya—na zulu ya chaire, mpe mu ke pesa beno mvutu na yawu.

²⁰ Ntangu yayi, denomination ya kulutila ntama, mpe denomination ya ntete yina beto kuzwaka, ya kele dibuundu ya Katolika. Mpe ba bongisaka yawu bamvula nkama tatu na mwa bamvula diaka na manima ya lufwa ya ntumwa ya nsuka. Mpe ya kele kieleka. Beno lenda kuzwa yawu na nsangu ya ntete ya Batata ya Nicée, mpe beno lenda kuzwa yawu na kati ya masonuku ya Josephe, mpe, oh, na mingi ya—ya bantu ya nene yina ke sonikaka bamambu ya ntama. Beno me mona? Mpe na yina me tala...konso ya bambandu ya dibuundu, yina vwandaka tii na lufwa ya ntumwa ya nsuka, mpe diaka bamvula nkama tatu na manima ya bantumwa, ya vwandaka ve na denomination mosi. Mpe dibuundu ya Katolika vwandaka dibuundu ya ntete ya denomination.

²¹ Mpe mabuundu ya ba-Protestant kele ba-denomination yina me basika na denomination. Kusungika ya ntete, me vwanda ya Luther; na manima ya Luther me kwisa Zwingli, na manima ya Zwingli me kwisa Calvin, mpe ya me landila mutindu yina. Mpe me kwisa Reveil ya ba-Wesleyen, mpe me kwisa Alexander Campbell, John Smith, mpe ba yankaka yina, beno me mona, ya me landila. Mpe ba-mouvement ya nsuka yina kele na beto ntangu yayi ya kele mitindu yankaka ya kutala ya mbandu ya Pentecote.

²² Mpe mu ke kwikilaka ti Nzambi me sala na konso nsungi. Kasi ya me kuminaka beno na kutala ti, konso ntangu yina dibuundu ke kubwaka, mpe kaka na ntangu yina bawu ke sala denomination ti ya kele kuna bawu ke banda na kubwa? Mpe ntangu bawu ke kubwa, ata mbala mosi ve Nzambi ke telemisa diaka dibuundu yayi. Yawu ke beba mbala mosi. Ntangu yayi beno... Kana beno zola kuzaba disolo ya yawu, beto—beto lenda pesa beno yawu, kulakisa beno ti—ti dibuundu mosi ve, ti ata mbala mosi ve na disolo ya mabuundu ti, ya me vwanda na denomination mosi yina me kubwaka mpe me telama diaka. Ata ti ya vwanda ba-Baptiste, ba-Methodiste, ba-Presbyterien, ba-Lutherien, ata nionso yina ya lenda vwanda, ntangu bawu ke kubwa, yimeni samu na bawu. Ntangu yayi, ya kele kieleka. Ntangu yayi, yayi, yina mu—mu me zonzila beno awa, beno tula bakazaka ya beno, samu beto kotisa yawu mbote. Beno me mona? Ata mbala mosi ve, ata kilumbu mosi ve. Ntangu muntu mosi basikaka mutindu muntu mosi mpe ti yandi kubongisa dibuundu mosi, yawu bandaka kuna.

²³ Nzambi ke salaka na bantu, kasi na denomination ve. Ata na nsungi mosi ve Nzambi me salaka na denomination. Ntangu nionso Yandi ke salaka na muntu. Na Ngwisani ya Ntama, Yandi salaka na bantu. Na Ngwisani ya Malu-malu, Yandi salaka na bantu. Na bansungi nionso, Yandi ntangu nionso ke salaka na bantu, mpe kasi na ba-denomination ve. Na yina, samu na yina, kana Nzambi kele ve na kati ya denomination, yinki ya mbote mu lenda kuzwa na kusalaka na yawu kima mosi mutindu

denomination? Ntangu yayi, mu ke na kuzonzaka ve samu na bantu yina kele na kati ya denomination, mu ke na kuzonzila na yina me tala denomination yawu mosi, samu ti bantu ya Nzambi kele na ba-denomination nionso yayi.

²⁴ Na kutala, ata mbala mosi ve Nzambi ke bikaka kima kusalama kukondwa ti Yandi kupesa ntete malongi na yawu. Mu ke kwikilaka ve ti ya kele na kima yina . . .

²⁵ Ntangu yayi, mutindu mambu yina ke na kubasikaka, na mabuundu, mutindu yina beto vwanda me kuzwa ntama mingi ve na yina me tala menga mpe mafuta, mpe nionso yina. Mpe beno zaba mukanda yina “Mpangi ya luzolo Branham”, mpe nionso yina. Kasi kikuma samu na yawu mu teleminaka yawu, ya kele samu ti ya kele ve na kati ya Ndinga. Mpe ya kele samu na yina mu ke teleminaka denomination, samu ti ya kele ve na kati ya Ndinga. Mpe ya fwana vwanda na kima yina beto fwana telemisa lukwikilu ya beto. Mpe kana beto lenda ve kutelemisa yawu na mwa denomination mosi, beto fwana telemisa yawu na Ndinga ya Nzambi. Samu ti kaka Yawu kele fondasio, ya kele Ndinga ya Nzambi.

²⁶ Mpe kuna kana Ndinga ya Nzambi ke tubilaka ve denomination, kasi ke teleminaka denomination, kuna beto fwana zonza mutindu mosi na Ndinga. Ata yina évêque, to muntu yankaka lendaka tuba, yina muntu nionso lendaka banza, yina muntu mosi ya mbote lendaka tuba, yina kima nionso lendaka tuba, kana ya kele ve na ngwisani na Ndinga ya Nzambi, kuna ya kele ya luvunu. Beno me mona? Yawu fwana vwanda, Ndinga fwana vwanda kima ya nsuka. Ndinga ya Nzambi fwana vwanda amen ya nsuka.

²⁷ Ntangu yayi beno bambuka moyo, mu me tuba ve ti muntu nionso yina kele na kati ya ba-denomination kele ve muklisto (beno me bakula yawu). Ya kele na makumi ya mafunda ya mioyo ya ntalu na kati ya ba-denomination yayi, ya bayina kele bana ya Nzambi. Kasi kukabula bawu mpe kukabisa bawu, mu ke teleminaka yawu. Mpe Ndinga ya Nzambi ke teleminaka yawu.

²⁸ Mpe mu ke kwikilaka ti ya kele ve na isme yina kele na yinsi bubu yayi, ata isme mosi ve yina me vwandaka ntete na yinsi, yina kwisaka, ti Ndinga ya Nzambi kuzonzilaka yawu ntete ve. Mu ke kwikilaka ti Ndinga ya Nzambi ke pesaka beto nionso yina beto ke na yawu nsatu, kaka awa na kati ya Ndinga. Kubanda . . . mbatukulu tii nsuka ya beto, kele awa na kati ya Ndinga ya Nzambi. Mpe kuna mu—mu ke kwikila ti kana ya kele na kati ya Ndinga ya Nzambi, na yina beto fwana . . . Ya kele ya kuzonzama. Mpe Ndinga ya Nzambi kele dilongi.

²⁹ Na kutala, ba ke tangaka ve Ndinga ya Nzambi mutindu ba ke tangaka zulunalu. Ba ke tangaka Ndinga ya Nzambi na nzila ya Mpeve-Santu, beno me mona, samu ti ya kele Mpeve-Santu Yandi mosi yina vwandaka tuba na nzila ya Klisto. Klisto

tondaka Nzambi na yina Yandi bumbaka bima yayi na meso ya bantu ya ndwenga mpe ya mayele, mpe monisaka yawu na bana ya fioti bayina vwandaka ya kukubama na kulonguka. Na yina, beno me mona, ndongosolo kele nzila ya kukumina ve, kusala denomination kele nzila ya kukumina ve. Ya kele kaka na nzila mosi samu na kukuma, ya kele, kuvwanda ya kutwadisama na nzila ya Mpeve ya Nzambi. Mpe kimbangi yango yina beno me kuzwa fwana kufwanana na Ndinga yayi. Beno me mona? Kuna beno me kuzwa yawu. Beno me mona?

³⁰ Mutindu beto ke tala yawu awa na mwa baminuti, beto kele na bantu yina kele—kele. . . Bayankaka kele ba-Calviniste ya kulutula, bayankaka ba-Arminien ya kulutula, mpe—mpe banzila ya mutindu na mutindu. Ntangu yayi, ya ke vwandaka ntangu nionso, ata mutindu yina beno lenda zenga yawu fioti, ya ke na balweka zole. Yina kele nionso kieleka. Mpe bawu nionso zole ke tulaka ntembe na mabanza. Kasi, diambu kele ti, wapi kisika kele Kieleka? Beto ke na kwisaka kuna, kisika beto ke banza, na nzila ya lemvo ya Nzambi ti, beto ke lakisa beno Kieleka ya yawu. Ntangu yayi bika ti beto baka. . . mpe ya kele samu na yina mu me notika mwa malongi ya mabuundu yango.

³¹ Beno baka Babiblia ya beno, samu na mwa baminuti, beto nionso ntangu yayi. Mpe beto baka Apocalypse, na kapu 1; to kubanda, na Apocalypse, na kapu 17. Beto banda ntete na kutanga mpe kuna beto ke tala kisika yina mabuundu yayi bandaka, mpe yinki—yinki salaka ti yawu kubanda. Na kutala, Biblia ke lwengisa nionso. Yawu ke lwengisa bilumbu yina beto ke—beto ke na kuzinga. Mpe ntangu yayi, Apocalypse, na kapu 17, na lemvo ya beno. Mu me tuba 13, mu zolaka tuba yina ve, yina ke zonzilaka. . . Yina, beto ke baka yawu na mwa ntangu fioti, ya kele profesi yina me tadila Etats-Unis. Kasi beno kuwa mbote-mbote ntangu yayi.

Na yina mosi na kati ya bawanzio sambwadi yina simbaka bambungu sambwadi kwisaka na munu, mpe zonzaka na munu, na kutubaka. . . Kwisa; mpe mu ke talisa. . . nge kitumbu ya kento ya kindumba ya nene yina ke zingaka na kumu ya masa ya nene.

³² Ntangu yayi beno bambuka moyo ti, yayi ke na kuwakana mutindu mambu ya mansweki. Ntangu yayi kento yayi ya luzingu ya yimbi, mbote, kana beto zola kulonga yayi, beto fwana kubakula ntete yinki bidimbu yayi zola tuba. Ntangu yayi, *kento*, na Biblia, ke lakisa “dibuundu.” Bantu yikwa zaba yawu, ti beto kele Kento ya dikwela? Dibuundu kele Kento ya dikwela.

³³ “Kwisa awa mpe Mu ke lakisa nge kitumbu.” Na yina, ba ke pesa kitumbu na kento ya kindumba ya nene, kento ya busafu yina kele ya kuvwanda na zulu ya masa mingi. Na kutala, *kento* ke monikisa “dibuundu,” mpe *masa* ke monikisa “bantu.”

Ntangu yayi, kana beno zola kutala yawu, beno tala, mpe, na nzila ya 15 na yina beno kele kuna, na nzila ya 15, na kapu yina kaka.

Mpe yandi tubaka na munu, Masa yina nge monaka, sika kele kento ya kindumba, kele bantu, . . . bankonga ya bantu, . . . bayinsi, mpe ndinga. (Benome mona?)

³⁴ Ntangu yayi, dibuundu ya nene yayi, kento ya nene yayi, awa beno bambuka moyo ti yandi kele kento ya luzingu ya yimbi. Mpe kana kento ke talisaka dibuundu, (mpe Dibundu ya Klisto kele Kento ya makwela, Kento ya makwela ya santu), mpe awa ya kele na kento mosi yina kele santu ve. Na yina ya fwana vwanda yina kele santu ve, yina ke sala mutindu ti yandi kele, kento ya dikwela. Benome mona? Ntangu yayi, mpe yinki yandi ke na kusala? “Yandi kele ya kuvwanda na,” to ya kuvwanda na zulu, ya zola kutuba, “kuyala na zulu ya masa mingi.” Na nzonzolo yankaka, yandi ke na lulendo na zulu ya bayinsi nionso mpe bandinga mpe bantu. Yandi kele muntu mosi ya nene, kento yayi.

Ntangu yayi, bantinu ya yinza me sala kindumba na yandi, . . .

³⁵ “Samu ti bantinu ya yinza me sala kindumba,” bamvwama, bantu ya nene. Wapi mutindu beto lenda sala, wapi mutindu ntinu lenda sala, kindumba na dibuundu? Ya kele kindumba ya kimpeve. Ya kimpeve! Yinki kele kindumba? Ya kele, mbote, ya kele mutindu kento yina kele ya kukwikama ve na bakala ya yandi. Yandi ke zinga na bakala yankaka na yina ti yandi kele na bakala. Mpe dibuundu yayi, mpe, ke—ke sala mutindu ti yandi kele Kento ya dikwela ya Klisto, na yina yandi ke na kusalaka kindumba na bantinu ya yinza, na luzingu ya yandi ya yimbi, na kisalu ya yandi ya yimbi. Oh, Ya kele mudindu mpe Ya kele mbote mingi. Mu zola Ndinga. Ntangu yayi beno tala.

. . . bantinu ya yinza me sala kindumba na yandi, mpe bantu ya ntoto me lawuka vinu ya yandi ya kindumba.

³⁶ “Vinu” ya yandi kele yina yandi vwandaka pesa, kupesa ngolo ya yandi, “Beto kele Dibundu! Beto kele bayina kele na yawu.” Benome mona? Ntangu yayi, beno sala kifwanukusu ya yayi na mabanza ya beno ntangu yayi. Mbote mingi. “Mpe yandi me nat- . . .”

³⁷ Na kutala, wanzio tubaka na Jean ti, “Mu ke lakisa nge kitumbu yina ke na kwisa na dibuundu ya nene yayi.” Ntangu yayi beno tala.

Na manima yandi nataka munu na kimpeve na ntoto ya kuyuma: mpe kuna mu monaka kento mosi ya kuvwanda na zulu ya niama ya ekarlati, . . .

³⁸ *Ekarlati*, na Biblia, ke lakisa “kintinu.” Tinta ya *ekarlati* zola tuba “mbwaki.” Mpe *niama* ke talisa “ngolo.”

Beno me mona, niama me basika na nzadi, yayi vwandaka na Apocalypse, 13. Mpe na yina beto ke mona niama me basika na nzadi, ya zola tuba ti ngolo yayi me basika na kati-kati ya bantu.

Kasi na Apocalypse 13, ntangu dimeme yayi basikaka, yandi basikaka na ntoto, na bantu ve, Etats-Unis. Mpe kuna, na manima, yandi kuzwaka bibongo zole ya fioti, ngolo ya bantu mpe ngolo ya dibuundu. Mpe kuna yandi kuzwaka ngolo, mpe vwandaka zonga mutindu dalango vwandaka sala na ntwala na yandi. Na yina beno sonika yawu mbote, beto ke na kubelama na ntangu ya kutalisa mabuundu mpasi na bima ya mutindu mosi yina bawu salaka bamvula mingi me luta na ntangu ya Rome ya mimpakanu, samu ti ya kele MUTINDU ME TUBA MFUMU.

Ntangu yayi beno tala yawu mbote. “Ya kuvwanda na zulu ya niama, ngolo.”

³⁹ Beno monaka Rebecca? Ntangu Eliezer kukutanaka na yandi, yawu vwandaka na nkokila, mpe yandi pesaka masa na kamela. Samu ti, Eliezer tubaka, “Ndumba ya kento yina ke kwisa mpe kana yandi pesa masa na kamela yayi, yandi ke vwanda . . . mpe pesa munu masa ya kunwa, yandi ke vwanda yina Nge me soola, Mfumu, na kuvwanda kento ya makwela ya kisadi ya Nge, Isaac.” Mpe na yina yandi vwandaka sambila diaka, Rebecca me kwisa mpe me baka masa mpe yandi me pesa yandi masa ya kunwa, mpe yandi me pesa masa na kamela. Beno tala, kamela vwandaka niama. Mpe niama kaka yina yandi vwandaka pesa masa, vwandaka yina kaka nataka yandi na kento ya yandi ya dikwela, Isaac.

⁴⁰ Mpe, bubu yayi, ngolo ya Mpeve-Santu, yina Dibundu ke na kupesaka masa mpe ke na kukembilaka, ya kele Yina ke katula Yandi awa na ntoto yayi, samu na kwenda kukutana na Kento ya dikwela. Kieleka, Isaac vwandaka na nganda na bilanga, na nkokila. Beto ke kutana ve na Mfumu na zulu na Nkembo. Ephesiens, na kapu 5, ke tuba ti beto ke kutana na Yandi na mazulu. Oh, yina ke sala ti ba-Methodiste kuboka. Beno banza na yawu! Beno me mona? Mfumu . . .

Isaac basikaka na yinzo ya tata ya yandi, mpe yandi vwandaka na nganda na bilanga ntangu Rebecca vwandaka kwisa na zulu ya kamela. Mpe na mbala ya ntete ya kumona yandi, ndumba ya kento zolaka yandi, mpe yandi dumukaka na nsi ya kamela mpe kwendaka mbangu na kukutana na yandi. Ya kele kieleka. Ya kele kisika yina beto ke kutana na Mfumu. Mpe kaka kamela yina yandi pesaka masa, yawu yina nataka yandi na bakala ya yandi.

Mpe kaka Ngolo yina Dibundu ke na kukembila, yina yinza ke na kubokila bu-fanatisme, yina Dibundu ke na kukembila, ke vwanda kaka Ngolo yina ke nata Dibundu na mazulu, “Samu na kukwenda kutana na Mfumu na mazulu.” Mpeve-Santu! Beno me mona? Ya kele . . .

Mpe, beno tala, Rebecca mwense.

41 Mpe kento yayi kele kento ya kindumba, yandi yayi beto ke na kuzonzila awa. Ntangu yayi, beno me bakula yinki kele ngolo ntangu yayi? Ngolo, yinki ya zola tuba, kuna, niama. Yandi vwandaka na zulu ya kima ya ekarlati. Ntangu yayi, wapi mutindu ya niama ya zolaka vwanda? *Ekarlati*, ya ke vwanda ngolo ya “kimvwama”. Wapi mutindu ya dibuundu yina yandi ke vwanda ntangu yayi? Yandi kele dibuundu ya kimvwama, mpe yandi kele dibuundu ya nene, mpe yandi kele dibuundu yina kele na ngolo, mpe ngolo ya yandi ke yala na zulu ya bankonga ya bantu mpe makanda. Mpe bantinu ya ntoto me sala kindumba ya kimpeve na yandi, bawu yina kele bantu ya nene ya ntoto. Ntangu yayi beto ke bakula nani yandi kele, na mwa baminuti, mpe kubakula denomination yayi.

Mpe kento lwataka bilele ya mbwaki ya kulutila (na mutindu ya bantinu), . . . lwataka bilele ya mbwaki ya kulutila mpe ya batinta ya ekarlati, . . . lwataka mpe misanga ya wolo mpe ya matadi ya ntalu . . . ya palata, vwandaka ya kusimba na diboko ya yandi mbungu ya wolo ya kufuluka na diambu ya busafu mingi mpe ya busafu ya kindumba ya yandi:

42 Yinki vwandaka na diboko ya yandi? Malongi ya yandi, yina yandi vwandaka nata na bantu, “Beto kele Dibuundu. Beto kele yayi.” Mpe ya kele mutindu yina, yandi me sala ti bantinu ya ntoto kuvwanda ya kukola na yandi. “Beto kele yayi. Beto kele ngolo ya kulutila! Beto kele na kisika ya nene na bayinsi nionso. Beto kele dibuundu ya kulutila nene na nionso. Beno kwisa, kunwa ya beto. . . Beno tiamuna yawu fioti, awa. *Beno* baka yawu. *Beno* baka yawu.” Ya kele yina, beno me mona. Mpe yandi vwandaka na mbungu na diboko ya yandi. Beno tala.

Mpe kento lwataka bilele ya mbwaki mingi mpe ya batinta ya ekarlati, . . . lwataka mpe misanga ya wolo mpe ya matadi ya ntalu mpe ya palata, vwandaka ya kusimba na diboko ya yandi mbungu ya wolo ya kufuluka na diambu ya busafu mingi mpe ya busafu ya kindumba ya yandi:

43 Ntangu yayi, bankundi, beto ke na kutangaka ve zulunalu. Beto ke na kutangaka Ndinga ya lusakumunu mpe ya Seko ya Nzambi. Mazulu mpe ntoto nionso ke luta, kasi Ndinga yayi ke vwanda kaka. Ya kieleka.

Mpe na zulu ya yintu ya yandi vwandaka ya kusonama nkumbu mosi, to, vwandaka ya kusonama nkumbu, ya MANSWEKI, BABYLONE YA NENE, MAMA YA BAKENTO YA KINDUMBA, YA DIAMBU YA BUSAFU MINGI NA KATI YA YINZA.

44 Mbote, awa na mwa bilumbu me luta, mu banza ve ti ya vwandaka awa na dibuundu, kasi mu longaka na dilongi mosi,

Masonuku Na Kibaka Ya Nene, mpe kuna mu talisaka kisika ya Babylone na ntangu ya ntama. Ntangu yayi, konso isme yina vwandaka, konso nsambulu mpe konso isme yina kele bubu yayi na yinza, yawu bandaka na Genèse. Ntangu yayi, kana beno lenda kuzwa *ba-Babylone Zole* ya Hislop, kana beno zola kulanda yawu na kati ya mambu ya ntama, to mwa babuku ya mbote ya mutindu yayi, kuna beno lenda kuzwa konso isme yina beno ke na kusosa. Mu ke vutula beno kuna na mwa baminuti, na yina me tala bakento yina ke longaka, beno me mona, mpe kulakisa beno kisika yina yawu bandaka, beno me mona, kuna na Genèse. Mpe bima ya mutindu yina, mutindu yawu bandaka na Genèse. *Genèse* zola tuba “mbatukulu.” Bantu yikwa zaba ti ya kele kieleka? Genèse kele mbatukulu. Na yina, kima nionso yina kele, ya fwana vwanda na mbatukulu.

⁴⁵ Ntangu mu ke talaka yinti. . . Mu me vwanda na mfinda bangonda zole, to tatu, mu banza bangonda zole. Mu me mona yinti mosi, ya vwandaka mpenza kitoko. Mu me mona yawu, mutindu yawu me kubwa; yankaka me baka kisika ya yawu, luzingu ya muvimba. Mpe mu vwanda banza yawu. Kasi na kisika mosi yinti yina kuzwaka mbatukulu. Kieleka yawu kuzwaka mbatukulu. Mpe mutindu kaka samu ba bokila yawu yinti, to mutindu yinti ya chène, to mutindu yinti ya hêtre, to mutindu yinti ya peuplier, to yinti ya diba, to nionso ya lendaka vwanda, ya fwana vwanda na Mayele mosi ya kulutula na manima ya yawu. Mpamba ve kana ya vwandaka kaka na mosi, kaka yinti mosi ya chène, kuna ya zolaka vwanda kaka na bayinti ya chène na zulu ya ntoto. Kasi ya lungaka ti Kima mosi, ya nene, ya kulutula Mayele, kukubika nionso.

Bika ti Nkumbu ya Yandi ya Santu kuvwanda ya kusakumuka! Yandi kele Yandi Yina tulaka ngonda mpe bambwetete na kati ya nionso yina ke zungana mwini. Yandi tulaka nionso na mutindu ya yawu. Mpe Yandi ke bongisa Dibuundu ya Yandi. Yandi ke baka kaka nzila yina Yandi zola ti Yandi kubaka; na este, na weste, na nord, to na sud, to kisika yina Yandi kele. Ntangu beto lenda kubasisa na mabanza ya beto mabanza ya denomination yayi mpe ti beto kota beto nionso na Calvaire. Yandi ke bongisa yawu, kana kaka ti beto kukupesa mutindu bayinti mpe nionso yankaka yina Yandi yidikaka. Ata mbala mosi ve beno me monaka ngonda kutuba, “Mu ke pesa nsemo ve na nkokila yayi. Beno bambwetete beno pesa nsemo na kisika ya munu.” Kasi beto, oh, beto kele mutindu yankaka, beno me mona.

⁴⁶ Ntangu yayi, Babylone, beno tala mbote wapi mutindu Babylone me monana. Yawu me monana na mbatukulu ya Biblia. Yawu me monana na kati-kati ya Biblia. Mpe yawu me monana na nsuka ya Biblia. Awa, ya kele na kima mosi. Na kutala, yawu bandaka na Nimrod. Nimrod salaka Babylone na Dibenga ya Schinear, yina kele na kati-kati na Masa ya

Tigre mpe ya Euphrate. Mpe ya Euphrate vwandaka luta kuna. Mpe—mpe banzila nionso, na bisika nionso ya yinsi, vwandaka nata na Babylone. Mpe mosi na mosi ya bamwelo ya yawu vwandaka sala mu banza ba-metre makumi sambanu na nene, ba salaka bamwelo yango na airain. Mpe ntangu beno ke kota na mbanza ya Babylone, banzila nionso vwanda twadisa na kiti ya kimfumu.

⁴⁷ Ntangu yayi, beno lenda kwenda na Rome, bubu yayi, mpe banzila nionso ke twadisa na Rome. Mpe kuna na konso nsongi mpe kubaluka ya nzila, ya kele na mwa mwense Marie ya kutelama, na Klisto ya mwana na maboko, yina ke na kulakisaka nzila ya Rome. Beno me mona? Yawu ke monana na mbatukulu, ya Biblia; yawu ke monana na kati-kati ya Biblia; mpe awa yawu kele na nsuka ya Biblia.

Ntangu yayi mu zola kulandila kutanga, samu na mwa baminuti, samu beno kuzwa dibanza ya yayi. Beno me mona? Mbote mingi. “Mpe mu monaka kento yango,” ntangu yayi beno tala mbote, “dibuundu.” Ntangu beno ke mona *kento*, beno banza kaka na “dibuundu.” Beno me mona?

. . .mu monaka kento yango ya kulawuka na menga ya *basantu*, . . .

⁴⁸ Ntangu yayi, wapi kisika mpova ya *santu* me katuka? Mpova ya *santu* me katuka na “yandi yina me kuma santu,” to “yina me kuma ya kuvedila,” ya santu. Mbote mingi.

. . .mu talaka yandi ya kulawuka na menga ya *basantu*, . . .

⁴⁹ Ntangu yayi, kana kento yayi kele dibuundu, yandi monisaka basantu mpasi. Mpe yandi kele dibuundu ya kulutila nene. Ntoto nionso kele na nsi ya ngolo ya yandi. Yandi kele na zulu ya masa mingi. Mpe yandi kele. . .Bantinu ya ntoto ke salaka kindumba na yandi. Mbote, nani yandi kele? Ya kele mwa mansweki. Ntangu yayi Mpeve ke. . .Beno zaba, mu banza ti ya kele na makabu yivwa ya kimpeve na kati ya dibuundu; mosi ya ndwenga, mpe mosi ya kubakula, mpe mosi samu na kubeluka ya nzutu, mpe mosi samu na *yankaka*.

. . .mpe na menga ya bambangi ya Yesu: . . .

⁵⁰ Ya kele mutindu ti bawu vwandaka kipe mingi ve yina Yesu vwandaka tuba. Ya vwandaka yina dibuundu vwandaka tuba. Yina kele kieleka. Mpe ya kele kieleka, mpe.

. . .mpe ntangu mu talaka yandi, mu yitukaka mingi.

⁵¹ “Mu yitukaka. Mu. . .Yandi vwandaka kima mosi ya kuyitukisa, na yina ti mu yitukaka na mutindu yina yandi. . .” Ntangu yayi bika ti mu vwanda na kisika ya Jean mpe kumeka kufungula yawu fioti, beno me mona. Jean tubaka, “Kuna yandi me vwanda. Yandi ke na kulakisa mutindu ti yandi kele dibuundu ya Klisto. Yandi kele na muswa na bambongo nionso

ya yinza. Yandi kele na bantinu ya ntoto na makulu ya yandi. Yandi kele mvwama mpe yandi me lwata binkuti ya batinta ya ngolo, mpe wapi mutindu yandi lenda vwanda ya kulawuka na bambangi ya Yesu? Wapi mutindu yandi lenda monisa basantu mpasi? Wapi mutindu yandi lenda kufwa bambangi ya Klisto? Mpe diaka, yandi mosi ke na kulakisa mutindu ti yandi kele Muklisto, dibuundu ya Klisto.” Ntangu yayi beno tala mbote.

Mpe na yina wanzio zabisaka munu, Samu na yinki nge ke na kuyituka? Mu ke tubila nge mansweki ya kento yayi, mpe ya niama yina ke na kunata yandi, mpe yina vwandaka . . . bayintu sambwadi mpe bibongo kumi.

⁵² Ntangu yayi, yayi awa kele kaka kutanga mosi ya mumesanu. Beno tala yayi mbote. Yayi ke vwanda mpasi ve.

Niama yina nge me mona vwandaka, mpe kele ve; mpe ke kulumuka . . . ke basika na dibenga ya yinda, mpe ke kwenda na kuzimbana ya kukondwa nsuka: mpe bayina ke vwandaka na zulu ya ntoto ke yituka, bawu yina bankumbu kele ve ya kusonama na buku ya luzingu katuka mbatukulu ya yinza, na yina bawu ke mona . . . na yina bawu—na yina bawu vwandaka kuna kutalaka niama yina vwandaka, yina kele diaka ve, mpe ke monana diaka.

⁵³ Mbote, yayi ke sala mpasi ntangu yayi, na yina yawu yayi. Yandi tubaka, ntangu yayi beno tala, ti, “Ntangu bayina nionso,” kaka ndambu ve, kasi, “bayina nionso ke vwandaka na zulu ya ntoto ke yituka.” Bawu nionso ke yituka. Yinza nionso ke yituka na kento yayi. Ya ke vwanda na nkonga mosi ya bantu yina ke yituka ve na yawu, mpe ya kele bayina kele na nkumbu na Buku ya Luzingu ya Mwana-dimeme.

⁵⁴ Mbote, ya ke vwanda mbote ti mu kotisa yayi mbala mosi awa, samu ti beto ke kota na yawu na baminuti fioti. Beno me mona? Na wapi ntangu ba tulaka bankumbu ya bawu na Buku ya Luzingu ya Mwana-dimeme? Katuka (Na wapi ntangu?) na reveil ya nsuka yina bawu vwandaka na yawu? na mpimpa yina bawu kwendaka na autel? na mpimpa yina bawu kumaka bandimi ya dibuundu? Mu zola kunyongisa beno ve. Kasi, mu ke tuba na beno, Biblia ke tuba ti, “Bankumbu ya bawu kele ya kutula na Buku ya Luzingu ya Mwana-dimeme katuka mbatukulu ya yinza.” Kieleka! Ntangu Nzambi, na mbatukulu, monaka ti Yandi ke tinda Mwana ya Yandi, mpe Yandi ke baka kisika ya nsumuki, ntangu Menga ya Mwana ya Nzambi ke basika. Biblia ke tuba ti Menga ya Yandi basikaka na ntwala ya mbatukulu ya yinza. Bantu yikwa zaba ti Biblia ke tuba ti, ti, “Menga ya Klisto basikaka na ntwala ya mbatukulu ya yinza”? Ntangu Menga yina basikaka, konso kinama ya Nzutu, ya bayina bankumbu vwandaka ya kusonama na Menga yango, na Buku ya Luzingu

ya Mwana-dimeme, na mbatukulu ya yinza. Samu na yinki beno me kuma na boma mingi? Oh, mpangi-bakala! Yayi ke fungulaka bamwelo, mutindu yina ve?

⁵⁵ Mbote, ntangu yayi beto tanga yayi awa, mpe beto tala kana yayi kele ya kulunga na yina. Beno me mona? “Mpe wanzio tubaka na munu, ‘Samu na yinki . . .’” Mu banza ti ya kele na nzila ya 8, “Mpe niama yina nge monaka . . .” Mbote mingi. Ya kele yawu.

Kibulu yina nge monaka kele, mpe kele ve; mpe ke basika na dibenga ya yinda, . . .

Mbote, beto ke vutukila yawu, kasi mu zola kubaka yankaka yayi, samu ti beto ke zonzila na yawu.

. . .mpe ke kwenda na kuzimbana ya kukondwa nsuka: mpe bayina ke vwandaka na zulu ya ntoto ke yituka, bawu yina bankumbu kele ve ya kusonama na buku ya luzingu katuka mbatukulu ya yinza, . . .

⁵⁶ “Ya ke vwanda na nkonga ya bantu na zulu ya ntoto,” na nzonzolo yankaka, “yina ba ke vuna,” mpamba ve yandi me vuna bawu. Mpe ya ke kaka na nkonga mosi ya bantu yina ba vunaka ve, mpe ya kele bayina nkumbu kele na Buku ya Luzingu katuka mbatukulu ya yinza. Beto ke baka yina na ntangu fioti.

⁵⁷ Ntangu yayi beno tala mbote kento, dibuundu, yandi vwandaka “*Mansweki, Babylone*.” Beto me mona yandi kumonana na nzila ya Nimrod. Yinki dibanza vwandaka na Nimrod? Nimrod tungaka mbanza mpe salaka ti bambanza nionso yankaka kwisa kufuta mpaku na mbanza yayi. Beto lenda mona kima ya mutindu yayi bubu yayi? Ya kele na kisika ya mutindu yina bubu yayi? Ya kele na dibuundu yina ke yalaka na zulu ya bayinsi nionso na yinza? Kieleka. Ya kele na kisika yina bayinsi nionso ya yinza ke kwendaka kufuta mpaku bubu yayi? Ya kele na kisika mosi?

Beto landila na kutanga yina me landa, kaka fioti, samu beno kuzwa dibanza nionso ya yawu. Mbote mingi.

. . .yina na kumonaka niama yina vwandaka, . . .kele ve, mpe yina ke monana diaka.

Mpe awa mayuki ya yina kele na ndwenga.

⁵⁸ Ntangu yayi, bantu yikwa zaba ti ndwenga kele mosi ya makabu ya Kimpeve? Kuna, na yinki mutindu ya nkonga ya bantu yina Yandi ke na kuzonzila, awa? Yandi fwana zonzila na nkonga ya bantu yina kele na makabu ya Kimpeve yina ke na kusala na kati ya Dibuundu yayi.

. . .awa mayuki ya yina yina kele na ndwenga.

⁵⁹ Ntangu yayi, beno telama kuna, beno ke mona ti beto ke tala yawu na kati ya bansungi nionso ya dibuundu yayi awa. Yandi ke basisa bima yayi, Mpeve-Santu me zonza, wapi mutindu makabu

yayi ke sala na kilumbu ya nsuka. Ntangu yayi, beto ke na dikabu ya kubeluka ya nzutu yina ke na kusala. Oh, ya ke—ya ke na kusalamaka mbote. Mbote, mpangi-bakala, makabu yankaka kele. Yina ke kaka mosi ya yawu. Yina ke kaka kima mosi ya mwa fioti. Mbote, tala dikabu ya kulutila nene mingi kaka awa. Ya kele ya kulutila mbote, dikabu ya Mpeve-Santu ya ndwenga, yina ke tula Ndinga ya Nzambi kintwadi mpe ke talisa na Dibuundu kisika yina beto kele, to kaka kunata muntu na kubeluka? Beto nionso zola kuvwanda na mavimpi ya mbote. Kasi mu ke zola ti mavimpi ya moyo ya munu kele na mfunu mingi, kulutila mavimpi ya nzutu ya munu, ntangu nionso. Oh, la la!

Beno kuwa Mpeve-Santu kuzonza na nzila ya Jean, kuna na Patmos, kutuba, “Awa mayuki ya yina kele na ndwenga. Bika yandi kuwa Yayi.” Ntangu yayi beto ke na kuzwa dibanza nionso awa. “Awa kele. . .”

Mpe awa mayuki ya yina kele na ndwenga. Bayintu sambwadi kele miongo sambwadi, sika kento yina me vwanda.

⁶⁰ Ya kele kaka na mbanza mosi, yina mu zaba, na yinza. . . Ya kele na bambanza zole, yina mu zaba, yina kele na miongo sambwadi to ya kulutila. Cincinnati kele mosi ya yawu, landila yina nongo ke zonzaka samu na Cincinnati. Yawu kele mama ya yingo, beno zaba, ti. . . nionso yina. Kasi yawu kele na ya kulutila. Kasi ya kele ve na dibuundu mosi yina ke yalaka na zulu ya Cincinnati.

Ya kele kaka na kisika mosi na yinza ya muvimba, yina kele na dibuundu ya kuvwanda na zulu ya myongo sambwadi, yina ke yalaka na zulu ya yinza ya muvimba. Na kutala, mu me katuka kuna ntama mingi ve. Bima nionso yayi.

Mpe mu me mona kuna kisika yina ba zonzaka, “Mpe awa mayuki ya yina kele na ndwenga.” Apocalypse 13. “Bika yandi yina kele na ndwenga kutanga lutangu ya niama, samu ti yawu kele lutangu ya muntu.” Ya kele ve nkonga ya bantu, nkonga ya bantu, kasi ya muntu “mosi.” “Mpe lutangu ya yandi kele nkama sambanu na makumi sambanu na sambanu.”

⁶¹ Bambala mingi mu kuwaka, ti, na zulu ya kiti ya kimfumu ya pape ya Rome, ya kele ya kusonika, “VICARIVS FILII DEI.” Bantangu yankaka mu ke kukiyufulaka kana ya kele kieleka. Sonika nzila mosi, mpe sonika yawu na ntalu, na ntalu ya ba-Romain, mpe tala kana ya kele yawu. Ya kele nionso kieleka. Mu telamaka pene-pene *mingi* na yimpu ya bitezo tatu ya pape, na tala-tala, “Kisika ya kufundisa difelo, mazulu, mpe mioyo na kombelo.” Beno me mona? Na yina, bima yayi, mu me katuka kuna ntama mingi ve, mu me katuka ntama mingi ve na Rome mpe mu zaba ti ya kele kieleka. Ntangu yayi beto zaba ti ya me monana.

Mpe beno tala bantinu sambwadi: tanu me kufwa (bayina vwandaka na ntangu ya ntama), mpe mosi kele (yina zolaka kwisa, yina zola tuba Cesar), mpe yina yankaka me kwisa ntete ve (yina zola tuba Herode, yandi yina vwandaka muntu ya yimbi); . . .

62 Ntangu yayi beno tala mbote. Beno tala mbote mutindu ya kele ya kulunga.

. . . mpe ntangu yandi ke kwisa, yandi ke zinga samu na ntangu fioti.

63 Ya kele na muntu yina zaba bangonda yikwa Herode vwandaka mfumu? Bangonda sambanu. Yandi vwandaka benda mama ya yandi na banzila, ya kukangama na nkuni ya mpunda. Mpe Yandi tulaka tiya na mbanza; mpe vunaka ti ya kele Miklisto. Mpe ti yandi vwandaka bula violon ntangu bawu vwanda. . . ntangu bawu vwanda tula tiya na mbanza. Bangonda sambanu—sambanu. Mpe beno me mona, “Mpe niama. . .” Ntangu yayi beno tala mbote, beno tala mutindu yandi vwandaka na mayele ya yimbi. Beno me mona? Ntangu yayi beno tala mbote.

Mpe niama yina vwandaka, mpe yina kele ve, mpe . . . kele ya nana, mpe kele na kati ya basambwadi (kimuntu ya basambwadi), mpe ke kwenda na nzimbusulu.

64 Bantu nionso zaba yinki zola tuba *nzimbusulu*, ya kele “difelo.” Mpe beno tala mbote kisika yina yandi me basika, “na difelo.” Yinki ya kele? Mabulu ya nene. Malongi ya Katolika kele na fondasio ve. Ya kele na Biblia ve samu na malongi ya Katolika. Ya kele ve na masonuku na kati ya Biblia yina lenda simbidila malongi ya Katolika, ata mosi ve. Bawu ke fwanikisa yawu ve. Nganga-Nzambi me kwisa kuna, mwa nganga-Nzambi yayi awa ya dibuundu ya Sacré-Coeur me kwisa kuna. Yandi me tuba, “Oh, yandi. . .” Mu vwanda tuba na yandi samu na mbotika ya Mary Elisabeth Frazier. Yandi tubaka, “Oh, nge me botika yandi na mutindu dibuundu ya Katolika vwandaka botika na ntangu ya ntama.”

Mu tubaka, “Yinki ntangu?”

Yandi tubaka, “Na Biblia, Biblia ya beno.”

65 Mu tubaka, “Dibuundu ya Katolika vwandaka botika mutindu yina? Yina kele malongi ya dibuundu ya Katolika?”

“Yinga.”

66 Mu tubaka, “Na kukondwa kuzimbana ya dibuundu ya Katolika, samu na yinki ya me soba mingi?” Beno me mona?

67 Yandi tubaka, “Mbote, beno me mona, beno nionso ke kwikilaka Biblia. Beto ke kwikilaka dibuundu.” Beno me mona? “Beto ke kipaka ve yina Biblia ke tubaka. Ya kele yina dibuundu ke tubaka.” Yina kele nionso kieleka. Kana beno kuzwa ntangu ya kutala yawu mbote, na bawu, beno meka yawu mbala mosi,

beno mona. Bawu ke kipaka ve yina Biblia ke tubaka; bawu kele na kima mosi ve ya kusala na yawu. Bawu ke kipaka yina dibuundu ke tubaka. Beno me mona?

⁶⁸ Kasi beto ke kipaka ve yina dibuundu ke tubaka. Beto ke kwikilaka yina Nzambi me tuba. Amen. Samu ti, ya kele ya kusonama na Biblia ti, “Bika ti ndinga nionso ya muntu kuvwanda luvunu, mpe ya Munu kuvwanda Kieleka.” Ya kele samu na yina beto kele denomination ve.

⁶⁹ Ntangu yayi beno tala mbote. Beno kuwa yayi, minuti fioti. “Bantinu tanu yina vwandaka, me kubwa, bantinu tanu.” Kana beno zola kuzwa yina salamaka, mu ke lakisa beno yawu. “Mpe mosi kele, mpe mosi ke kwisa.”

Ntangu yayi beno tala mbote, “niama.” Na kutala, niama kele ntinu ve. Yandi vwandaka “yandi yina kele, yina kele diaka ve; mpe yina ke monana diaka, mpe yina kele diaka ve; yina ke monana diaka, mpe yina kele diaka ve.” Yinki ya kele? Kulandana ya bapape, ngolo, niama ke na kutwadisa. Ya kele ntangu Rome ya mimpakanu vwandaka me soba samu na kukuma Rome ya pape. Rome ya mumpani vwanda me soba samu na kukuma, mpe kuna ya vwanda me kuma kimfumu ya pape, yina zola tuba, bawu vwandaka na pape na kisika ya ntinu, mpe pape kele ntinu ya kimpeve. Ya kele samu na yina yandi me lwata yimpu ya kimfumu, ntinu ya kimpeve, yina ke na kutalana mutindu ti muntu ya kimpeve ya nene ya Yesu Klisto. Beno bawu yayi. Ntangu yayi beno tala.

⁷⁰ Mpe beto ke monikisa awa malongi yango ya Katolika mpe kulakisa beno mutindu yandi salaka nzila tii na mabuundu ya ba-Protestant, beno me mona, mutindu yandi kele diaka na kati ya dibuundu ya ba-Protestant, mingi ya yawu. Ya kuswaswana, ya kieleka, na Biblia, ya kuswaswana na nionso. Ntangu yayi, “Niama yina vwandaka, yina kele diaka ve.” Ntangu yayi beno bambuka moyo ti, “Bantu nionso na zulu ya ntoto ke vwanda ya kuvunama, na zulu ya ntoto, bawu nionso yina nkumbu kele ve ya kusonama katuka mbatukulu ya yinza.” Beto me mona.

Mpe niama yina vwandaka, mpe ke diaka ve, (na nzila ya 11) mpe yandi kele diaka ya nana, mpe . . . na kati ya sambwadi, mpe ke na kukwenda na nzimbusulu. (Yandi ke landila mutindu yina tii yandi ke kubwa na dibulu ya nene na nsuka ya nzila.)

Mpe bibongo kumi yina nge monaka kele bantinu kumi, . . .

Ntangu yayi beno tala mbote. Kana beno zola kumona kima ya kusimba, beno tala mbote yayi.

. . . kele bantinu kumi, yina me banda ntete ve na kuyala; kasi bawu ke yala kaka ngunga mosi na niama.

⁷¹ Ba me lwatisa bawu yimpu ya bantinu ve; bawu kele bamfumu ya nkú. Beno me mona, ata mbala mosi ve ba me lwatisa bawu yimpu ya kimfumu, kasi bawu kuzwaka ngolo mutindu bantinu, ngunga mosi, na niama. Ya kele kaka na mwa ntangu yayi ya mpimpa yina beto ke na kuzinga na ntangu yayi bamfumu ya nkú ke na kubasika. Beno me mona? “Me kuzwa ngolo mutindu ntinu, ngunga mosi na niama.” Ntangu yayi, mbote mingi.

Bawu nionso kele kaka na dibanza mosi, mpe kusadila ngolo mpe kimfumu ya bawu samu na niama.

Bawu ke nwanisa Dimeme, mpe Dimeme ke nunga bawu: (Nkembo!) samu ti yandi kele Mfumu ya mfumu, mpe Ntinu ya bantinu: mpe ke nunga na bayina yandi bokilaka, mpe soolaka, mpe ya kukwikama na yandi.

⁷² Mu zola kulonga dilongi mosi na zulu ya yawu, “Bayina ba soolaka, na ntwala ya mbatukulu ya yinza, mpe bayina kele ya kukwikama na lubokilu ya bawu.” Alleluia! Yawu yina. “Ba ke bokilaka bawu, bayina ba soolaka, mpe bayina kele ya kukwikama.” Mpe kele yina ke vukisaka bima zole, beno me mona, “Bayina ba soolaka, mpe bayina kele ya kukwikama.” Bawu ke nunga yandi. Ata yinki mutindu nene bawu lenda kuma.

⁷³ Mpe movement yayi ya nene ya communisme, ya communisme yayi ya nene bubu yayi, beno vwanda na boma ya yawu ve. Ya kele kaka kisalulu na maboko ya Nzambi. Mu lenda lakisa yawu na nzila ya Biblia yayi. Yandi ke monisa yandi mpasi samu na bambangi nionso yina yandi kufwaka. Yinga, tata. Beno me tala mbote ti bantinu nionso yayi ke ndima kintwadi, mpe ke yina yandi. Mpe communisme ke tiamuka, na bayinsi nionso, na yinza ya muvimba. Beno tala, ya fwana vwanda mouvement ya Nzambi, samu na kupesa yawu ndola. Beno ke tuba, “Vingila ntete, Mpangi Branham. Communisme, kele mouvement ya Nzambi?” Kieleka, na nionso kieleka, ya kele mouvement ya Nzambi. Biblia me tuba mutindu yina. Kasi ya ke na kukota na kisalulu samu na kupesa lusambusu na bantu ya yimbi mpe bantu ya makangu ya muvusu. Yinki me bikana na yinza? Yinki kele na beto? Awa kilumbu mosi. . .

⁷⁴ Mu ke sukisa na dilongi ya munu kaka na baminuti fioti, kana ya lenda salama. Mu vwanda tanga na kisika mosi ya Masonuku kisika yina ba zonzaka ti mwana ya makangu lenda ve kukota na kimvuka ya Mfumu bansungi kumi na yiya. Bantu yikwa zaba yawu? Ya kele kieleka, Deuteronome 23; mwana ya makangu. Kana ba me kuta kento mosi na bilanga, yina, bakala ke na kukeba ve, mpe ti bakala mosi kwisa baka yandi na ngolo, bakala yina fwana kwela yandi. Mpe ata ti yandi kusala kindumba, yandi fwana zinga na yandi tii yandi ke kufwa. Mpe kana kento yayi kukwelana na yandi, na kutala ti yandi zolaka

wwanda mwense, mpe ti yandi kele yawu ve, kuna ba lenda kufwa yandi samu na yawu. Mpe kana bakala to kento yina kele ya kukwela buta mwana ya makangu, yandi yayi, ke kota ve na kimvuka ya Mfumu, bansungi kumi na yiya. Mpe bamvula makumi yiya kele nsungi mosi. Ya fwana lunga ntete bamvula nkama yiya samu ti disumu yina kukatukila Israël.

⁷⁵ Nzambi ke yinaka disumu! Wapi mutindu beno lenda banza ti beno lenda dyata Menga ya Santu ya Mfumu Yesu, samu ti beno kele ya mwa denomination mosi, ti beno banza kukota? Beno ke kota na kuzitisaka misiku ya Nzambi to beno ke kota ata fioti ve. Mbote. Ata beto wwanda diacre, mulongi, nionso yina beto lenda wwanda, ya kele na kima ve ya kusala na yawu. Beno ke kota na kuzitisaka misiku ya Nzambi.

⁷⁶ Bansungi kumi na yiya. Muntu yina vwandaka solola na munu na yawu yandi kele ya kuvwanda awa na ntangu yayi. Yandi tubaka, “Kuna wapi mutindu beto ke zaba nani ke vuluka?”

⁷⁷ Mu tubaka, “Ya kele awa beno fwana wwanda Calviniste ya mbote.” Nkumbu ya nge kele ya kutula na kati ya Buku na ntwala ya mbatukulu ya yinza. Nzambi ke baka nzila ya menga yina. Yina me tala Yandi. Beno me mona?

“Kasi yinki ya . . .”

⁷⁸ Beno kuwa. Beno bantwenya, bubu yayi, mu zaba ve kana beno ke kwisaka na yinzo-Nzambi yayi, to kisika yina beno me katuka, beno bantwenya ya babakala mpe ya bakento. Beno zaba, yina beno ke na kusalaka, kana ya kele na nsungi yankaka, ba ke fundisa bana ya beno na yina beno ke na kusalaka? Beno kele na buzitu ve? Beno bantwenya ya bakento yina ke lwataka bakupe ya nkufi yayi ya ntama mpe bima ya mutindu yina, beno zaba, ti ya ke wwanda na zulu ya mwana ya beno ya kento. Beno zaba ti nkooko ya beno ya kento vwandaka zinga na mutindu ya yimbi, mpe ti mama ya nge vwandaka kento yina vwandaka kina na ba-bar, mpe ya kele samu na yina bubu yayi nge ke na kukinaka na kukatulaka bilele? Kieleka. Yinki bana ya nge ke wwanda? Yinga, tata. Nzambi tubaka ti Yandi ke fundisa disumu ya nkú ya bibuti na bana mpe na bana ya bana ya bawu, tii na bansungi tatu mpe yiya.

⁷⁹ Mpe beno zaba, mpangi ya munu ya bakala, konso ntangu yina beno ke salaka yina kele mbote, ti ya ke vutuka na bana ya beno?

⁸⁰ Beno tala awa, beto baka na ba-Hebreux, na kapu ya 7. Biblia ke tuba ti, ntangu—ntangu Melchisedek kwendaka kukutana na Abraham yandi yina katukaka na muzingu yina yandi nungaka bantinu, mpe sakumunaka yandi, mpe Yandi tubaka, ntangu yayi, “Levi. . .” Yandi ke na kuzonzaka na yina me tala mosi ya kumi. Yandi tubaka, “Levi kuzwaka luve ya Mfumu na kubaka mosi ya kumi na bampangi ya yandi. Mpe Levi yina kuzwaka

mosi ya kumi, futaka mosi ya kumi, samu ti yandi vwandaka dezia na menga ya nkooko ya yandi Abraham na ntangu yandi kwendaka kutana na Melchisedek.” Mpe Abraham vwandaka nkooko ya nkooko ya yandi ya bakala. Abraham butaka Isaac, Isaac butaka Jacob, Jacob butaka Levi; Levi, tata, nkooko ya bakala, nkooko ya nkooko ya bakala. “Mpe na yina Levi vwandaka na menga ya nkooko ya yandi Abraham,” Biblia ke tuba ti, “yandi futaka mosi ya kumi na Melchisedek.” Alleluia!

⁸¹ Beno bika ve muntu kutuba na beno ti konso mutindu ya mouvement yina lenda vwanda na yinza lenda kangisa ndinga ya Nzambi. Yawu ke na kulandila na kukwenda! Ba kubikaka yawu kuna na mbatukulu. Ya kele na ata mpeve ya yimpi ve to ata bampeve ya kulutila yimbi ve yina lenda kangisa manaka ya Yandi.

⁸² Na kutala, Biblia tubaka ve ti yandi futaka yawu “kaka ndambu”. Biblia ke tuba ti, “Yandi futaka mosi ya kumi,” na yina yandi vwandaka na kati ya menga ya nkooko ya nkooko ya yandi. Nkembo! Yayi kele Mfumu ya munu. Oh, Yandi zabaka yawu, na ntwala, na ntwala yinza kusalama. Yandi zabaka nionso. Mpe na kati ya Abraham, yandi futaka mosi ya kumi.

⁸³ Mpe mpangi-kento, mpangi-bakala, yinki mutindu beno lenda basika awa, kutala mutindu bantu ke na kuzinga mpe bakala yina ke tambula bisika nionso na bakento ya bantu yankaka, mpe bakento ya makwela ke na kufwa makwela, mpe kuzinga mutindu yina beno ke salaka, yinki mutindu beno lenda banza ti nsungi yina yankaka ke kwisa lendaka sala? Beno tala yinki ya kele. Ntangu yayi ya me kuma kima mosi ve kasi kaka nkonga ya bantu ya makangu, yina me butuka na muvusu, nkonga ya bantu ya muvusu. Mpe kima kaka mosi me bikana na yawu, mpe ya kele kilumbu ya bombe atomique yina beto ke na kuzinga. Ya kieleka na nionso. Beto me kuma na nsuka ya ntangu.

⁸⁴ Na suka yayi, kuna na myongo ya fioti ya Kentucky, ya vwandaka na mwana mosi ya bakala, beno lendaka ve kubelama na yandi na kitamina ya ba-metre tatu, samu ti yandi vwanda sala jus ya melasse ya sorgho. Kasi yandi zabaka kuswasikisa mbote ve yina vwandaka diboko ya kibakala to ya kento. Ntangu yandi kuwaka. . . Mu kotaka na lupangu yina ba sonikaka muntu ve lenda kota. Mu zabaka ve kisika yina mu vwandaka. Mu vwanda kaka na myongo ya fioti. Mpe mu vwanda kwenda na zulu kuna samu na kuzomba bampadi. Mpe na yina mu vwandaka na zulu kuna, mu bandaka na kutuba na yandi. Mpe mwana ya bakala yayi tubaka ti yandi ke kwenda sala kisalu ya busoda. Mpe tala, beto bandaka na kutuba na Mfumu, mpe yandi tubaka, “Mulongi, nge ke kwikila ve ti beto me kuma na ntangu ya nsuka?” Kuna na myongo.

85 Mu tubaka, “Kieleka, beto me kuma kuna. Kieleka, mwana, beto kele na ntangu ya nsuka.”

86 Beto bawu yayi. Yayi kele ngunga yina beto ke na kuzingaka, mpangi-bakala. Beto me kuma na kisika yango. Beno lenda mona ve mutindu yina bamama na ntangu ya ntama, mpe batata, mutindu bawu vwandaka zinga, mpe nkooko ya bakala mpe nkooko ya kento? Beno lenda mona ve mutindu papa mpe mama vwandaka zinga? Ata ntembe ve ti beto kele bubu yayi na kati ya muvusu. Ata ntembe ve, beno lenda longa tii yintu ke vwanda diaka ve na nsuki; bawu ke landila kaka na kulwata bakupe, mpe ke losa beno maté na kizizi. Bawu ke benda fumu mpe ke fula beno yawu, mpe ke tuba, “Beno kipe mambu ya beno.” Samu na yinki? Samu ti yina kele dikanda yina wapi bawu me basika. Mu ke kuma na yawu, ntama mingi ve, *Mbuma Ya Nioka*. Mpe beto tala kisika yina yandi me luta, kumona samu na yinki bawu ke salaka mutindu yina. Bawu kele bana ya diabulu katuka mbatukulu ya yinza. Ya kele kieleka. Mpe beto, lenda vingila kima yankaka ve, kasi kaka lusambusu kele kima yina me bikana. Kima yankaka kele diaka ve kasi lusambusu. Nzambi ke zenga bima nionso. Mpe bantu me sala yawu bawu mosi. Nzambi zolaka ti yawu kuvwanda mutindu yina ve, kasi Yandi zabaka ti yawu ke vwanda mutindu yina. Ya kele samu na yina Yandi tubaka ti yandi lendaka, “Ke vuna bayina nionso ke vwandaka na zulu ya ntoto, na nganda ya bawu yina bankumbu kele ya kutula na Buku ya Luzingu ya Mwana-dimeme na ntwala ya mbatukulu ya yinza.”

87 Beto tala yawu. Beto tanga mwa ntama ntangu yayi. Mbote, ntangu yayi mu banza ti beto kele na nzila ya 12.

Mpe bibongo kumi yina nge monaka kele bantinu kumi, yina me banda ntete ve na kuyala; kasi ke yala kaka ngunga mosi kintwadi na niama.

Bawu nionso ke na dibanza mosi, mpe ke pesa ngolo ya bawu mpe kimfumu na niama.

Mpe bawu ke nwanisa Dimeme, mpe Dimeme ke nunga bawu: samu ti yandi kele Mfumu ya mfumu, mpe Ntinu ya bantinu: mpe bawu yina kele kintwadi na yandi kele—kele bayina yandi bokilaka, soolaka, mpe bayina kele ya kukwikama.

Mpe yandi tubaka na munu, Masa yina nge monaka, sika kele kento ya kindumba, kele makanda ya bantu, . . . bankonga ya bantu, . . . bayinsi nionso, mpe bandinga.

. . . bibongo kumi yina nge me mona na zulu ya niama, bayayi ke yina kento ya kindumba, . . .

88 Beno tala yawu mbote ntangu yayi, “bibongo kumi” yayi, bimfumu kumi yayi. Beno me mona, ya kele awa ti nionso ke baka kisika, yinki kele bamfumu yayi ya nkú. Beno tala mbote

mutindu kele bamfumu ya nkú. Wapi nzila yina bawu ke na kubaka? Beno tuba na munu kaka—kaka mfumu yina ya nkú ke na kubaka ve nzila ya communisme. Beno me mona? Mpe bawu ke (sala yinki?) ke yina “kento ya kindumba,” kento, dibuundu. Kasi yinki? Beno tala mbote yina ke sala yawu.

...bawu yina ke yina kento ya kindumba, mpe ke katula yandi nionso mpe ke tula yandi kinkonga, mpe ke kudya nzutu ya yandi, mpe ke yoka yandi na tiya.

⁸⁹ Bawu ke katula kima yayi na kalati, ya kele kieleka mutindu kaka mu kele ya kutelama awa. Kana kaka beto vwandaka na ntangu ya kutala dilongi yayi ya dibuundu yango, mpe kulanda yawu na kati ya Masonuku, kisika Ya me tuba, beno tanga, “Bantinu nionso ya ntoto yayi, mpe binati-nzaza nionso, mpe nionso, nyongaka, samu ti na ngunga mosi ba me mwangisa Babylone ya nene.” Na ngunga mosi, ntangu ya yandi lungaka! Mpe, oh, mutindu Ya kele ya kutuba, “Beno yangalala, beno basantu, mpe beno nionso baprofete ya santu, samu ti Nzambi me pesa yandi kitumbu samu na menga ya basantu mpe samu na bampangi ya beno.” Beno me mona, ya kele kieleka. Kieleka ti, communisme kele kaka kisadilu na maboko ya Nzambi. Kaka mutindu mosi Ntinu Nebucadnetsar yina vwandaka kisadilu na maboko ya yandi, na yina yandi nataka ba-Juif na kimpika, ntangu bawu basikaka na nzila! . . . ? . . .

⁹⁰ Disumu lenda landila na kubebisa, mbuma ya mbote ke landila kuna na kati mpe mbuma lenda landila na kubeba, mpe kubeba mpe kubeba tii na manima ya ntangu fioti ya ke kufwa. Ya me kuma kisika yina, samu ti bamama mpe batata ya bawu mpe nionso yina me zinga mutindu yina na ntwala ya beto, mpe samu na yina, kima mosi ve me bikana samu na beto. Mpe beno zaba yina Yesu tubaka? Kana Yandi sukisaka nionso ve, ya zola vwanda ata na nsuni mosi ve yina zolaka vuluka.

⁹¹ Beno lenda mona? Beno lenda mona samu na yinki beto kele na yayi (mu ke zonza ve samu na kufundisa.) Mutindu Arthur Godfrey mpe bankaka yina, beno zaba, beno me mona, mpe Elvis Presley, mpe—mpe kukwenda na kuningisaka luketo na kutambula, ba-salopette, mpe bansuki ya kubwa na nkingu ya bawu, mpe nionso yayi, mutindu bantwenya ke na kusala? Yinki ke salaka yawu? Yinki ya kele? Samu ti bawu me basika na nkonga ya bantu ya makangu, yina me zinga ntete na bawu. Kima mosi ve me bikana! Oh, bawu ke telama mpe ke yimba, “Nzambi ya munu, pene-pene, na Nge,” mutindu Ernie yina ke bukaka ba-pois mpe bawu nionso ya mutindu yina, yina ke yimbaka nkunga, mpe nionso ya mutindu yina. Mpangi-bakala, nge zaba yinki? Ti, yina kele kaka luvunu. Yinga, tata.

⁹² Muntu yina kele na kati ya mambu ya rock-and-roll mpe na boogie-woogie mpe bima nionso ya mutindu yina kele na kisika ve na chaire. Yandi kele ata na kisika mosi ve na manima

ya chaire yayi. Yayi kele samu na banganga-Nzambi, bayina Nzambi bokilaka. Ya kele bisadi yina Nzambi bokilaka fwana vwanda na manima awa. Ya kele ve na kisika awa samu na kima ya mutindu yina. Yawu yina kele diambu bubu yayi, bawu me kumisa dibuundu kima yankaka ve kasi kimvuka mosi. Kimvuka kele mbote, kana beno zola kusala yawu, yina me tala beno. Kasi bika mu tuba na beno, ya kele na luswaswanu mingi na kumeka . . . na kati-kati ya kimvuka mpe dibuundu. Yinga, tata. Kana beno zola kusala bima yina na kimvuka, kusala mutindu nionso ya bafeti mpe nionso yina, yina me tala beno. Kasi, mpangi-bakala, dibuundu fwana vwanda ya kukombola katuka chaire tii nsi nionso. Ya kele kieleka. Mu ke na zonzaka ve na kukombola yawu na kutulaka banela ya malu-malu mpe nionso yina. Mu ke na kutubilaka reveil ya mutindu ya ntama, yina Nzambi me tinda samu na kubasisa bima yayi na bisika nionso. Yinga, tata. Ya kele mutindu kunamina mwinda, mwinda ya mundele na kikunku ya bampese yina ke na kudya kati-kati ya pomme. Yinga, tata, bawu ke kwenda bisika nionso kaka na ntangu mwinda ke pela.

⁹³ Ntangu yayi beno tala mbote, “Bawu ke na dibanza mosi, kupesa ngolo ya bawu.” Mu me kuma na nsi ya yawu ntangu yayi. “Bibongo kumi.” Yinga, ntangu yayi.

Ya kieleka ti Nzambi tulaka na bantima ya bawu luzolo ya kusadila dibanza ya yandi, (beno tala), mpe ke wisana, mpe kupesa bimfumu ya bawu na niama, tii ntangu mambu yina Nzambi tubaka ke salama.

Ntangu yayi, mpe kento yina nge me mona kele mbanza ya nene, yina ke na kuyala na zulu ya bantinu nionso ya yinza.

⁹⁴ Ntangu yayi, yawu kele ve mambu ya kumonisa mpasi, beto zaba ti yayi kele lutumu ya Katolika. Ya kele ve na nsatu ti muntu nionso . . . Mu—mu ke kwikila yawu na ngolo nionso mutindu kaka mu ke kwikila ti mu kuzwaka Mpeve-Santu. Mu ke kwikila yawu mutindu kaka mu ke kwikila ti mu kele Muklisto ya kutelama awa bubu yayi, ti lutumu ya Katolika yayi kele . . . Mbanza ya Vatican kele mbanza yina kele ya kuvwanda na zulu ya myongo sambwadi. Lutumu ya dibuundu kele kibulu yina vwandaka na moyo, yina vwandaka diaka ve na moyo. Yandi kele Babylone. Nionso ke na kumonana na mutindu ya mbote, na mutindu ya kulutula mbote na nzila ya Masonuku. Ya kele dibuundu ya Katolika.

⁹⁵ Mbote, ntangu yayi beno tala yina ke sala beno mpasi mingi. Beno ke tuba, “Mbote, nge ke na kutalisa munu mpasi ve, Mpangi Branham.” Kasi beno bika munu yufula beno diambu mosi. Beto vutukila ntangu yayi nzila ya 5.

Mpe na zulu ya yintu ya yandi vwandaka . . . kusunama, MANSWEKI, BABYLONE YA NENE,

*MAMA YA MAMBU YA BUSAFU MINGI...MAMA
YA BAKENTO YA KINDUMBA MPE YA MAMBU YA
BUSAFU MINGI NA NTOTO.*

96 Yandi vwandaka yinki? N-d-u-m-b-a. Mpe yandi vwandaka m-a-m-a. Yinki? M-a-m-a. Yandi butaka kima mosi. Mama ya bana ya babakala? Ya bakento ya kindumba! Yinki kele kento ya kindumba? Kima ya mutindu—mutindu mosi na ndumba, kento ya luzingu ya yimbi. Yinki vwanda sala luzingu ya yandi ya yimbi? Malongi ya yandi. Yandi vwanda lakisa ti yandi kele dibuundu ya Klisto, kasi vwandaka samuna dogme ya bantu. Mpe awa yandi ke tuba ti yandi kuzwaka. . . Kana yandi vwandaka organisation ya ntete, kuna ya zola kulakisa ti ya kele na bimvuka yina me basika na yandi. Yandi vwandaka mama ya bakento ya kindumba. Ya kele kieleka? Mama ya bakento ya kindumba. Ya lenda vwanda ve, ntangu yayi, mama ya bana ya babakala. Ya lenda vwanda mama ya. . . Ya fwana vwanda mama ya bakento. Mpe, kana bawu kele bakento, bawu kele mabuundu. Ntangu yayi beto tala yawu. Yinki me basika na. . .

97 Organisation ya ntete vwandaka yinki? Dibundu ya Katolika. Organisation ya zole vwandaka yinki? Luther. Organisation ya tatu vwandaka yinki? Zwingli. Ya me landila nani? Calvin. Mpe kuna me kwisa ba-Anglican, mpe na manima ya ba-Anglican me kwisa ba-Methodiste. Ba-Methodiste, ba-Methodiste me basisa yinki? Kuna me basika Alexander Campbell. Na Alexander Campbell me basika John Smith. Me basika. . . Alexander Campbell vwandaka dibuundu ya Klisto; kuna, bawu kuzwaka yiya to tanu, ya dibuundu ya Klisto mpe nionso yankaka ya ba-isme ya fioti yina basikaka kuna. Mpe kuna me kwisa dibuundu ya Baptiste, ya kuzwaka mwa balutangu mingi yina basikaka na yawu. Mpe na manima ya dibuundu ya Methodiste me kwisa. . . na manima ya dibuundu ya Methodiste, me kwisa, ya ntete yina kwisaka vwandaka ba-Methodiste ya ba-Wesleyen, mpe na manima bawu me kabana bambala yiya to tanu. Na manima bawu salaka mutindu yankaka ya Methodiste, mpe na manima bawu me kabana diaka, kuna bawu me sala ba-Methodiste ya Kimpwanza. Mpe—mpe kuna me basika ba-Nazaréen. Mpe na manima ya ba-Nazaréen ba-Pelerin de la Sainteté, mpe na manima ya ba-Pelerin de la Sainteté ya me landila. Kaka ba-isme ya fioti ya mutindu yina vwandaka basika, vwandaka landila na kubasika, ya me landila na mosi na mosi ya mwa—mwa mavala yina kuna. Mpe yinki mosi na mosi ya yawu salaka? Mpe ya yawu sukaka na Pentecote.

98 Mpe yinki Pentecote salaka? Kima kaka mosi na yina mama ya bawu salaka, bawu vutukaka mpe salaka organisation. Mpe yawu kumaka yinki? Denomination mosi. Kota na mosi ya yawu, kima ya ntete ba ke lomba na nge, “Malongi ya nge kele yinki?” Oh, bawu ke tala nge mbote-mbote, beno me mona, samu na kuzaba nani nge kele, yina nge ke kwikilaka. Mpe kana beno ke

monaka mutindu mosi ve, mpangi ya bakala, ba ke tula nge na nganda na mbala mosi. Mpe ya kele kieleka.

⁹⁹ Mpe kubanza ve ti samu nge me tuba ti nge kele muntu ya Pentecote ti nge kele na kati ya lukengolo. Mpangi-bakala, ya ke vwanda na bantu mingi ya Pentecote yina ke landa nzila mutindu mosi na mingi ke vwanda na nganda ya nzila, mu kele ya kukwikama na yawu. Beno me mona?

¹⁰⁰ Ntangu yayi, bimvuka nionso yayi, kana bawu bikaka ti lusakumunu ya Pentecote kulandana, kana bawu salaka yawu organisation mosi ve, ba zola bika yawu na ngwisani ya bampangi na bampangi mpe kubika ti Mpeve-Santu kusala nkabwani. Mpeve-Santu ke kabulaka. Ananias na Saphira kwisaka kota kilumbu mosi, bawu zonzaka *diambu mosi*; mpe Mpeve-Santu tubaka, “Samu na yinki beno me vuna?”

¹⁰¹ Kasi beto ke tubaka, “Ntangu yayi, yina kele Mpangi Jones, beno tuba kima mosi ve ya yimbi na yina me tala yandi awa, yandi kele mufuti ya nene yina ke na beto na yinzo-Nzambi. Mu zaba ti yandi kele na Mpeve-Santu; mu kuwaka yandi na tuba na bandinga ya malu-malu, mpe mu monaka yandi na kuboka na Kimpeve.” Yina kele ya kulutila ve na kulosa bankasa na nzutu yangombe ya kuyuma. Beno me mona? Ya kele na kima ve ya kusala na yawu. Nzambi kele yina ke zengaka diambu. Yandi kele yina ke zengaka kana ya kele to ya kele ve. Kieleka. Kasi beto me tala na denomination ya beto. “Mbote, beto me losa yandi na nganda ya—ya nganda ya Bimvuka, ba-Unitaire me lokota yandi. Ba-Unitaire me yamba yandi na ntangu fioti, mpe na manima bawu me losa yandi na nganda. Samu ti, bawu yambaka yandi kuna, mpe ba-Jésus Kaka me lokota yandi. Ba-Jésus Kaka me yamba yandi na ntangu fioti, mpe na manima kima yankaka yina lokotaka yandi vwandaka dibuundu ya Nzambi, bayina lokotaka yandi. Dibundu ya Nzambi ya Profesi me lokota yandi, mpe na manima kunikisa ya Tomlinson me baka yandi.” Oh, la la! Mpangi-bakala, yinki ke kwisa diaka! Nionso yina na kati ya Pentecote, reveil ya nsuka. Mpe ntangu yayi bawu me kuzwa Mulaka ya tinta ya Blue, mpe bawu me kuzwa basambidi ya mafuta, mpe na—mpe na menga na kizizi. Mpe, oh, mawa, mu zaba ve ntangu yayi wapi kisika bawu me kwenda.

¹⁰² Kaka na kima mosi, ti kima nionso me beba. Beno me zaba ti Biblia tubaka ti yawu ke beba? Beno zabaka ti Biblia zonzilaka na kilumbu yayi, ya yayi awa, na yina kaka bamesa ya Mfumu ke fuluka na biluki? Mpe tubaka, “Na nani Mu ke longa malongi? Nani Mu lenda nata na kubakula Munu? Samu ti ya kele musiku na manima ya musiku, ya kele na manima ya musiku, na manima ya ndilu na manima ya ndilu.” Na nani Yandi ke longa malongi? Bayina ba me yimina mabele, ya mama. Beno me mona?

103 Ntangu yayi, ya kele ve—ya kele ve na kento mosi, kento mosi ya yintu ngolo na mbanza yayi yina lenda buta mwana ya kento ya mwense. Yandi kele mutindu yina na mbutukulu ya yandi, mbote, mpe yandi lenda dyata mbote. Kasi kana beno sala keba ve, na yina mama ya yandi vwandaka na luzingu yina, mwana ya kento yayi, bambala yivwa na zulu ya kumi, ke sala mutindu mosi kaka mama ya yandi salaka. Ntangu yayi, beno zaba ti ya kele kieleka. Mfumu ya kento yina ke twadisaka yinzo ya nsangu ya yimbi, lenda buta mwa mwana ya kento. Na bamvula kumi na sambanu, yandi yayi lenda vwanda ya kuvedila mpe na nkadulu ya buzitu mutindu bifulu nionso, kasi, kana kaka ti yandi kulandila mutindu yina. Kasi, diambu kele ti, yandi ke vutuka mpe ke sala mutindu mama ya yandi.

104 Ntangu yayi, dibuundu ya Katolika vwandaka kento ya ntete ya ntama ya ndumba yina kwisaka na malongi yina yandi mosi salaka, balukwikilu ya luvunu, yina, Biblia ke tuba ti, “Yandi me basika na dibulu ya yinda mpe ke vutuka na nzimbusulu.” Biblia me tuba yawu. Ntangu yayi, kana bawu ke longisaka yina, ya kele luvunu. Ya kele luvunu, landila Ndinga ya Nzambi. Mpe na manima me kwisa dibuundu ya ba-Methodiste, yandi yina yandi butaka, mwana mosi ya kento ya kitoko, kasi yinki yandi me sala? Yandi me vutuka manima mpe me sala bima ya mutindu mosi yina mama ya yandi salaka. Yandi me bika ti dibuundu ya yandi kulwata bakupe. Yandi me bika bawu kunwa tabaka. Yandi me bika bawu kulandila na kusala mutindu kaka bawu fwana sala. Ya kele ve na kima ya kutuba na zulu ya yawu. Mwa pasteur ya bawu ya kizoba yina ya kuvwanda na manima kuna, kuna na manima ya chaire, kele na boma ti yandi ke kuzwa ve kilumbu mosi lufutu, to ntandu ya bisikwiti.

105 Bika mu zabisa beno kima mosi, mpangi-bakala, ya kele mbote ti mu longi Nsangu ya mbote, mpe kudyu mampa ya kuyuma mpe kunwa masa ya mpamba, mpe kutuba Kieleka na diambu yayi. Kana muntu nionso ya kimvuka ya munu kutelama mpe kukwenda na kudasuka, mu ke tubila bawu Kieleka na diambu yayi. Yinga, ya kieleka.

106 Yinki kele diambu? Oh, ya kele mutindu ya kuzwa kima ya kudyu. “Mbote, beno zaba, mu kele pasteur ya dibuundu ya kulutila nene yina kele na mbanza.” Beno ba-Baptiste mpe ba-Methodiste beno ke kuwaka profete ya luvunu. Ntangu yayi, ya kele ngolo mingi, kasi nionso yina ba ke longisa yina kele ya kuswaswana na Biblia yayi kele profete ya luvunu. Mu ke tala ve mutindu ba lenda bongisa yawu, ya kele profesi ya luvunu. Ya kieleka.

107 “Oh, nionso kele mbote kana kaka ti nkumbu ya nge kele na buku.” Nge lenda kuzwa nkumbu ya nge na babuku kumi na zole. Kana ya kele ve na kati ya Buku ya Luzingu, nge kele ya kuzimbana! Beno lenda vwanda mbote mutindu nionso

beno zola, beno lenda vwanda ya kusungama mpe ya kuvedila mutindu nionso beno zola, yina ke sala kima mosi ve.

¹⁰⁸ Esäü vwandaka mbote bambala zole kulutila na Jacob, na bumuntu, yandi vwandaka keba na kiboba ya tata ya yandi ya mpofo mpe nionso yankaka yina. Mpe Jacob vwandaka mwa muntu mosi ya luvunu yina vwandaka na lele ya mama ya yandi, mwa poule mouillée mosi. Kasi Nzambi tubaka, “Mu zola Jacob mpe me manga Esäü,” na ntwala ti bana kubutuka. Romains 8 ke tuba mutindu yina. Ya kele nionso kieleka.

¹⁰⁹ Nzambi zaba yina kele na kati ya muntu. Mpe Yandi zaba yina kele na kati ya dibuundu, mpe. Beto ke zingaka na nzila ya Dimpa ya Luzingu, Dimpa ya Ndinga ya Nzambi. Ntangu yayi, ya kele samu na yina beto kele denomination ve.

¹¹⁰ Ntangu yayi mu zola pesa beno mwa yankaka . . . mu zola kupesa beno mwa mbandu mosi yina mu notikaka awa. “Ya nene . . .” Ntangu yayi na Apocalypse, 19:2. Mu ke na kima mu sonikaka awa. Awa mu zola kutala mpe kumona yinki ya kele.

Samu ti lufundusu ya nge kele ya kieleka mpe ya kusungama: samu ti yandi me sambisa kento ya kindumba ya nene, yina vwandaka vuna bantu nionso ya ntoto na bundumba ya yandi, mpe me pesa yandi kitumbu samu na bisadi ya yandi yina yandi kufwaka.
(Yayi kele nsuka ya dibuundu ya Katolika.)

¹¹¹ Ntangu yayi, beto zola mpe ti beno tala, awa mpe, ti denomination—ti denomination beto lenda mona awa, na Masonuku ti . . . Mpe Biblia me tubila ata fioti ve na denomination. Denomination me basika na dibuundu ya Catholique. Yandi kele mama ya ntete ya denomination, mpe denomination me kulandana. Ntangu yayi, yayi ke banda na kusala mwa mpasi. Ya ke lutila na kusala mwa mpasi ntangu nionso, beno me mona. Kasi mu—mu zola ti beno kumona ti badenomination basikaka ve to Nzambi ve salaka yawu. Ya kele diabulu salaka yawu.

¹¹² Dibundu ya Nzambi kele . . . Beto kele ve ya kukabwana, beto nionso kele nzutu mosi; kivuvu mpe malongi mosi, luzolo mosi. Yina kele Dibundu ya Nzambi ya moyo. Ata, nionso yina, beto kele kintwadi mosi! Ya kele kieleka. Ata ya vwanda mpangi-bakala, ya Methodiste to ya Baptiste, kana yandi kele ya kubutuka ya mbala zole mpe ya kufuluka na Mpeve-Santu, yandi kele mpangi ya munu ya bakala. Beto ke tambula na kusimbasanaka. Kieleka. Yinga, tata. Ya ke sala ata luswaswanu ve.

¹¹³ Moïse. Ntangu yankaka mu ke tala bisika nionso mpe mu ke tuba, “Nge zaba nkonga ya bantu ya Pentecote ya bafanatique yina, Mpangi Branham, samu na yinki nge kwenda ve na nkonga ya bantu ya mutindu yina?” Beno zaba yinki? Moïse vwanda tala bana ya Israël. Yandi vwanda tala na nela

kaka mosi yina Pharaon vwanda tala. Pharaon vwanda tala bawu mutindu nkonga ya bantu yina vwandaka potama na potopototo, kasi Moise vwanda tala bawu mutindu bantu yina Nzambi soolaka. Yandi zabaka ti bawu vwandaka na nsilulu. Yinki mutindu? Yandi zabaka yawu na nzila ya Ndinga. Mpe na nzila ya lukwikilu. . . Yandi vwandaka dikulu mosi na kiti ya ntinu, yandi zola vwanda Pharaon, yinza nionso vwandaka na nsi ya makulu ya yandi, yandi zola vwanda kuna mpe ba zola tula na yinwa ya yandi vinu, mpe bakento ya kitoko tula yandi mupepe, mutindu ntinu, to mfumu ya nkú, to ntinu ya yinza, Moise ntwenya, na bamvula makumi yiya, vwandaka simba yawu na maboko ya yandi. Yandi vwanda tala nkonga ya bantu yina vwandaka potama na potopototo, kasi yandi zabaka ti yandi vwandaka mosi ya bawu. Alleluia! Ya kele yina. Yandi zabaka ti yandi vwandaka mosi ya bawu. Mpe ya kele kaka, na nzila ya lukwikilu, ti yandi soolaka!

¹¹⁴ Muntu nionso fwana sala nsodolo. Nge fwana sala nsodolo. Nge ke sala nsodolo ntangu yayi. Nge ke sala nsodolo na suka. Nge ke sala nsodolo mbasi na nkokila, kana nge vwanda moyo. Nge ke fwana sala nsodolo na ntangu mosi. Mpangi-bakala, ntama mu soolaka. Biblia yayi vwandaka buku ya munu ya bampova. Biblia yayi vwandaka Buku ya munu ya Luzingu. Biblia yayi vwandaka Ndinga ya Nzambi. Na nzila ya Biblia mu ke zingaka. Ya kele na nzila ya Biblia yayi mu ke teleminaka.

¹¹⁵ Na yina, Moise vwandaka tala bana ya Israël. Mpe yandi tubaka kaka ve, “Oh, bawu kele bantu ya mbote. Mu ke na diambu ve na bawu. Oh, ve, mu lenda zonga diambu mosi ve samu na zulu ya bawu.” Ya kele mutindu yina bantu mingi ke salaka bubu yayi. “Oh, bantu ya Pentecote yina mpe bantu yina me kuzwa Mpeve-Santu, mpe bantu yina ke kwikilaka na kubeluka ya nzutu ya Kimpeve, oh, mu—mu—mu ke na diambu ve na yawu.” Kasi Moise vwandaka mutindu yina ve. Yandi bikaka Egypte mpe kumaka mosi ya bawu. Yandi kwendaka na kati ya bampangi ya yandi. Yandi vwandaka mosi ya bawu.

¹¹⁶ Mpangi-bakala, ya kele na kisika yina mu bakaka nzila ya munu. Mu ke baka nzila na ndambu ya bantu ya Mfumu yina ba me vweza, kana bawu kele diboko mosi, ata nionso yina ya kele. Bawu ke na nsilulu, mpe mu me mona bankumbu ya bawu na kati ya Buku ya Luzingu ya Mwana-dimeme. Bawu kele bampangi ya munu. Ya kele kieleka. Sala nsodolo ya nge mpe vwanda na bawu. Na kieleka to na luvunu, vwanda kaka kuna. Kana bawu me zimbanana, sadisa bawu na kusungama. Kieleka. Ata mbala mosi ve beno lenda sala bawu mbote na kusalaka bawu yimbi. Beno me mona, beno meka na kubasisa bawu.

¹¹⁷ Charlie, ya kele mutindu mosi bawu vwanda tuba na yina me tala Mpangi Allen, samu na tiya yina bawu. . . menga na maboko. Mu tubaka, “Ata mbala mosi ve, ata mbala mosi ve mu me yinaka A. A. Allen.” Mu tubaka, “Kana mu lenda longa mutindu A. A.

Allen, mu zolaka sala ata mbala mosi ve lukutakanu ya kubeluka ya nzutu.” Ntangu yayi, samu na yina me tala kuwakana ve na menga mutindu kimbangi ya Mpeve-Santu, na maboko ya beno, mu me ndima yawu ve. Kasi samu na yina me tala kimpangi, yandi kele mpangi ya munu. Mu ke vwanda pene-pene na yandi na bitumba. Ya kele kieleka. Kana yandi sala yimbi, mu ke meka na kusadisa yandi. Mpe kana yandi me sala yimbi ve, kana ya kele munu me sala yimbi, mu zola ti yandi kusadisa munu. Mpe ya kele mutindu yina beto ke-ke wisanaka. Ntangu yayi beno tala mbote awa.

...yandi vwandaka *MANSWEKI, BABYLONE...*
MAMA YA BAKENTO YA KINDUMBA...

¹¹⁸ Ntangu yayi beno me mona mutindu dibuundu bubu yayi, bankundi, beno lenda mona mutindu bubu yayi ti mabuundu yayi ke na kuzinga kaka mutindu nionso bawu zola kuzinga? “Nionso kele mbote, kwenda na ntwala,” ngulu ke kudiaka mpangi ngulu, ba ke kipaka ve. “Benotala, na kusalaka yawu kima kele ve. Benotala, beno zola kaka kuvwanda mutindu ya ntama.” Ntangu yayi beno tala mbote malongi ya bawu. Ntangu yayi mu zola... Ntangu yayi beno tala mbote. Yina kele mavanga ya bawu. Beno me mona, ti na mwa bamvula me luta, ti dibuundu ya Katolika vwandaka kaka yandi yina ba pesaka muswa samu na kukwendaka na yinzo ya bizizi? Dibundu ya Methodiste vwanda banza ve na kima ya mutindu yina. Ba-denomination nionso, “Ve! Yina kele bisalu ya diabulu.” Mu ke na kukiyufula yinki me salama. Yinga, tata.

¹¹⁹ Mpe beno zaba, bantwenya ya bakento ya Katolika, bawu ke basika na nganda na mwa bitini yayi... (Mbote, beno biboba ya babakala yina kele ya kununa mutindu munu)... bawu bandaka na kulwata yawu bawu landaka mwatu ya mwa zulu. Mwana-bakala yina, mu banza, ti yandi kele na difelo, na nkokila yayi. Mu zaba ve. Mu kele ve zuzi ya yandi. Kasi ntangu yandi salaka mwa nkunga yina ya mambu ya nsoni yina lutaka na radio, kukondwa ti ba fiongonina yawu, kuna, “Benoningisa, bana ya bakento, benoningisa; benoningisa na nsi mpe benolakisa mikoto ya beno ya kitoko.” Bantu yikwa me bambuka moyo na yawu ntangu nkunga ya ntete yayi basikaka, bamvula me luta? Kuna yina vwandaka kuzimbana ya ntete. Ya kieleka. Mpe ntangu bawu kuzwaka muntu yayi ya Texas, mpe bawu me basisa bakento, mpe me baka binkuti ya nsi samu na kupesa bawu kutalana mosi yina vwandaka na bawu ve, mpe bima ya mutindu yina, mpe me bika bawu kulandila mutindu yina. Mpe ntangu yayi yinki ya me sala? Ya me kota. Ya kele mpeve.

¹²⁰ Bakala mosi vwanda zonza, kilumbu mosi. Yandi vwanda tuba, “Mu zaba ve yinki mu ke sala. Mu ke na mwana mosi ya mbote ya bakala, ya kusungama, mpe mwana yango ya bakala me kuma mutindu ti yandi ke baka nionso yina yandi ke simba na maboko ya yandi.”

Mu tubaka, “Samu na yinki?”

“Yandi me vukana na muyibi mosi.”

¹²¹ Kana nge tambula na muntu yina kele muyibi, nge ke kuma nge mosi muyibi. Mama ya munu ya kiboba ya Kentucky vwanda tubaka, “Kana nge lala na yimbwa yina kele na basidi, nge ke vumbuka mpe, na basidi.” Beno baka—beno baka yina kele muntu ya mbote ve, mpe beno bika. . . mwana-kento, mpe beno tula yandi na mwana mosi ya bakala ya mbote ya kusungama, mpe kima ya ntete beno zaba yandi ke vwanda ya kudasuka mutindu mwana ya yimbwa. Beno tala yawu na balweka nionso zole. Ba ke zaba beno na nzila ya bantu yina ke tambulaka na beno. Beno kabwana! “Beno basika na kati ya bawu,” Biblia me tuba, “beno kabwana!” Ya kieleka.

¹²² Kana ba-denomination ya bawu kuvutuka na kulonga mambu ya yimbi ya mutindu kubika bantu ya bawu. . . Mbote, awa kilumbu yankaka, na dibuundu mosi ya nene ya mbote ya Baptiste, ba fwanaka kubika bantu kubasika. Yandi lendaka kaka kulonga minuti makumi zole, muntu yina, samu ti pasteur zolaka kwenda na kunwa tabaka. Dibundu nionso basikaka na nganda. Bawu nionso vwandaka ya kutelama kuna na nganda na ndonga vwanda kunwa makaya, mpe bawu vutukaka diaka na kati, pasteur mpe bawu nionso. Mu kwendaka na dibuundu mosi ya Kimvuka ya bantu, ya vwandaka na bakala mosi ya kutelama, yina vwandaka ya kulwata mwela mosi ya nene ya yinda, yandi telamaka kuna, yandi tubaka, beno yekika na zulu ya chaire mutindu *yayi*, yandi vwanda zonzila felele yina yandi kuzwaka na zulu ya mongo. Ya vwandaka mambu ya mutindu yina, mpe yandi basikaka. Mpe misapi ya yandi vwandaka me kuma na tinta ya mwamba samu na mulinga ya tabaka. Yinga. Mpe vwandaka zonzila na bakento yina, babakala yina ke kwenda na kubula. . . Wapi nsaka yina bantu ya Allemagne ke bulaka na yawu, yina ba—ba ke kabulaka bakalati, beno zaba? Mu vwandaka. . . Oh, mu vwanda banza ti mu lendaka kubambuka moyo na yawu. Kimpa ya kalati, bawu zola bula kimpa ya kalati. Mu banza ti ya kele yina. Yinga, ya kele yina ba ke kabulaka. Ya kele mutindu ya kubula bakalati ya ntangu nionso. Kimpa ya kalati, na nsi ya yinzo! Oh, mawa! Lufulu ya yawu kele na kisika yina. Ya ke yitukisa ve! Yinki bawu ke na kusalaka? Mpe na manima kusala makelele na yina dibuundu ya Katolika awa na nganda ke kwendaka na bisika yayi ya Rotary mpe ke kwendaka kubula loto. Beto tala, beno bantu ya Misyonni beno mpe kele ya kubeba mutindu bawu kele, na yina yinki beno lenda tuba samu na yina? Nzungu lenda ve kuzonza na chaudron “mvindu.” Ata mbala mosi ve. Beno ke na kusalaka yawu, na manima beno ke tuba, “Mbote, mu kele Presbyterien. Mu kele Methodiste.” Nge kele kima mosi ve tii ntangu nge ke butuka mbala zole. Ya kele kieleka. Mpe na ntangu beno ke salaka yawu, beno zaba, ya kele na kima mosi na kati ya beno yina ke zonzaka na beno ti mambu

yayi kele yimbi, mpe beno ke basika na yawu na kundimaka mutindu mosi ti beno kele na zulu mingi kulutula ba-pomme tatu. Beno zaba ti ya kele Kieleka. Ya kieleka. Yinga, tata. Kima yina ke na kulandila na kukota kuna. Samu na yinki?

... *MAMA YA BAKENTO YA KINDUMBA* ...

¹²³ Mosi ya bilumbu yayi, mama ya kukula yayi ke tuba, “Nge zaba yinki? Na kuluta nionso, ya zola, beto zole kele mutindu mosi.” Mpe beno zaba yinki ke salama na manima? Kuvukana ya Mabuundu ke vukisa bawu nionso kintwadi mutindu bawu kele ntangu yayi. Mpe beno zaba yinki ke kumina mwa nkonga ya bantu ya mutindu yayi? Beno ke futa samu na yawu, bana. Ya kele nionso kieleka.

¹²⁴ Kasi beno mona mpasi ve, Mwana-dimeme ke nunga yandi. Samu ti Yandi kele Mfumu ya mfumu, mpe Ntinu ya bantinu, mpe Nzambi ke twadisa Dibuundu ya Yandi, na kisika ya denomination. Yandi ke mwangisa Mafuta ya wolo ya Mpeve-Santu na zulu ya Dibuundu. Mpangi-bakala, Tiya ke katuka na Mazulu, mpe bidimbu mpe bimangu ke monana, mutindu beno me monaka yawu ntete ve. Yinga, tata. “Beno vwanda na boma ve, nkonga ya mameme, Tata ya beno me tala ti ya ke mbote na kupesa beno Kimfumu.” Yinga, tata. “Yandi yina ke tatamana tii na nsuka!” Beno tala. Beno tatamana na kutambula na nzila. Beno bika yintu ya beno kutala na Calvaire. Biblia yayi kele kieleka. Beno vwanda na boma ve.

¹²⁵ Ntangu yayi beno tala mbote. Ya kele mutindu ya bankadulu yina kele na bawu. Mutindu ya bawu ya kuzinga. Beto lendaka landila na kutanga. Kima ya ntete beno zaba, ya me kota na mabuundu ya Misyoni. Na manima bakento ya Katolika me banda na . . . Oh, ya kele ve yimbi na kulwata mwa kupe, kana kaka ti bawu kukwenda na yinzo-Nzambi mpe kulwata mwa kitambala na zulu ya bayintu ya bawu. Mwa mutindu mosi ya kinkulu, “Beno kudya ve musuni na Kilumbu ya tanu.” Mpe, oh, wapi kisika beno monaka ti bawu lwataka kitambala na zulu ya yintu samu na kukota na dibuundu? Mu zola ti beno lakisa munu yawu na Masonuku. Ya kele profesi ya luvunu. Wapi kisika ba tubaka na dibuundu ti beno fwana kulwata yimpu na kati ya yinzo-Nzambi? Ntangu beno ke vwataka yimpu na zulu ya yintu, beno ke zitisaka ve Klisto, kieleka; mu ke na kuzonza, na babakala. Beno bakento, beno kele na mvwela, kasi mu ke tula ntembe na muntu nionso na kulakisa munu kisika ti ya kele yimpu to kitambala. Ya kele bansuki ya beno! Mpe beno me zenga yawu nionso. Ntangu yayi yinki samu na yina? Oh, bawu ke tubaka, “Yina kele ya ntama.” Kana ya kele yina, ya kele Biblia! Mpe Ndinga ya Nzambi kele kieleka.

¹²⁶ Mu vwanda tuba awa, ntama mingi ve, na kento yina sukulaka makulu ya Yesu, mpe yina bakaka bansuki ya yandi, beno zaba, mpe—mpe kusunaka yawu na yawu. Mu tubaka, “Ya

kele kaka na mutindu mosi samu ti kento kulenda kusala yawu, ya kele kuvwanda na bansuki mingi na zulu ya yintu ya yandi samu na kusukula makulu ya Yandi, kukusuna yawu.” Ya kele kieleka. Oh, ya kele, ya kele nsoni na kumona mutindu. . . Beno tala, na ntangu ya madidi ya ngolo, bawu ke tambula bisika nionso na mwa lele ya madidi ya nkufi mutindu yayi, mpe nzutu ya bawu ya kinkonga ke na kumonana.

¹²⁷ Ntangu yayi beno ke tubaka, “Samu na yinki nge ke na kunganina bakento?” Ba fwana nganina beno.

¹²⁸ Mpe beno babakala yina ke bikaka bakento ya beno kusala mutindu yina, mpangi-bakala, mu—mu zaba ve yinki mu lenda banza samu na beno. Ntangu yayi, ya kele kieleka.

¹²⁹ Mpe beno ba-pasteur, mu zaba ve kana beno kele awa. Kasi kana beno mona muntu yina, beno tuba na yandi na kwisa, beno tuba na yandi, na kumona munu. Beno me mona? Kana yandi kele diaka ve na buzitu na Klisto samu na kubika kimvuka ya yandi kulandila na yina kukondwa. . . Ntangu yayi yandi. . . Bawu lenda sala yawu na nganda kuna na manima ya yandi, kasi kana yandi tubila bawu yawu ve, yandi kele ve kisadi ya kulunga samu na Yesu Klisto. Ya kele nionso kieleka. Yandi kele ve ya kulunga na kuvwanda kisadi ya Klisto. Kisadi ya Klisto lenda vwanda ve na boma kana ya kele samu na Biblia ti yandi ke na kunwana. Kieleka. Kasi bawu yina kuna, bawu ke basika mpe bawu ke sala yawu.

¹³⁰ Mpe na manima, kima ya ntete beno zaba, bantu ya Misyoni me banda na kusala mutindu mosi. Beno bantu ya mbote ya ba-Methodiste, mpe beno ba-Baptiste, mpe beno ba-Presbyterien, to ba-Nazaréen, ba-Pelerin de la Sainteté, mpe beno nionso, kima kaka mosi, beno me kwenda kota mbala mosi, sambanu na mosi, mpe ndambu na kumi na zole na yankaka. Beno bawu yayi ya kele, “Mama ya bakento ya kindumba.” Denomination ya beno, “Katuka ntangu yina bawu bandaka yawu na kimfumu kuna, wapi luswaswanu yina yawu me sala?” Beno me mona? Ya ke sala luswaswanu mingi. Ba me banda yawu ata mbala mosi ve, na Quartier général *yina*. Ya lenda banda na kimfumu ya beno ya nsi awa, kasi na Mosi yina kele na Zulu kuna ve. Ya me tadila kisika yina beno katukaka. Ya kele kieleka.

¹³¹ Ntangu yayi, mu banza ve ti beno kele na ntangu samu na kubaka yayi yankaka, mu banza ti ya ke vwanda mbote samu mu bika yawu samu na mbasi na suka. Mbote, bika beto baka kaka ya mwa nkufi yayi. Beto kele, awa, “na mbotika na kati ya masa.” Beto kele mpe “na luzabu ya ntete,” mpe, oh, bima mingi. Na yina bika beto baka kaka yayi, yayi, ya mwa nkufi ya “bakento yina ke longaka,” mpe kubaka yayi.

¹³² Ntangu yayi, ntangu yayi, nge yina kele kento yina ke longaka, mu zola ve kunyongisa mutindu ya nge ya kutala, kasi mu zola kutuba na nge diambu mosi. Nge kele na ata fioti ve ya

Masonuku, ata mosi ve na kati ya Biblia. Yinga, mu zaba kisika yina beno me telama, mpe nionso yina beno lakisaka munu yawu, yinga, “Mpe bana ya beno ya babakala mpe ya bakento ke pesa profesi.” Ntangu yayi, kana pasteur ya beno zaba ve yinki nkumbu yayi “kupesa profesi” zola tuba, yandi—yandi zaba kima mosi ve. Yandi ke na kima ve ya kusala na manima ya chaire, na kumekaka na kutuba na beno na kuvwanda mulongi. Beno me mona? Samu ti yayi, na nionso, ya ke fundisa kubanda na Genèse tii na Apocalypse. Ntangu yayi bika ti mu lakisa beno yayi, beno me mona.

¹³³ Ntangu yayi mu zola ti beno baka na munu na Timothée ya Ntete 2:11. Beno baka yawu mpe beto ke zaba yinki ya kele yayi ntangu yayi, mpe beto ke kuzwa yawu awa, mpe, na kati ya Actes 2 ya beno. Yinga. Mpe beno kuwa kaka—kaka awa yina Masonuku me tuba samu na diambu yina.

¹³⁴ Awa, muntu mosi vwandaka tuba ntangu nionso, “Mbote, Mpangi Branham, nge kele kaka kiboba yina ke yinaka bakento.” Mu kele ve muntu yina ke yinaka bakento. Mu kele. . . Mu ke zolaka ve kumona bakento kumeka kubaka kisika yina kele ya bawu ve.

Beno lenda bambuka moyo na Howard na Kisika yina ba ke yidikaka bamasuwa awa, mosi ya bisika yina ba ke yidikaka bamasuwa yina me kwenda ntama na ntwala yina kele na Nzadi ya Ohio? Bawu pesaka lutwadusu na kento. Beno tala yina salamaka.

Bawu me pesa muswa na bakento na kwenda sala voti. Beno tala yina salamaka.

¹³⁵ Bika mu tuba na beno kima mosi. Mu ke bulaka kaka na zulu ya bakento ve. Mu zola ti babakala kubakula ti bawu kele na kati ya yayi mpe. Kasi beno bika munu kutuba kima mosi na beno, mpangi-bakala. Yinsi yayi kele yinsi ya kento. Mu ke lakisa beno yawu, na nzila ya Masonuku, na nzila ya nionso yina beno zola ti ba lakisa beno yawu. Yayi kele. . . Yinki kizizi kele na zulu ya mbongo ya beto? Kento. Yinki kisika beto ke kuzwa yandi? Na Apocalypse, awa, beno ke mona yandi. Lutangu ya yandi kele kumi na tatu, diaka, nionso yina yandi me banda; bambwetete kumi na tatu, bansinga kumi na tatu, bakoloni kumi na tatu. Kumi na tatu, nionso vwandaka kumi na tatu, na kubanda. Yandi ke na kumonana na kapu ya 13 ya Apocalypse. Kento, kumi na tatu!

¹³⁶ Mpe na mvula ya 1933, ntangu Mfumu. . . Na yina beto vwandaka na balukutakanu awa kisika dibuundu yina ya Klisto me kuma ntangu yayi, na yinzo ya ntama ya bantu ya Francmaçon, vision ya Mfumu kwisaka na munu kuna mpe zabisaka na ntwala ti “Allemagne ke telama mpe ke tunga kuna Ndilu ya Maginot.” Mingi ya beno me bambuka na yawu. Mpe mutindu ya zola vwanda ya kusimba mbote na kati kuna, mpe ti bantu ya

Amerika zolaka mona mpasi mingi kaka kuna na ndilu yango. Mpe Yandi tubaka diaka yinki zolaka salama, mpe yina me tala Roosevelt mpe nionso yina, mutindu yandi zolaka luta mfumu ya mbala ya yiya. Ya salamaka mbote-mbote, mutindu kaka ya zolaka salama. Mpe Yandi tubaka diaka ti matoma ke landila diaka na kukuma mutindu diki, na yina ti na bilumbu ya nsuka yawu ke vwanda na mutindu ya diki. Mpe mu tubaka, “Ya ke vwanda na ntangu mosi ti matoma yayi ke vwanda ve na volant. Ya ke vwanda kima mosi yankaka samu na kunata yawu.” Ya kele matoma yina bawu ke na kubasisaka ntangu yayi, yina ba ke na kutwadisa na ntama, samu na nkebolo. Kieleka. Beno lenda ve kukota na mbanza . . . Kuna, na kizunga ya ba-kilometre makumi tatu na ngunga mosi, beno ke nata kaka na kati ya ba-kilometre makumi tatu na ngunga mosi. Beno lenda ve kututa ditoma yankaka, samu ti ya kele ya kutwadisa na ntama. Beno me mona, ya ke na kukwendila mutindu yina, ntangu yayi. Mpe mu tubaka, “Beno bambuka moyo, na kilumbu yina, na ntwala ntangu ya nsuka kukwisa, na ntwala ntangu ya nsuka kukwisa, ti kento . . . Ntangu yayi, beno nionso sonika mpe bumba yayi. Ya ke vwanda na kento mosi ya nene, ya lulendo yina ke telama, yandi ke vwanda keba ve Mfumu ya luyalu, to mfumu ya nkú, to kento mosi ya nene ya lulendo awa na Etats-Unis. Mpe yawu ke diama, na nsi ya lutumu ya bakento. Ntangu yayi, beno bambuka moyo ti, ya kele **MUTINDU ME TUBA MFUMU.**” Beno me mona?

¹³⁷ Yandi kele na kati ya luvunu. Mpe yawu me fungula nzila na yinki? Bika mu tuba na beno. Beno vwanda bantu ya kimpeve. Bika . . . Beno kuwa. Beno tala. Samu na yinki ya ke na kusalamaka mutindu yina? Samu na kupesa dibuundu ya Katolika kisika ya kukota. Beno me mona? Beno ke kembilaka ba-star ya cinema mpe bima nionso yankaka yina. Beno me bambuka moyo na dilongi yina mu longaka? Margot, nge me bambuka moyo na yawu, na bamvula me luta, na dilongi kubaka Etats-Unis na kingolo-ngolo, kubalula luyalu ya Amerika. Mpe mutindu mu tubaka ti yawu basikaka kuna na Paris na manima ya yina beno kwendaka basisa bawu kuna na kento yina, vinu mpe buyala. Mpe yawu me kwisa na Hollywood. Ntangu yayi, na kisika ti beto kwenda na Paris na kuzwa ba-model, ya kele bawu ke na kwisaka awa samu na kuzwa ba-model. Yinki ya me sala? Ya fwana . . . Beto vwanda bika ve bana ya beno kukwenda na yinzo ya bizizi, kasi ya me kota na television, mpe kuna yawu me landila na kusala mpe me sambukisa nionso, yawu me bebisa nionso. Mpe beto kele awa bubu yayi, mwa bana nionso ya bakento mpe ya babakala, bawu nionso me kuma mutindu ba-acteur ya televizyo yayi. Yinki ya kele? Ya ke na kusalaka nzila. Mwana, kento ya luzingu ya yimbi lenda fidisa bantu mingi na difelo kulutila banganda nionso yina beno lenda tula na mbanza. Ya kele kieleka. Beno tala yandi kutambula na nzila na bilele nionso ya nkufi, ke kipe ve yinki kele bakala, kana yandi kele bakala ya kulunga yina kele na mavimpi ya mbote, ntangu yandi

ke tala kento kima mosi ke salama na kati ya yandi. Ntangu yayi beno vwanda ya kudedama. Mu ke kipe ve. . .

¹³⁸ Mu ke na Mpeve-Santu kubanda bamvula mingi. Beno lenda kutala ve kento yina me lwata bilele ya nkufi. . . Mu—mu ke na kulunsi mosi ya fioti na kati ya ditoma ya munu, mingi kati ya beno me monaka yawu. Muntu mosi tubaka na munu, “Nge kele muntu ya Katolika?” Wapi kisika bantu ya Katolika kuzwaka dibanza ya kulunsi? Kulunsi zola tuba “Muklisto.”

¹³⁹ Mwa Santu Cecile ya bawu ya ntama yina mpe bima ya mutindu yina kele kidimbu ya malongi ya Katolika. Beto ke kwikilaka ve na mwa bima ya mutindu yina. Beto ke kwikilaka na Klisto. Bawu ke kembilaka bantu ya mutindu nionso ya kufwa. Ya kele mutindu mosi ya nene ya kuzonza na bantu ya kufwa. Ya kele nionso yina ya kele, kukembila bantu ya kufwa. Ata kima mosi ve ya kieleka kele na yawu, ata mosi ve.

¹⁴⁰ Mu yufulaka nganga-Nzambi yango. Mu tubaka, “Na yina, samu na yinki, kana. . . Pierre vwandaka pape ya ntete?”

Yandi tubaka, “Ya kele mutindu yina.”

¹⁴¹ Mu tubaka, “Na yina samu na yinki Pierre tubaka ti, ‘Ya kele ve na mvukisi yankaka na kati-kati ya Nzambi na muntu kasi Yesu Klisto Muntu?’ Mpe beno kele na mafunda tanu ya bakento ya kufwa, mpe nionso yankaka yina, beno me kumisa bawu mivukisi. Ntangu yayi yinki me salama?” Beno bawu yayi. Bawu ke na mvutu na yawu ve. Ya kele kieleka.

¹⁴² Ntangu yayi malongi ya bawu yankaka, ya malongi ya bawu ya luvunu, nkonga mosi ya baprofete ya Misyoni ya luvunu me kwisa mpe me longa yawu, mpe beno ba-Protestant ke na kundimaka yawu. Ya kele kieleka. Ba-denomination mpe mitindu ya bambotika, mpe bantumunu ya mutindu nionso mpe nionso yina beno ke salaka, yina kele ata mbala mosi ve na kati ya Masonuku. Ya kele na kiwisa ve na yawu, na kati ya Masonuku, kasi beno ke fukama na ntwala ya nionso yina. Ya kele kieleka.

¹⁴³ Ntangu yayi beno kuwa na yayi yina me tala bakento yina ke longaka. Mbote mingi. Timothée ya Ntete, mu zola kubaka Timothée ya Ntete 2:11. Ntangu yayi beno kuwa yinki Yawu me tuba awa.

Na ntangu ya ndongosolo, bakento ya beno fwana kuvwanda swi mpe kuwa na luzitu.

Mu ke na kupesa ve bakento muswa ya kulonga, to ya kuyala babakala, kasi bawu fwana kuvwanda swi.

¹⁴⁴ Mu kele ve mfumu yina tulaka yawu na kati awa. Kisalu ya munu kele kutuba na beno ti ya kele na kati awa. Beno me mona? Beno me mona?

Na ntangu ya ndongosolo, bakento ya beno fwana kuvwanda swi mpe kuvwanda na buzitu. (Kana beno

me kwendaka na dibuundu ya Orthodoxe mpe beno me talaka bawu mbote, beno me mona. Beno me mona?)

Mu ke na kupesa ve bakento muswa ya kulonga, to ya kuyala (na kuvwanda pasteur, diakre, to kima ya mutindu yina) babakala, beno me mona, yala babakala, kasi bawu fwana kuvwanda swi.

Samu ti Adam vwandaka ya ntete yina ba salaka, mpe Eve na manima.

¹⁴⁵ Beno zabaka yawu? Ntangu yayi beno kuwa, beno bakento. Beno Miklisto ya mbote ya kusungama ya bakento, beno kele kima ya kulutila mbote yina Nzambi lendaka pesa na bakala, to Yandi zolaka pesa yandi kima yankaka. Yinga, tata. Beno me mona? Kento vwandaka ve na lugangu ya ntete. Kento kele ve kigangwa yina Nzambi salaka. Yandi kele kigangwa na nzila ya bakala. Nzambi yidikaka bakala, mbala mosi bakala mpe kento. Mpe Yandi kabulaka bawu. Mpe na manima yina bakala vwandaka zinga dezia na zulu ya ntoto mpe yandi vwandaka me pesa baniama bankumbu, mpe yandi zingaka awa ntangu mingi, Yandi bakaka mpanzi mosi na lweka ya Adam, mutindu kigangwa na nzila ya bakala, mpe me sala kento na yawu. “Adam vwandaka ya ntete yina ba salaka, mpe Eve na manima.” Ntangu yayi beno tala mbote.

Mpe Adam vunamaka ve, kasi kento vunamaka mpe mangaka na kutumama.

¹⁴⁶ Nzambi bakaka bakala. Diabulu bakaka kento. Beno tala yawu, na ntwala ya beno, yina ya ke na kusala bubu yayi. Beno tala Dibundu ya kieleka ya Nzambi, bawu ke tuba, “Yesu!” Mbeni ya Klisto ke tuba, “Marie!” Beno tala mbote bampeve ya bawu. Beno me mona? Bawu yayi. “Mbote na nge Marie, mama ya Nzambi, nge kele ya kusakumuka kulutila bakento nionso, mpe sambila samu na beto basumuki, ntangu yayi mpe tii na kilumbu ya beto ya lufwa. Amen. Marie, beno sambila!” Oh, la la, mawa! Beno me mona, yawu yayi, “kento,” muntu ya diabulu. Klisto, kima ya kusambila, mpe kaka Yandi! Yawu yayi. Yawu yayi.

¹⁴⁷ “Adam vwandaka ya ntete yina ba salaka, mpe na manima Eve.” Adam vunamaka ve. Mpe wapi mutindu beno lenda kuzwa pasteur, diacre ya kento? Adam vunamaka ve, kasi kento vunamaka. Yandi vwandaka na kutala. . . Yandi vwandaka banza ve ti yandi vwandaka na kifu, kasi yandi vwandaka na kati. “Kento vunamaka mpe mangaka na kutumama.” Samu ti, yandi, ntangu nionso yina luzikulu ke lutaka na nzila, kento me sala ti yawu kusalama. Ntangu nionso mwana ya fioti ke dilaka, kento me sala ti yawu kusalama. Ntangu nionso muntu ke kufwaka, kento me sala ti yawu kusalama. Konso nsuki ya mpempe, kento me sala ti yawu kusalama. Nionso, mpe lufwa, kento me sala ti yawu kusalama. Nionso yina kele luvunu, kento

me sala ti yawu kusalama. Mpe kuna kutula yandi na yintu ya dibuundu, mutindu pasteur, oh, bantangu yankaka mutindu évêque. Nsoni samu na yandi.

¹⁴⁸ Ntangu yayi bika mu nata beno na yayi, na yankaka, na mwa minuti. Beno me mona? Ntangu yayi bika beto baka Corinthiens ya Ntete 14:32 kuna, mpe kumona yinki Paul me tuba awa, mpe na manima beto ke baka diaka bayankaka, na mwa minuti. Mpe na yina beto zola ve kusimba beno ntangu mingi, samu ti beno ke vwanda ya kulemba mingi ti mbasi na suka beno ke kuka ve na kukwisa diaka. Mbote mingi. Mu zola kutanga. Bantu yikwa ke kwikilaka ti Paul vwandaka mulongisi mosi yina vwandaka kuzwa lutwadusu ya kimpeve? Ntangu yayi, beno bambuka moyo, Paul sonikaka yayi mpe na Timothée. Beno me mona? Na yina, ntangu yayi, Corinthiens ya Ntete 14:32. Ntangu yayi beto banda awa, mpe kubanda na kutanga awa, 14:34, mu banza.

Bakento fwana kuvwanda swi na kati ya mabuundu.

¹⁴⁹ Beno me kuwa yina yandi me tuba?

*Bakento fwana kuvwanda swi na kati ya mabuundu:
Samu ti bawu kele ve na muswa ya kutuba; mpe bawu
fwana kutumama . . .*

¹⁵⁰ Beno kele na banoti na lweka ya yawu kuna? Kana beno kele na yawu, beno tala yawu mpe beno mona kana ya ke nata beno ve na Genèse 3:16. Ntangu Nzambi tubaka na Eve, na yina yandi kuwaka nyoka na kisika ya bakala ya yandi, ti yandi yayi ke yala na zulu ya yandi na bilumbu ya luzingu ya yandi nionso. Wapi mutindu kento lendaka kwisa mpe kuyala na zulu ya bakala, kuvwanda pasteur to diakre, na yina Biblia me tuba ti yandi fwana kuvwanda ya “kutumama,” mutindu kaka yawu vwandaka na mbatukulu? Ntangu Yandi . . . Nzambi—Nzambi lenda soba ve. Beno lenda ve kusala Ndinga kutuba kima yayi mpe kima yankaka awa. Ya ke simba ve. Ya kele kima ya mutindu mosi ntangu nionso.

¹⁵¹ Na yina, na mbatukulu, ya kele kisika yina, na ntwala mu manisa, kana mu lenda kuzwa siansi, mu zola kusungika samu na beno yina me tala *Makwela mpe Kufwa-makwela*. Ata mbala mosi ve mu me salaka yawu ntete na dibuundu yayi. Beno tala mbote ngwisani ya bambala zole yayi. Mosi ke tuba ti kento lenda kwelana; yankaka ke tuba ti bawu lenda kwelana ve; mpe yandi yayi ke tuba yayi, yina, to kima yankaka. Beno vingila fioti mpe beno ke mona yinki Biblia me tuba, ntangu beto ke kuma kuna. Beno me mona? Mbote mingi. Ntangu yayi beno tala mbote awa.

*Bakento fwana kuvwanda swi na kati ya
dibuundu: . . .ba me pesa bawu ve muswa ya kutuba;
mpe bawu fwana kutumama mutindu misiku ke
tumisaka.*

¹⁵² Mbote, na Ngwisani ya Ntama, bawu vwandaka ve na muswa ya kuzonza, samu ti Paul ke na kutubaka yawu awa. Ya kele kieleka? “Bakento fwana kuvwanda swi. Ya kele kutumama.” Ntangu yayi kana beno lenda tala banoti yina kele kuna na lweka, ya ke vutula beno na Genèse 3:16. Beno me mona? Mbote mingi. “Na nsi, mutindu na nsi ya misiku.”

Mpe kana bawu...kulonguka diambu mosi, bika bawu...kuyufula—kuyufula babakala ya bawu... yinzo: samu ti ya kele nsoni samu na kento na kuzonza na kati ya yinzo-Nzambi.

Yinki? . . .

¹⁵³ Ntangu yayi beno tala kidimbu ya kiuvu yina kele na mosi na mosi ya Babiblia ya beno, na manima ya, “Yinki?” Samu na yinki Paul me tuba yawu mpe samu na yinki yandi me sala mutindu yina? Mbote, kana beno lenda kuzwa mikanda yina bantu ya Corinthe sonikaka na Paul. Na kutala, beno lenda kuzwa yawu na konso yinzo ya babuku, beno me mona, ti bantu ya Corinthe sonikaka na Paul. Bawu sonikaka na yandi mpe tubaka, na manima bakento yina sobaka nkadulu. . . Bawu vwandaka na nzambi kuna, yina bawu vwandaka bokila “Diane.” Mpe yandi vwandaka Ephèse, mpe. Mpe bantu ya Corinthe vwandaka sambila yandi mpe, samu ti ya vwandaka kusambila ya mimpani. Mpe kilumbu mosi kuna na bilanga, bawu talaka ditadi mosi yina vwandaka mutindu kento. Bawu tubaka, “Nzambi kele kento, mpe yandi me bwisisa kifwanisi ya yandi na beto.” Mpe tempelo ya bawu vwandaka kitoko mingi kulutila tempelo ya Salomon, landila yina me tuba, bantu ya masolo. Oh, ya vwandaka nionso ya kutunga na matadi ya kitoko, yina ba me bongisa na wolo; na kisika, tempelo ya Salomon vwandaka ya kutunga na yinti ya cedre, yina ba bongisaka na wolo. Beno me mona? Mpe yawu vwandaka kitoko mingi kulutila yawu. Mpe, kuna, kana Nzambi vwandaka kento, na yina, kieleka, yandi zolaka vwandaka na banganga-nzambi ya bakento. Kieleka, kana Nzambi kele kento, kuna mulongi ya kento kele ya kulunga. Kasi, Nzambi kele Bakala. Biblia me tuba ti Yandi kele Bakala, mpe Yandi kele Bakala. Beno me mona? Mpe kana Nzambi vwandaka Bakala, kuna ya fwana vwanda bakala.

Ntangu yayi beno tala awa, “Yinki?”

¹⁵⁴ Na kutala, bayankaka ya banganga-nzambi yayi ya bakento, ntangu bawu sobaka kimumpani na Kimuklisto, bawu banzaka ti bawu lendaka landila na kisalu ya bawu ya kulonga, kusoba kaka lweka mpe yimeni. Kana bawu vwandaka longa kuna samu na Diane, bawu ke kwisa awa mpe ke longa na Klisto.

¹⁵⁵ Yandi tubaka, “Yinki? Ndinga ya Nzambi katukaka. . .” Beno kuwa Yayi. Mpangi-bakala, wapi mutindu bisadi ya Nzambi lendaka sala yayi? Nzila ya 36.

Yinki? Ndinga ya Nzambi katukaka na sika ya beno? to kaka na beno yawu kumaka?

Kana muntu banza ti yandi kele profete, to muntu ya kimpeve (ya fwana vwanda kaka ve profete; kasi muntu nionso yina kele na dibanza ya kimpeve), yandi fwana kuzaba ti mambu yina mu ke na kusonikina beno kele lutumu ya Mfumu. (Benó me kwikila yawu?)

Kasi kana yandi, kana muntu ndima yawu ve, beno bika yandi kundima yawu kaka ve.

¹⁵⁶ Ntangu yayi, yayi kele mutindu yina mu zaba kulakisa yawu pwelele. Benó me mona? Yandi tubaka, “Kana muntu kele muntu ya kimpeve, to profete, yandi ke zaba ti yina mu ke na kusonikaka awa kele Bantumunu ya Mfumu.” Kasi yandi tubaka, “Kana yandi—kana yandi zola ve kundima yawu, beno bika kaka yandi kundima yawu ve.” Benó me mona? Yawu yina kaka beno lenda sala. Kana bawu zola kulandila yawu, beno fwana kaka kubika bawu kulandila yawu, samu ti yandi monaka yawu kubanda kuna.

¹⁵⁷ Mpe kento mosi tubaka na munu, yandi tubaka, “Oh, Paul vwandaka kaka kiboba mosi yina vwanda yinaka bakento.”

¹⁵⁸ Yandi vwanda yinaka bakento ve. Benó zaba, Paul vwandaka ntumwa, mpe ya Dibundu ya Makanda. Benó tala awa. Benó zabaka ti Paul. . . Bantu yikwa ke kwikila ti yayi kele yina Paul longaka? Kieleka ya kele yina yandi—yandi tubaka awa? Mpe Paul tubaka. . .

¹⁵⁹ Benó ke tuba, “Mbote, vingila fioti awa, Mpangi Branham. Minuti fioti! Ntangu yayi, évêque ya beto ke tubaka ti ya kele ya kulunga. Kuluntu ya beto ya nene, ya Bimvuka, ke tubaka ti ya kele ya kulunga. Évêque ya ba-Unitaire ke tubaka ti ya kele ya kulunga.”

¹⁶⁰ Mu ke kipe ve yina bawu ke tubaka. Ya kele luvunu! Mpe mu zonzaka na beno ti beto ke kotisa yawu mingi. Mpe ya kele baprofete ya luvunu yina ke tuba mutindu yina. Na kieleka Biblia ke tuba, “Kana muntu mosi ke banza ti yandi kele muntu ya kimpeve, to profete, yandi fwana zaba ti yina mu me tuba kele Bantumunu ya Mfumu.” Mpe kana mpeve ya yandi ke pesa kimbangi na Ndinga yango ve, yandi kele profete ya luvunu, na kubanda. Ya ke vwanda mbote ti mu vwanda yina ke yinaka bakento na kisika ya yina ke zolaka bakento, na kubika kima ya mutindu yayi, kulakisa kima ya mutindu yina na Dibundu ya Nzambi, bima ya kuswaswana na bantumunu ya Nzambi. Mpe Paul tubaka. . . Benó baka Galates 1:8. Paul tubaka, “Kana Wanzio me katuka na Zulu kulonga nsangu ya mbote yankaka na nganda ya yina mu longaka na beno, bika ti yandi vwanda ya kusingama.” Ntangu yayi yinki beno ke sala na Yayi?

¹⁶¹ Ntangu yayi beno ke tuba, “Yinki nge ke tuba na kisika yina Yawu me tuba, ‘Bana ya beno ya babakala mpe ya bakento ke

pesa profesi,' na Joël, mpe—mpe kisika yina Pierre zonzaka na Kilumbu ya Pentecote?” Ya kele nionso kieleka.

¹⁶² Beno me zaba ti, na Ngwisani ya Ntama, ti nzila vwandaka kaka mosi, mpe ti ya kele kaka na nzila mosi ntangu yayi, ti muntu nionso lenda kota na kati ya ngwisani, na nzila, na nzila . . . Abraham vwandaka yandi yina ba pesaka nsilulu, mpe kidimbu ya nsilulu vwandaka na nzila ya nzengolo ya kibakala. Bantu yikwa zaba yawu? Yina vwandaka kusingisa ya Nzambi.

¹⁶³ Mutindu mpangi mosi ya Baptiste, yandi tubaka, “Mpangi Branham, tala, beto ba-Baptiste beto kuzwaka Mpeve-Santu.”

Mu tubaka, “Wapi ntangu beno kuzwaka Yawu?”

Yandi tubaka, “Na ngunga yina beto kwikilaka.”

¹⁶⁴ Mu tubaka, “Paul tubaka, ‘Beno kuzwaka Mpeve-Santu ntangu beno kwikilaka?’” Beno me mona? Mu tubaka, “Ntangu yayi, beno ba-Baptiste beno kwisa kuzwa ndambu ya Yawu, mpe beto na beno ke zonzila nkebolo ya Seko.” Mu tubaka, “Kasi, mbote, wapi kisika beno lenda kuzwa Yawu mutindu yina?” Beno me mona?

¹⁶⁵ Yandi tubaka, “Beno kuzwaka Yawu *ntangu* beno kwikilaka?” Bawu vwandaka bakwikidi, mpe bayina vwandaka boka mpe bayina vwandaka na nsayi mingi mpe nionso yankaka yina. Kasi bawu kuzwaka ntete ve Mpeve-Santu. Paul tubaka ti bawu kuzwaka yawu ve. Beno me mona? “Beno kuzwaka Mpeve-Santu ntangu beno kwikilaka?”

Bawu tubaka, “Beto zaba ve ti ya kele na kima mutindu Mpeve-Santu.”

Yandi tubaka, “Na yina wapi mutindu ba botikaka beno?”

¹⁶⁶ Bawu tubaka, “Beto kuzwaka mbotika.” Kasi, na luvunu, beno me mona. Na yina yandi lungaka kubotama mbala mosi, diaka. Mbote mingi.

¹⁶⁷ Ntangu yayi beno tala yayi awa, ti bakento yango yina ke longaka, ntangu bawu kwisaka, bawu banzaka ti bawu ke yala. Kasi ata mbala mosi ve Nzambi pesaka muswa ya kusala mutindu yina. Mpe kubika . . . na yina kaka beto ke na kutubila mambu yayi awa, ya bankento yayi, beno me mona. Mpe, ya kele awa, yandi tubaka, “Kana ya kele na muntu na kati ya beno, yina kele muntu ya kimpeve, to profete, yandi fwana kuzaba ti yina mu ke na kusonika kele Bantumunu ya Mfumu. Kasi kana yandi ke na kundima yawu ve, beno bika kaka yandi kundima yawu ve.” Mpe ya kele samu na yina . . . tabernacle yayi ke simbidilaka ve mpe ke tumbikaka ve bakento yina ke longaka, ba-diacre ya bakento, to nionso ya mutindu ya kusalu samu na kento na kusala na dibuundu yayi, ya kele samu na Masonuku yayi yina kele awa mpe ya kele pwelele.

¹⁶⁸ Ntangu yayi, Biblia tubaka, “Bana ya beno ya babakala mpe ya bakento ke pesa profesi.” Ntangu yayi, yinki zola kutuba

mpova *kupesa profesi*? Beno sosa yawu. Ya kele “kutuba diambu mosi, na lutwadusu ya kimpeve,” to “kutuba diambu na ntwala.” Ya kele mpova mosi ya kimvuka ya bampova.

¹⁶⁹ Kaka mutindu mosi na *kusantisa* ya zola kutuba kuvwanda “ya kuvedila, mpe yina ba me tula na lweka samu na kosalu.” Beno me mona? To, ya kele mpova mosi ya kimvuka ya bampova, yina zola kutuba mambu mingi, mutindu beto kele na yawu mingi awa na Kingelesi.

¹⁷⁰ Mutindu, beto lenda tuba mpova “board” [na kingelesi—Mu.]. Mbote, yinki *board* lendaka tuba? Beno ke tuba, “Mbote, ya zolaka tuba ti yandi me *futa mbongo* ya yandi” [na kingelesi: *board*]. “Ve, ata mbala mosi ve. Yandi zolaka tuba ti yandi me *tobula* [na kingelesi: *bored*] dibulu”. “Ve, ata mbala mosi ve. Yandi zolaka tuba ti yandi me *lembisa* yandi” [na kingelesi: *bored*]. To, beno me mona, ya kele kaka mpova, nge fwana zaba yina ba ke na kutubaka. Beno me mona?

¹⁷¹ Mpe ya kele mutindu mosi na mpova yayi ya kimvuka ya bampova, na kisika, “Bana ya beno ya babakala mpe ya bakento ke pesa profesi.” Ntangu yayi, nzila kaka mosi yina Nzambi . . .

¹⁷² Muntu ya Baptiste yango tubaka, “Mbote, beto kuzwaka Mpeve-Santu.” Mu tubaka . . . “Kuna ntangu beto kwikilaka yawu.” Mu tubaka . . . Awa, beno me mona, yandi tubaka, “Nzambi pesaka Abraham . . .” Yandi tubaka, “Abraham kwikilaka na Nzambi.” Ya kele mutindu yina yandi lakisaka yawu. Yandi tubaka, “Abraham kwikilaka na Nzambi mpe vwandaka ya kundima samu na kudedama ya yandi.” Bantu yikwa zaba ti ya kele kieleka? Ntangu yayi beno tala mbote yinki mutindu—yinki mutindu Satana na malembe lenda kotisa yawu na mpangi-bakala mosi. Beno me mona, kaka na mutindu ya malembe. Ntangu yayi, yayi kele Masonuku.

¹⁷³ Mpangi-bakala, mu ke zonza na beno, na yina me tala kisika yayi na zulu awa, beno fwana vwanda ntete ya kupakilama na ntwala beno kwisa awa. Beno fwana kukota na kisika mosi ya mansweki mpe kusambila. Bantu ke tubaka, “Samu na yinki nge lenda ve kubasika mpe kumona bantu?” Mpangi-bakala, kana nge ke zonza na bantu to nge ke longisa bawu, ya kele mbote ti nge vwanda nge mosi, na Nzambi, ntangu fioti, na ntwala nge kwisa na chaire. Kieleka, beno me mona, samu Satana kele na mayele ya yimbi, mayele ya kulutila yimbi.

¹⁷⁴ Yandi tubaka ntangu yayi, beno tala, yandi tubaka, “Abraham kwikilaka na Nzambi, mpe yandi ndimamaka samu na kudedama ya yandi.” Ya kele kieleka. Yandi tubaka, “Ntangu yayi, yinki diaka Abraham lendaka sala kasi kukwikila?”

Mu tubaka, “Yina vwandaka nionso yina yandi lendaka kusala.”

¹⁷⁵ Yandi tubaka, “Yinki diaka nge lenda sala to muntu nionso lendaka sala kasi kukwikila?”

¹⁷⁶ Mu tubaka, “Yina kele nionso yina beto lendaka sala. Kasi tala, mpangi-bakala, na manima Nzambi vutulaka ngwisani, to ndimaka lukwikilu ya Abraham. Yandi pesaka yandi kidimbu, kidimbu ya nzengolo ya kibakala, mutindu kidimbu ya ngwisani. Beno me mona? Yandi pesaka yandi yawu. Yandi tubaka, ‘Ntangu yayi, Abraham, Mu me ndima lukwikilu ya nge, na yina Mu ke pesa nge kidimbu ntangu yayi ti Mu me ndima nge.’”

¹⁷⁷ Na yina Yandi salaka nzengolo na Abraham, mpe yina vwandaka kidimbu ya ngwisani. Mpe ntangu yayi na kilumbu yayi. . . Ntangu yayi, kento lendaka vwanda ve na kati ya ngwisani yango; kaka kento ya makwela. Beno sosa yawu, ba lendaka sala kento nzengolo ve; na yina, ya lungaka ti bakento kukota na kati, samu ti yandi na bakala ya yandi kele muntu mosi. Bawu kele diaka ve bantu zole; bawu kele muntu mosi. Bantu yikwa zaba yawu? Masonuku ke tuba mutindu yina. Na yina, yandi na kuvwandaka ya kukwela, kuna kento—kento ke kuma mosi. Mpe beno tala na nsi awa mpe beno tala awa na Timothée, ya ke tuba diambu kaka mosi, ya me tuba, “Ntangu yayi kento ke kuzwa mpulusu na kubuta bana, kana yandi zinga na lukwikilu mpe kuvwanda na nkadulu nionso ya kulunga.”

¹⁷⁸ Ntangu yayi, kasi, kuna, kuzenga bakala na Ngwisani ya Ntama vwandaka na nzutu, kasi na Ngwisani ya Malu-malu yayi, Joël ke tuba, “Mu ke mwangisa Mpeve ya Munu na zulu ya bantu nionso, mpe bana ya beno ya babakala mpe ya bakento ke pesa profesi.” Ntangu yayi, mpova *kupesa profesi* zola ve kutuba kulongisa. *Kupesa profesi* zola tuba awa “kupesa kimbangi, na nsi ya lutwadusu ya kimpeve,” to “kuzonza diambu yina ke salama na ntwala.” Mpe beto zaba ti ya vwandaka na baprofete ya bakento na Ngwisani ya Ntama. Ata mbala mosi ve ti bawu lendaka kuzonza na kati ya yinzo ya nene, kuzonza na kati ya yinzo-Nzambi, na kati ya kimvuka, mutindu mulongisi. Kasi yandi, Anne, mpe mingi ya bawu na tempelo, bawu vwandaka baprofete ya bakento, mpe bawu vwandaka. . . . Miryam vwandaka profete ya kento, to kima mosi ya mutindu yina. Yandi vwandaka na Mpeve, ya kele kieleka, kasi yandi vwandaka na bandilu ya kisika. Bakento lendaka vwanda baprofete ya bakento bubu yayi, ya kele ya kulunga; kasi milongisi ve, mpe nionso yina, na manima ya chaire awa. Kana beno sala yawu, beno ke sala—beno ke sala ti Biblia kuswaswana na Yawu mosi. Biblia lenda ve kutuba diambu mosi *awa*, mpe diambu yankaka *kuna*. Yawu fwana tuba diambu mutindu mosi kaka ntangu nionso to Yawu kele Ndinga ya Nzambi ve. Beno me mona? Na yina, “Bana ya beno ya babakala mpe ya bakento ke pesa profesi,” ya zola tuba keba ve ti bawu ke “zonza na ntwala” to ke “pesa kimbangi.” Ntangu yayi, beno sosa yawu, mpe beno baka buku ya bampova ya Biblia mpe beno tala kana ya kele kieleka ve. “Bana ya beno ya babakala mpe ya bakento ke pesa profesi.”

179 Ntangu yayi, Biblia ke tubila mpe kento yina vwandaka vuna, na yina, to yina vwandaka tuba ti yandi. . . Yayi ke tala mpe dibuundu ya Katolika, mpe ke tala mpe na. . . na diambu yayi beto ke zonzila na ntangu yayi. Beto baka Buku ya—ya Apocalypse, mpe beto baka mu banza na kapu ya 2 mpe na nzila ya 20, na yina beto kele pene-pene ya yawu awa, ti beno lendaka tala awa mpe kumona wapi mutindu kima yango lendaka vwanda ya diabulu, na kuzonzilaka na yina ke salama na bilumbu ya nsuka yayi, mutindu ti yayi. . . yinki ke vwanda kento yayi. Beno bambuka moyo, dibuundu ya Katolika kele kento. Beto me tanga yawu, mutindu yina ve? Beno kuwa yayi na ntangu yayi, mutindu Ya ke tuba. Apocalypse 2:20, “Ntangu yayi kasi. . .” Yandi ke na kuzonzaka na dibuundu yayi ya Thyatire, beno me mona, “Ntangu yayi kasi. . .” Ya kele kuna nsungi ya kati-kati ya dibuundu, yina me luta Bansungi ya Mudidi.

Ntangu yayi kasi mu ke na diambu ya kusemba nge, samu nge ke na kundimaka kento yina Jesabel, kento yina ke kukibokila yandi mosi profete ya kento, samu na kulonga mpe. . . kuyala misadi ya munu na kulongisa bawu mpe na kusala kindumba, mpe na kudia bima yina me pesama mutindu munkayulu na biteki. (Beno me mona?)

180 Ntangu yayi, kana beno tala, beno tala mbote bansungi yayi ya dibuundu, na manima beto ke sukisa. Na yina mbasi na suka beto ke baka bima yankaka yayi. Beno tala mbote. Na. . . Na nsi ya minda ya wolo ya tabernacle ya ba-Juif, na kati na kisika, ya mampa mpe nionso yina, ya vwandaka na minda sambwadi ya wolo. Beno nionso zaba yawu. Beno me mona? Ya kele na bansungi sambwadi ya dibuundu. Ya ke zonzila bansungi sambwadi ya dibuundu, mwinda. Ntangu yayi kana beno tala na Apocalypse 1, beto ke mona ti Yesu kele ya kutelama na kati ya bansungi sambwadi ya dibuundu, minda sambwadi ya wolo, ntangu yandi balukaka mpe yandi monaka Muntu mutindu mosi na Mwana ya muntu, ya kutelama, ya kulwata mutindu ba me zonga awa. Ya vwandaka Kento ya dikwela yina ba me monikisa, ya kutelama na kati ya minda.

181 Ntangu yayi, na Ngwisani ya Ntama, bawu zolaka baka. . . mwinda mosi, mpe pelisaka yawu, bakaka mwinda yankaka mpe pelisaka yawu na yina, pelisaka yawu na yina, yina na yina yankaka, mutindu yina, tii bawu ke sala na minda nionso basambwadi.

182 Kana beno lenda tala, na mbatukulu, ntangu Nzambi bandaka na kusala na ba-Juif, bawu lutaka na mbandu ya wolo. Mpe nsungi ya mudidi mingi na ngwisani na ba-Juif, yina Nzambi kuzwaka na ba-Juif, ya vwandaka na ntangu ya Achab. Mpe kana beno tala, na kutangaka bambandu ya dibuundu yayi kuna, Yandi ke na kuvutuka na yawu mbala mosi diaka. Yandi tubaka, awa, “Mwa mambu lutaka,” mpe tubaka. . . Ntangu

yayi, kaka na Nsungi yango ya Mudidi, kuna na funda mosi na nkama tanu ya bamvula, to na ntangu ya Achab, ntete, mpe ya ba-Juif. Nsungi ya mudidi yina bawu kuzwaka, vwandaka ntangu Achab kwelaka Jesabel mpe yandi nataka bisambu ya biteki na Israël, mpe yandi salaka ti bantu nionso kukembila na mutindu ya Achab. . . landila nzambi ya Jesabel. Beno bambuka moyo ti, bawu bakaka, tulaka bayinti, mpe mwangisaka ba-autel ya Nzambi. Mpe Élisée bokaka, ti yandi vwandaka “kaka yandi mosi,” kasi Nzambi vwandaka diaka na nkama sambwadi ya bayina fukamaka ata mbala mosi ve na ntwala ya Baal. Beno me bambuka moyo na yawu? Ya kele kifwani ya Dibuundu yango yina ba soolaka yina ke basika. Beno me mona kuna? Beno me mona mutindu ya kele?

¹⁸³ Ntangu yayi, na dibuundu yayi, kana beno tala dibuundu ya ntete, dibuundu ya ntete, dibuundu ya Ephese, ya vwandaka dibuundu mosi ya nene. Yandi tubaka, “Nsemo ke ntete, na nge.” Mpe kana beno tala, konso dibuundu, nsemo bandaka na kukulumuka, na kukulumuka, tii na Thyatire. Na manima, ya bamvula funda mosi na nkama tanu. Na manima Yandi me basika na lweka yankaka, “Mpe nge kele kaka na nsemo fioti. Pesa ngolo na yina kele na nge, kana ve ba ke katula nge mwinda yina kele na nge.” Mpe kuna me kwisa nsungi ya dibuundu ya Philadelphie, mpe na manima nsungi ya dibuundu ya Laodicée.

¹⁸⁴ Ntangu yayi, yawu yayi kitoko ya yawu. Oh, la la! Mu zola mingi yayi, Mpangi Smith. Beno me mona, beno tala yayi. Ntangu yayi, na nsungi ya dibuundu *yayi*, landila mutindu beto me tala yawu. . . Ntangu yayi beno tala mbote yayi. Nsungi ya ntete ya dibuundu vwandaka Ephese, nsungi ya dibuundu ya Ephèse. Ntangu yayi, mosi na mosi ya bansungi ya dibuundu yayi, tii na funda mosi na nkama tanu ya bamvula yayi, kana beno tala. . . Beno tanga yawu ntangu beno ke kwenda na yinzo na nkokila yayi, kana beno kuzwa ntangu, to mbasi na suka-suka, na ntwala beno kwisa na yinzo-Nzambi, kapu ya 1, ya 2, mpe na kapu ya 3 ya Apocalypse. Beno ke tala, mosi na mosi ya bansungi ya dibuundu yango, ti Yandi tubaka, “Nge kele na ngolo ya fioti, mpe nge me manga ve Nkumbu ya Munu,” tii Yandi kumaka na funda mosi na nkama tanu ya bamvula ya Thyatire, Nsungi ya Mudidi. Na manima Yandi me basika na lweka yankaka, mpe tubaka:

. . . nge ke na kusala ti nkumbu mosi kuzinga, kasi nge kele ya kufwa.

¹⁸⁵ Mpe bayayi, ata mosi ve ya bansungi ya dibuundu yankaka, ti to nsungi ya dibuundu ya Philadelphie, ata mbala mosi ve bawu bakaka Nkumbu yango diaka. Bawu bakaka Nkumbu yango ata mbala mosi ve, samu ti yawu zimbanaka na ntangu yina. Ntangu yayi, oh, awa beto lenda tula yawu na zulu ya malongi ya bawu ya luvunu, kaka kuna, kulakisa beno ti yandi kele

mama, dibuundu ya Katolika, mama ya nionso yayi, mutindu yandi kele “mama, mansweki, Babylone.” Mpe ya kele, beno tala, nsungi ya dibuundu yayi awa ntangu yawu bandaka, yawu vwandaka na nsemo fioti, na manima nsemo ya yawu me banda na kukulumuka, na kukulumuka, mpe na manima yawu me kota na kimvuka kuna, bamvula funda mosi na nkama tanu. Mpe na manima yawu me basika, mutindu Dibuuundu ya Mfumu Yesu Klisto ve, kasi mutindu dibuundu ya Katolika. Yinki me kuma Luther? Dibuuundu ya Luther. Yinki me kuma ba-Baptiste? Dibuuundu ya Baptiste. Nkumbu ya Yandi ve, Nkumbu ya Yandi ve; nkumbu yankaka, “nge kele na nkumbu.” “Samu ti ya kele ata na nkumbu yankaka ve yina ba pesaka na nsi ya Mazulu na yina beno lenda vuuka, kaka Nkumbu ya Yesu Klisto.” “Nge ke na sala ti nkumbu mosi kuzinga, kasi nge kele ya kufwa,” ya kele na denomination yayi.

¹⁸⁶ “Oh, mu kele Presbyterien,” mpe nge kele ya kufwa! “Oh, mu kele Baptiste,” mpe nge kele ya kufwa! Nge kele kaka ya moyo na yina beno ke kuzwa luzingu kati na Klisto Yesu. Ya kele kieleka. Bambotika ya beno ya luvunu, kutula masa, mbotika ya luvunu; kulosa masa, kutiamuna masa, na kisika ya kukotisa na kati ya masa; kusala “Tata, Mwana, mpe Mpeve-Santu,” na kisika ya Nkumbu ya Mfumu Yesu Klisto. Bima nionso yayi ya luvunu ke na kulandila, Biblia me tuba, kutiamuka na ngolo nionso. Mpe awa beto ke ndimaka bima yayi, “Mbote, dibuundu ya munu ke kwikilaka Yawu mutindu *yayi*.” Kasi Biblia ke tuba *Yayi*. Beno me mona? Bima ya mutindu yayi ve. Ya kele ve na kima ya mutindu yayi.

¹⁸⁷ Mpe ata kisika ve na Biblia yina bawu basisaka ludimi mpe bakaka Ukaristiya ya santu, mpe ti nganga-Nzambi ke kunwa vinu mpe kubokila yawu Mpeve-Santu. Ata mbala mosi ve na kati ya Biblia ti bawu pesanaka mbote mpe pesanaka diboko ya kusala kintwadi, mpe kubokila yawu Mpeve-Santu. Ata mbala mosi ve ti muntu telamaka mpe tubaka, “Ntangu yayi mu me kuma mukwikidi,” mpe me kuzwa Mpeve-Santu. Kana ya salamaka, yayi kele mutindu ba zolaka tanga Actes 2, “Mpe ntangu Kilumbu ya Pentecote kumaka, nganga-Nzambi mosi ya Rome tambulaka na nzila, mpe yandi vwandaka na kole ya kubaluka. Yandi belamaka, yandi tubaka, ‘Benoni nionso beno basisa baludima ya beno ntangu yayi mpe beno baka Ukaristiya ya santu, mbundana ya ntete.’” Ya ke vwanda ve diambu na kutanga Actes 2 mutindu yina?

¹⁸⁸ Mbote, beno mpe ba-Protestant kele yimbi mutindu mosi na bawu. Beno me katuka kuna mpe ke tuba, “Ntangu yayi beto ke kwisa na beno ba-Methodiste; kupesa bawu diboko, to, kupesa bawu diboko ya kusala kintwadi, mpe kupesa bawu bangonda sambanu samu na kumeka bawu.” Wapi kisika beno tangaka yawu na Actes 2? Beno me mona? Wapi kisika beno me kuzwa yawu? Beno me mona?

¹⁸⁹ Ba tubaka, “Na yina bawu vwandaka bawu nionso kisika mosi, na ntima mosi!” Ata mbala mosi ve ti évêque kwisaka mpe salaka *yayi*, mpe ata mbala mosi ve ti nganga-Nzambi kwisaka mpe salaka *yayi*. “Kasi makelele mutindu kitembo ya ngolo katukaka na Mazulu, mpe Yawu fulukaka na yinzo nionso sika bawu vwandaka ya kufonga.” Ya kele mutindu yina bawu kuzwaka Yawu, yinga, tata, mutindu kitembo ya ngolo yina me katuka na Nkembo. Ya nzila ve to yina me katuka denomination ve.

. . . nge ke na kusala *nkumbu mosi* kuzinga, kasi nge kele ya *kufwa*.

¹⁹⁰ Beno me mona, ba-credo ya beno mpe ba-denomination ya beno me kanga nzila na Nzambi mutindu yina, ti ntangu yayi, “Beto ke kwikilaka *yayi*, mpe beto ke kwikilaka ti bilumbu ya bimangu me luta.” Ya kele yina profete ya luvunu ke tubaka. Ya kele profete ya luvunu yina ke zonzaka na beno, ti, “Beno lenda pesana mbote mpe kuzwa Mpeve-Santu.” Ya kele profete ya luvunu yina ke zonzaka na beno, “Beno ke kuzwa Mpeve-Santu ntangu beno ke kwikila.” Ya kele profete ya luvunu yina ke zonzaka na beno, “Bawu fwana tula beno masa mpe kutiamuna beno masa na kisika ya kubotika.” Ya kele profete ya luvunu yina ke zonzaka na beno na “kubotama na nkumbu ya Tata, Mwana, mpe Mpeve-Santu,” na yina ya kele ata na Masonuku ve samu na yawu na kati ya Biblia. Ya kele kieleka. Ya kele na Masonuku ve na kati ya Biblia yina ke zonga na beno na kubotama, ata kisika ve ti muntu mosi bakaka mbotika, kasi kaka na Nkumbu ya Yesu Klisto. Kaka, bilandi ya Jean; mpe ya lungaka ti, bawu baka diaka mbotika, na Nkumbu ya Mfumu Yesu Klisto, samu na kuzwa Mpeve-Santu. Ya kele kieleka. Ntangu yayi, yayi kele ve malongi ya Yesu Kaka. Mu zaba malongi ya Yesu Kaka. Ya kele yayi ve. Yayi kele kaka Malongi ya Biblia. Ya kele kieleka.

¹⁹¹ Kasi beno bawu yayi. Yinki beno ke salaka na yawu? Mama ya beno yandi yayi. Yandi yayi mama ya ba-credo yayi.

¹⁹² Ntangu yayi, beno vutuka na kati ya Biblia mpe beno tuba na munu kisika bawu tiamunaka muntu masa. Methodiste, Presbyterien, Katolika, beno tuba na munu kisika bawu tiamunaka muntu mosi masa, na kati ya Biblia. Beno zonga na munu kisika ba tulaka muntu mosi masa, na kati ya Biblia, samu na kuzwa mulemvo ya disumu. Beno lakisa yawu. Beno lenda kuzwa yawu? Kana beno kuzwa yawu, beno kwisa na munu, mpe mu ke tambula na bala-bala yayi na dibaya ya bisono ya nene na manima ya munu, mpe kutuba, “Profete ya luvunu! Mu vwanda ya kuzimbana.” To, beno kuzwa kisika mosi na kati ya Biblia nionso kisika muntu botamaka na nkumbu ya Tata, Mwana, mpe Mpeve-Santu, mutindu makumi nana na zulu ya nkama ya beno bakaka mbotika. Beno kuzwa munu Masonuku mosi kisika muntu botamaka mutindu yina, mpe mu ke tula dibaya na manima ya munu, “profete ya luvunu,” mpe kutambula na

yawu na bala-bala mutindu *yayi*. Mpe beno lakisa munu kisika muntu botamaka, na Dibundu ya malu-malu, ti yandi kwisaka mpe vutukilaka ve mbotika, na . . . kaka na nkumbu ya “Yesu” ve, kasi na Nkumbu ya Mfumu ya beto Yesu Klisto. Ya kele kieleka. Beno tala kana ya kele kieleka ve.

¹⁹³ Mpe, awa, yinki ya kele? Yandi vwandaka mama ya bakento ya kindumba. Yinki salaka yandi kento ya kindumba? Yinki salaka yandi ndumba? Malongi ya yandi! Yinki salaka bawu bakento ya kindumba? Malongi ya yandi!

¹⁹⁴ Mpe ya kele samu na yina beto ke pesaka muswa ve na ba-denomination ya bawu mpe na ba-dogme ya bawu. Beto ke vwanda ya kutsya na Biblia yayi. Mu zaba ve wapi mutindu mbote beno ke zingaka Yawu, kasi na mutindu nionso, ba ke longisaka beno Yawu. Kieleka. Ya me tala beno. Mu lenda ve kusala ti beno kuzinga na Yawu. Mu lenda kaka kutuba na beno yina kele Kieleka. Ya kele samu na yina beto kele denomination ve. Mu zola ve—mu zola ve ti beto kusumuka na kukota na kima ya mutindu yina, kufutama na mwa malongi mosi. Mu ke zola mingi kubaka nzila na ndambu ya bantu ya Mfumu yina ba me vweza. Mu ke zola mingi kuvwanda ya kutsya mpe ya kuvedila na ntuala ya Ndinga mpe na ntuala ya Nzambi, mpe kuvwanda kuna mpe kutuba, “Ya kele na ata menga ya muntu ve na lele ya munu.” Ya kele samu na yina beto ke vwandaka na Branham Tabernacle. Ya kele samu na yina beto kele ve ya Bimvuka. Ya kele samu na yina beto kele ve ba-Unitaire. Ya kele samu na yina beto kele ve Yesu Kaka. Ya kele samu na yina beto kele ve ba-Methodiste. Ya kele samu na yina beto kele ve ba-Baptiste. Kaka mwa tabernacle awa. Beto kele na ata fioti ve ya denomination. Beto kele na kimpwanza, kati na Klisto. Ya kele samu na yina beto ke vwandaka mutindu beto kele. Nzambi me sakumuna beto, mpe Nzambi ke na kusadisaka beto.

¹⁹⁵ Ntangu yayi, beto lenda tuba na beno samu na yinki beto ke bakaka communion, beto lenda tuba na beno samu na yinki beto ke sukulaka makulu, samu na yinki beto ke pesaka muswa ve na bandimi na kubaka yawu kana beto zaba ti bawu kele na kati ya masumu. Ya kele samu na yina, basabala zole to tatu yina me luta yayi, mu vwandaka kwenda tala katuka mundimi mosi na yankaka, kisika mindondo vwandaka, mpe. Mu kwendaka, mosi lendaka ve kutuba na yankaka, mpe bawu vwandaka luta mosi na mosi na nzila mpe vwandaka balula bayintu. Nsoni na beno, beno bayina bakaka mbungu ya lusakumunu ya Nzambi na ntuala ya bantu yayi, awa na autel yayi, mpe bayina ba me bokila bampangi ya babakala mpe ya bakento, mpe na manima beno ke baka alo-alo mpe beno ke tuba yimbi ya mosi na yankaka. Beno me lunga ve ti ba bokila beno Baklisto ntangu beno ke sala mutindu yina. Kieleka. Beno vwanda ntama na alo-alo; kana beno lenda ve kutuba mbote ya muntu mosi, beno tuba ata mbala mosi ve. Beno bambuka moyo, Nzambi ke tula yawu

na zulu ya nge. Ntangu nionso mpeve ya mutindu yina kele na kati ya beno, beno zaba ti nge kele ya kusungama ve na Nzambi. Kana nge. . .

¹⁹⁶ Kana muntu me sala yimbi, beno kwenda na yandi mpe beno wisana. Kana beno lenda ve kuwisana, beno baka muntu yankaka na beno. Ntembe ve ti Nzambi lenda ve kusungika Dibundu ya Yandi, samu beno ke na kusalaka yawu mbote ve. Na kisika ya kubaka alo-allo mpe kuzonza na yina me tala muntu yayi, yina me salama, mpe kusala mutindu yina, mwa binzambi-nzambi mpe nionso yina. Na kisika ya kusala mutindu yina, samu na yinki beno lenda ve kusala yina Biblia me tuba? Kana ba me kuta mpangi-bakala na foti, beno kwenda na yandi mpe beno mona kana beno lenda ve kuwisana na yandi. “Mbote, awa, yandi me sala muntu yimbi!” Mu ke landa ve yina yandi salaka, ata nionso yina kwenda na yandi! Ya me tubama ve ti yandi yina ke kwisa na beno. Beno ke kwenda na yandi kana yandi me sala yimbi. Beno ke tuba, “Mbote, yandi kele na foti. Yandi fwana kwisa na muntu.” Ya kele ve yina Biblia tubaka. Biblia ke tuba ti nge ke kwenda na yandi. Kana yandi kele na foti, nge kwenda na yandi.

¹⁹⁷ Mpe kuna kana yandi kuwa beno ve, kuna beno baka muntu mosi na beno, mutindu mbangi.

¹⁹⁸ Mpe kuna kana yandi zola ve kumona mbangi yina, kuna beno tuba, “Ntangu yayi mu ke kwenda baka pasteur ya nge.” Na manima beno zonza na yandi, beno tuba, “Mu ke zonza yawu na dibundu, mpe kana na bilumbu makumi tatu na kubanda ntangu yayi, nge mpangi me wisana ve. . . Mpangi-bakala yayi awa zola kuwisana. Beno zola kusala yawu ve. Mpe kana beno zola kuwisana ve na kati ya bilumbu makumi tatu, kuna yinki ke salama? Nge kele diaka ve mosi ya beto.”

¹⁹⁹ Biblia tubaka, “Kana yandi manga na kuwa dibundu, na yawu yandi vwanda samu na beno mutindu mumpani mpe mufutisi-mpaku.” Beno me mona, na ntangu nionso yina mpangi-bakala kele na nsi ya lukengolo ya dibundu, Menga ya Klisto ke keba yandi. Ya kele samu na yina beto lenda ve kunata dibundu na ntwala samu na mutindu ya yawu ya kusala. Ntangu yayi, kieleka, *Yayi* kele Malongi ya ba-Bap- . . . ya dibundu ya ba-Baptiste, to ya Branham Tabernacle awa, kana beno ke sala yawu. Beno me mona, samu na yinki ve. . .

²⁰⁰ Beno baka awa, beto tuba, mutindu, babakala zole, beto tuba Leo na muntu. Beno ke baka muntu. . . Mpe mu ke tuba, “Mbote, yandi—yandi me sala muntu yimbi.” Yina ke soba kima ve. Mu fwana kwenda na yandi. Mbote, yandi kele mundimi ya yinzo-Nzambi yayi. Yandi me—yandi me kuma Muklisto. Yandi ke lutaka awa na ndonga samu na kubaka mbundana. Mpe beto bakaka mbotika na Nkumbu ya Mfumu Yesu. Beto me tambula

na mutindu ya kusungama, mutindu bampangi ya babakala, na ntwala ya mosi na mosi, na manima kima me salama.

²⁰¹ Ya kele muntu ve. Bambala makumi yivwa na zulu ya nkama ya kele diabulu yina ke kotaka na kati-kati ya bantu. Ya kele bantu ve. Ya kele diabulu. Mpe ntangu nionso yina beno ke bika ti diabulu kusala mutindu yina, beno ke sala mpasi na mpangi ya beno ya bakala. Ya kele kieleka.

²⁰² Mbote, Leo na munu ke na diambu mosi; beto kwenda wisana. Mpe kana beno mona ti diambu kele, ya kele kisalu ya beno na kukwisa na beto, mpe kutuba, “Beno bampangi zole ya babakala beno kwisa awa mpe beno kwisa vukana. Beto ke sungika kima yayi.” Ntangu yayi, kuna, kana yandi kwisa kuna, mpe kuna beto tala, kuna, beto bawu yayi. Mu ke tuba, “Mbote, kima ya ntete, kana beto—beto kuwisana ve, na yawu beno ke kwisa mutindu yina na dibuundu.”

²⁰³ Mpe kuna ntangu—ntangu nionso yina beno ke sala kima ve samu na yawu, ntangu yina, Menga ya Yesu Klisto ke keba beto zole. Beno me mona? Kasi na manima kimbevo ya ntama ya cancer yayi—yayi ya ke buta kimbevo yankaka ya cancer, mpe kimbevo ya cancer yina ke buta kimbevo yankaka ya cancer, mpe nionso ke vwanda ya kubela, bisika nionso, na dibuundu nionso. Kuna beno ke kuma na kisika mosi ti ntangu beno ke kwisa na dibuundu, mpe yawu ke vwanda madidi mingi, beno fwana baka yina ke kengidilaka yinzo na kwisa tiamuna bangalasi, na ntwala dibuundu kukota. Ntangu yayi, beno zaba ti ya kele kieleka. Mpe madidi! Muntu ke kwisa vwanda kuna, mutindu beno zaba, mpe ke tuba kaka diambu ve. “Mbote, na ntangu ya ntama beto vwandaka bantu ya kulutila na kimpeve.” Mbote, yinki me salama? Beno vwanda tambula mbote, yinki me salama? Beno me mona, disumu ya beno me kabula beno. Mpe Nzambi ke tula yawu na zulu ya beno, bampangi. Ntangu yayi mu ke sungika diambu yayi.

²⁰⁴ Ata yimbi ve kele na munu, ata yimbi ve kele na Leo; ya kele diabulu yina kotaka na kati-kati ya beto. Ya kele kieleka. Beno sungika diambu yango. Beno kwenda na yandi. Kuna kana yandi manga na kuwa, to munu kumanga na kuwa, ata nani ya lendaka vwanda, na manima beno tuba yawu na dibuundu. Kana yandi kwisa wisana ve na dibuundu na kati ya bilumbu makumi tatu, kuna yandi ke vwanda diaka ve na nsi ya lukengolo ya Yesu. Beto ke fungula yandi. Ya kele nionso kieleka. Kuna beno tala mbote yinki ke salama. Beno bika Nzambi kusungika yandi kuna. Beno me sukula maboko ya beno. Beno me sala ya kulutila mbote yina beno lendaka sala. Kuna beno bika Nzambi kuzwa yandi samu na mwa ntangu; Yandi ke baka yandi na diabulu. Mpe kuna yandi ke vutuka. Kana yandi vutuka ve, luzingu ya yandi ke vwanda nkufi.

205 Beno ke na kubambuka moyo na kati ya Biblia, kisika ya vwandaka na mpangi mosi ya bakala yina vwandaka manga na kusungama na Nzambi? Bantu yikwa lenda bambuka moyo na diambu yango? Yandi vwandaka zinga na mama ya mbanda, mpe ba lendaka ve kusungika yandi. Paul tubaka, “Beno kaba yandi na diabulu, samu na kubeba ya nzutu.” Beno ke mona, na ba-Corinthien ya Zole, ti yandi sungamaka.

206 Mu kele na mpangi mosi ya bakala, mpangi ya mbote, mu zola awa kubokila nkumbu ya yandi, mpangi-bakala ya mulongi. Mpe mpangi-bakala ya mulongi yayi, nkumbu ya yandi kele Mpangi Rasmussen. Mingi na kati ya beno bisadi yina kele ya kuvwanda awa, na nkokila yayi, nkumbu ya yandi kele na mikanda ya beno. Yandi kele ya dibuundu yina ke yambaka bantu nionso na Chicago. Beno tala. Yandi vwandaka na mwana mosi ya bakala, kisadi, mpe yandi kwendaka kwela mwana-kento mosi ya Katolika, mpe yandi bandaka mutindu yina. Mpe bawu zolaka sala *yayi*, *yina*, mpe *yankaka*, mpe—mpe nionso yina; yandi kuzwaka mambu. Mpe tata ya yandi kwendaka na yandi, yandi tubaka, “Ntangu yayi tala, mwana, nge zola kwenda wisana?”

Yandi tubaka, “Papa . . .”

Yandi bokilaka dibuundu ya bawu nkonga ya ba-exalté, papa ya yandi. Yandi tubaka, “Ntangu yayi, tala, nge ke sungika diambu yayi na yinzo-Nzambi yayi?”

207 Yandi tubaka, “Ntangu yayi, papa, nge kele papa ya munu, mpe mu zola kuzwa mambu ve na nge.” Mbote mingi.

208 Yandi kwendaka baka mosi ya ba-diacre mpe yandi kwendaka na yinzo ya yandi. Yandi tubaka—tubaka, “Wesley, mu zola tuba na nge.” Yandi tubaka, “Nge ke kwenda sungika diambu yayi na dibuundu?” Mpe yandi pesaka yandi mvutu ya nkufi ya mutindu yina. Yandi tubaka, “Bambuka moyo, Wesley, ti mu kele pasteur ya dibuundu yina. Mu kele papa ya nge, kasi mu ke sala yina Nzambi tubaka na kusala. Mu ke pesa nge bilumbu makumi tatu samu na kusungika yawu na dibuundu yayi, to beto ke tula nge na nganda ya Mvwandulu ya Nzambi. Nge kele mwana ya munu mosi; yina kele Mvulusi ya munu.” Yandi tubaka, “Mu zola nge. Mpe nge zaba ti mu zola nge, Wesley. Mu lenda kufwa malu-malu yayi samu na nge. Kasi nge fwana vwanda ya kusungama na Ndinga ya Nzambi. Beno me mona?” Yandi tubaka, “Mu kele pasteur. Mu kele mvungi ya mameme yina. Kana nge kele mwana ya munu, to nani nge kele, nge fwana sungama na Ndinga ya Nzambi. Kana nge sala yawu ve, kuna mu kele ve ya kulunga na kuvwanda mvungi ya Yandi.”

209 Oh, yayi kele pasteur. Yayi kele bakala. Beno ke banza mutindu yina ve? Yayi kele bakala. Yandi tubaka yina na mwana ya yandi ya bakala. “Mpe ya salaka yandi mpasi,” yandi tubaka. Kasi yandi tubaka, “Yinki? Nge monisa nani mpasi, muntu, to

kumonisa mpasi na Mvulusi ya nge? Na yina,” yandi tubaka, “na yawu beto me vutuka.” Mpe yandi tubaka, “Yandi zolaka ve kusala yawu. Mpe beto . . . Mu tubaka yawu na dibuundu.”

²¹⁰ Yandi tubaka, “Mwana ya munu mosi, Wesley, yandi me manga na kuwa munu, na diambu yayi. Yandi me manga na kuwa diacre. Mpe nge kele mbangi ya yayi, Mpangi-bakala *Kingandi?*”

“Yinga, mu kele mbangi.”

“Mbote mingi. Na ngunga ya nana na nkokila, ya Lumingu yina ke na kwisa kuna, na basabala yiya kubanda awa, kana yandi sungika yawu na dibuundu yayi ve, beto ke kaba Wesley, mwana ya munu ya bakala, na diabulu, samu na kubeba ya nzutu. Menga ya Yandi, Menga ya . . . ya Yesu Klisto, mpe dibuundu yayi, ke kengidila yandi diaka ve.”

²¹¹ Mpe nkokila yango kwisaka. Ya kutelama na chaire, yandi tubaka, “Yandi kele diaka na baminuti zole.” Ntangu me kuma. Yandi tubaka, “Ntangu yayi, samu na mwana ya munu ya bakala, Wesley Rasmussen . . . tubaka yayi na dibuundu, na Nge, Nzambi ya Ngolo nionso: Beto me sala nionso yina beto lendaka sala, landila Bandinga ya Nge mpe misiku ya Mwana ya Nge—ya Nge, Mvulusi ya beto, bikaka na beto. Beto ntangu yayi, mu me kaba mwana ya munu ya bakala, mpe dibuundu yayi na munu, samu na kub- . . . na diabulu, samu na kubeba ya nzutu ya yandi, ti moyo ya yandi kuvuluka.” Yina vwandaka kaka yina bawu tubaka. Kima ve salamaka, na manima ya sabala mosi to zole, keba ve ngonda mosi to zole.

²¹² Na nkokila mosi, Wesley vwandaka bela. Mpe na yina yandi vwandaka bela, yandi vwandaka kubela mingi. Yandi bokilaka dokotolo. Dokotolo kwisaka mpe talaka yandi. Yandi vwandaka na fièvre ya ba-degre makumi yiya na ndambu. Yandi talaka ve yinki vwandaka sala mutindu yina. Kubela vwandaka kaka mingi. Dokotolo tubaka, “Mwana, mu zaba ve yinki me salama na nge.” Yandi vwandaka zaba ve yinki ya kusala. Yandi tubaka, “Beto ke bokila muntu ya mayele ya yayi.” Bawu bokilaka muntu ya mayele ya yina, mpe muntu ya mayele ya yina kwendaka kuna. Bawu nataka yandi na lupitalu, yandi talaka yandi mbote, mpe nionso. Mpe yandi tubaka, “Mu zaba ve yinki ya kuzonza na beno. Mwana ke na kumonana kaka—kaka mutindu mvumbi.” Kento ya yandi ya kutelama kuna, vwandaka dila, kima mutindu yina. Mpe bana ya kutelama pene-pene ya mbeto mpe bisika nionso mutindu yina. Yandi tubaka, “Yandi ke na kukwendaka. Kaka yina.” Yandi tubaka, “Kubula ya ntima ya yandi mpe kupema ya yandi, ke na kulembaka ntangu nionso.”

²¹³ Yandi tubaka, “Beno bokila papa.” Oh, yinga. Yayi kele mutindu ya kusala. Mutindu yina. “Beno bokila papa.” Mpe kuna papa ya yandi kwisaka na nswalu na lupitalu, na nswalu nionso, samu na kumona yandi. Yandi tubaka, “Papa, mu lenda ve kusala

yawu ntangu yayi, kasi Nzambi kuwa bampova ya munu. Mu ke sungika nionso. Mu ke sungika yawu. Ee, mu ke sala yawu.” Yinga, tata, mpangi-bakala. Kaka kuna kupema ya yandi me banda na kukuma mbote.

²¹⁴ Mpe Lumingu yina vwandaka landa, yandi vwandaka na ntwala ya dibuundu. Yandi tubaka, “Mu me sumuka na ntwala ya Nzambi, na ntwala ya dibuundu yayi. Mu mangaka na kuwa bampova ya pasteur. Mu—mu mangaka na kuwa diakre awa.” Mpe yandi tubaka, “Mu ke lomba na dibuundu yayi na kulemvokila munu samu na yimbi yina mu salaka na kusalaka mutindu yina.” Yandi tubaka, “Nzambi vwandaka me bumba luzingu ya munu.” Mu tuba na beno, yandi sungamaka mbote. Yinga. Ya kele yina beno fwana sala, beno me mona. Beno me mona? Beno, kana beno lenda sala yawu kaka na mutindu ya Nzambi! Beno me mona?

²¹⁵ Ntangu yayi, beno me mona, mutindu beto ke salaka, beto ke na lukutakanu ya bakuluntu, mpe beto ke tuba, “Mbote, ntangu yayi, beto lendaka bumba. . .” Mu ke na kutuba ve na tabernacle, kasi mu zola tuba na beto ba-Protestant. Beto ke na lukutakanu ya bakuluntu, mpe, “Yinki beno ke banza na yina me tala Jones? Yinki beno banza beto lenda sala na yandi? Mu banza ti yandi ke vwanda mundimi ya mbote mingi na ba-Methodiste na beto.” Beno bawu yayi. Yina, ya kele mbote ve. Ya kele samu na yina beto fwana ve kulanda binkulu ya bawu. Mpe évêque mosi, beto fwana bokila yandi (mundimi. . . wapi mutindu, beno ke bokilaka yandi? mfumu ya kizunga ya dibuundu yayi ya Pentecote? “mukengi ya kizunga”)—kubokila yandi na kwisa mona nkadulu ya muntu yayi.

²¹⁶ Biblia ke tuba na beto yinki ya kusala. Ya kele samu na yina beto ke vunamaka ve na ba-denomination ya bawu. Beto kele na kimpwanza ntama na kima yango. Amen. Beno me dasukila munu ve, ve? Beno sala yawu ve. Mbote mingi. Mu banza ti mu ke kuzwa bakiuvu mosi ya mbote mbasi na nkokila. Kasi, mbote, ya kele ya kulunga. Beno me mona? Beno bambuka moyo. Beno zaba. . .

²¹⁷ Mu ke tuba yayi ntangu yayi. Beno bantu yina kele awa ya ba-denomination ya luswaswanu, denomination ya beno, mpe, mpangi-bakala, mu ke na kutubaka ve ti beno kele ve Muklisto. Mu ke na kutubaka ve ti ya kele ve na mafunda ya Baklisto ya luzolo na kati ya denomination ya beno. Mu ke na kumekaka na kutuba samu na yinki beto kele denomination ve. Samu ti, mu lenda kaka ve kubika yawu. Ve, tata. Mu lenda ve. Bawu ke na kumeka na kuzonza na beno yinki ya kusala. Kana Nzambi bokilaka munu na kulunga Nsangu ya mbote, kuna mu ke longa Yawu mutindu Nzambi ke zonza na munu na kusala yawu. Ya kele nionso ya kulunga, mutindu ya kele ya kusonama awa na kati ya Biblia yayi. Beno sungama na Yayi ve, kuna ya kele yina. . . Nzambi ke sambisa munu samu na yawu. Kasi kana mu—

kana mu—kana mu mona yingo ke na kwisa, to mbeni yina ke na kwisa, mpe ti mu kebisa bantu ve, na manima Nzambi ke yufula munu yawu. Kasi kana mu kebisa beno, na yina ya me tala beno kuna. Beno me mona?

²¹⁸ Beno bambuka moyo ti, “Kuna na bilumbu ya nsuka, ya ke vwanda na bantangu ya mpasi mingi, bantu ke vwanda na munimi, ke vwanda na lufundu, ke vwanda na lunangu, ba ke finga Nzambi.” Beno me mona, bantu ya bifingu, “Oh, bawu nkonga ya bantu ya buzoba. Bilumbu ya bimangu me luta. Ya kele na kima ya mutindu yina ve.” Yandi kele profete ya kiboba ya luvunu. “Awa, beto zaba ti bakento ya beto kele na mbanzulu ya kulutila mbote na babakala ya beto.” Mu ke na kumangaka yina ata fioti ve, kasi Biblia ya Nzambi tubaka ti beno kupesa yandi muswa ve na chaire. Yina me—yina me lunga samu na munu, beno me mona. Ya kele kieleka. Mbote mingi. Beno me mona?

Mpe bawu ke tubaka, “Mbote, ntangu yayi, na badenomination ya beto, beto kele na bantu mingi ya mbote mutindu beno kele na yawu kuna na tabernacle.” Mu ke na kutubaka ata fioti ve ya yina, kasi Biblia ke na kufundisa badenomination. Ya kele kieleka. Mpe, na yina, mu ke na kutubaka ve ti beno kele ve na bandimi ya mbote na kati ya dibuundu ya beno. Ya kele mbote mingi. Bawu kele bantu ya mbote. Bantu na kati ya bantu ya kulutila mbote, mu ke kutanaka na mosi na mosi ya bawu, na bantu ya Catholique mpe bisika nionso. Na bawu nionso, mu ke kutanaka na bandimi ya mbote.

²¹⁹ Ntangu yayi, mutindu beto ke nata yayi awa, bampangi, kana Mfumu zola, na malongi zole to tatu yina ke na kwisa, mu banza. . . Mu ke zabisa beno mbasi na suka kana beto ke landila mbasi na manima ya midi to ve, beno me mona, samu na kulakisa nionso yina. Beto ke na kumekaka na kusala yayi samu ti, mu zola kuvutula yawu na kisika ntangu yayi. Ntangu yayi, kana beno zola kunata muntu na beno, beno lenda sala yawu. Kasi beno bambuka moyo ntangu yayi, beno kwenda ve—ve mpe kumeka na kutonga. Beno ke kwisa awa. . . Mu ke na kuzonzaka kaka na dibuundu ya munu—ya munu, beno me mona. Mu ke longaka yayi ve ntangu mu ke vwandaka na nganda ya dibuundu ya munu awa, samu ti ya kele kusalu ya muntu yankaka. Ti, yandi kele muvungi ya mameme yina. Mpe—mpe mu kele kaka. . . [Kisika ya mpampa na bande—Mu.]

²²⁰ Tii na Genèse, beno ke tala yawu, mpe kumona kisika ya kele. Ntangu yayi beto ke vutuka na Genèse, na kutala samu na yinki ti mwana ya makangu fwana kota na kimvuka ya Mfumu bansungi kumi na yiya ve. Wapi mutindu ya salamaka. . . Bamvula nkama yiya zolaka luta samu disumu yayi kuzimbana. Beto ke tala wapi mutindu disumu ya nkú ke vutukaka na bana mpe na bana ya bawu yayi, wapi mutindu yawu bandaka na Genèse, mpe nionso yina.

²²¹ Mpe beno...kuna beno ke mona mutindu yawu, na kuvutukilaka nionso, ti Nzambi, na ntwala ya mbatukulu ya yinza, na ntwala mwa mbuma mosi kumonana, kuna na ntwala ya vwanda na nsemo ya meteor na kukwisa na luzingu, Nzambi zabaka konso kigangwa mpe nionso yina zolaka vwanda na zulu ya ntoto. Ya kele na muntu awa...Beno lenda ve kutendula mpova yayi, mpe kufiongonina yawu, mpe kutuba yinki zola tuba mpova ya “seko.” Ya kele kaka mutindu beno ke bongisaka kamera ya beno na—na seko. Kaka, ya kele kaka, nionso yina ke landaka na manima kuna. Beno me mona? Seko! Mpe beto lenda ve, na dibanza yina kele na nsuka, kubakula yina Dibanza ya seko lendaka banza. Beno me mona, beto lenda ve kusala yawu. Beno, beno lenda ve kusala yawu. Beno me mona? Kasi kana beno tala mbote, ti beno vwanda na Kimpeve, beno lenda mona yawu kuna. Mpe—mpe beno vutuka awa na Masonuku mpe beno ke mona ntangu yina, beno me mona, na ntwala ya mbatukulu ya yinza kuvwanda.

²²² Ntangu yayi, Biblia tubaka ti Yesu Klisto vwandaka Mwana-dimeme ya Nzambi. Ntangu yayi beno kuwa mbote-mbote, samu ti, kana mosi ya beno ke vwanda ve mbasi, na kuwa nsuka ya yawu. Biblia tubaka ti Yesu Klisto vwandaka Mwana-dimeme ya Nzambi, Yandi kufwaka katuka mbatukulu ya yinza. Ya kele kieleka? Na yinki ntangu Yandi kufwaka? Katuka mbatukulu. Yina kele yinza, kana ya salamaka na bitini ya mwa bambuma, yina katukaka na mwini kuna, ntete ya vwanda yina. Na yina, na ntwala ya vwanda na mbuma mosi kutiamunka na mwini, kana yayi vwandaka nsemo ya meteor yina katukaka na mwini, na yawu bamvula nkama mosi ya mafuku na mafunda na mafunda na ntwala ya vwanda na nsemo mosi ya meteor, Klisto kufwaka. Ntangu dibanza ya nene ya Nzambi me baka lukanu na kima mosi, yawu kele kima me manaka. Ntangu Nzambi tubaka, “Ti ya vwanda,” ya kele ya kumana dezia. Kana yawu kubakaka nkama ya mafuku ya bamvula na kusalama, yawu kumanaka kaka na ntangu Yandi tubaka yawu. “Mpe ntangu Mwana-dimeme kufwaka katuka mbatukulu ya yinza,” kaka Biblia mosi, Mpeve kaka mosi sonikaka mpe tubaka, “Ba tulaka bankumbu ya beto na Buku ya Luzingu ya Mwana-dimeme na ntwala ya mbatukulu ya yinza.”

²²³ Na yina muntu yina sonikaka nkunga, “Ya kele na Nkumbu Mosi Ya Malu-malu Yina Me Sonama Kuna Na Nkembo,” nge vwandaka na mabanza ya mbote, kasi yandi vwandaka ve na kati ya masonuku. Beno me mona? Nkumbu yina sonamaka kuna na Nkembo na yina yinza...na yina na ntwala yinza bandaka ve. Ntangu Mwana-dimeme kufwaka, bawu tulaka bankumbu ya beto na Buku ya Luzingu ya Mwana-dimeme.

²²⁴ Bika—bika mu baka mwa Masonuku mosi samu na beno. Beno lenda vingila minuti mosi? Ya me kwisa na dibanza ya munu na ntangu yayi. Mu banza ti mu lenda kuzwa yawu na

nswalu. Mu zaba ve. Mpe awa mu me nyonga na yina mu me baka beno ntangu mingi, kasi mu tubaka na beno na kati-kati ya mpimpa; beto me kuma ntete ve. Kasi mu—mu zola kaka ku—kubaka yayi, kaka mosi ya Masonuku na zulu ya yina.

Beno baka na munu ntangu yayi Buku ya ba-Romain, mpe mu zola ti beno kutanga yayi na munu. Ntangu yayi, beto mona, ba-Romain, kana mu lenda tala yawu, kaka awa. Ntangu yayi beto baka ba-Romain 8, mpe—mpe beto banda na nzila ya 28 ya kapu 8 ya ba-Romain. Mpe mu zola ntangu yayi ti beno kutanga yawu na munu na kati ya mvwandulu ya bisambu. Beno kuwa awa yina Nzambi tubaka awa.

Beto zaba ti mambu nionso ke salamaka samu na mbote ya bayina ke zolaka Nzambi, na bayina kele. . . yandi bokilaka mutindu kele lukanu ya yandi.

Na bantu yina yandi zabaka na ntuala, . . .

²²⁵ Yina ke pesa beno. . . Beno lenda tanga na munu? “Na yandi. . .”

Na bantu yina yandi zabaka na ntuala, yandi zabaka bawu ntete (mbote mingi) samu na kuwanda na kifwani Mwana ya yandi, samu ti Mwana ya yandi kuwanda mbuta ya bampangi mingi.

Na bayina yandi zabaka ntete, yandi bokilaka mpe bawu: mpe bayina yandi bokilaka, nungisaka bawu: mpe bayina yandi nungisaka, yandi kembisaka bawu mpe.

²²⁶ Katuka mbatukulu ya yinza! Ntangu Nzambi talaka na nsi. . . Ntangu yayi, Nzambi ke twadisaka ve kisalu ya Yandi, na kutubaka, “Mbote, awa, mu ke. . . Oh, yinki beto ke sala ntangu yayi?” Beno me mona? Ya kele na kima ve. . .

²²⁷ Beno bambuka moyo, kukondwa mbote, disumu, ya kele mbote yina ba me balula. Diabulu lenda ve kuganga. Muntu nionso, bantu nionso, me bakula yawu? Yayi kele Malongi ya dibuundu yayi. Diabulu lenda ve kuganga. Yandi lenda bebisa yina Nzambi gangaka. Ntangu yayi, yinki kele kubebisa? Awa, beno nionso na kutala, kele ya kukula. Beno kuwa yayi. Beto kele bantu yina me kwelaka. Mpe beno babakala ya kukwela mpe beno bakento ya kukwela beno lenda zinga kintwadi mutindu bakala na kento, mpe bakento yango ke vwanda ata mbala mosi ve ti mutindu bawu vwandaka. . . Bawu kele bamwense, ntangu nionso yina beno ke vwanda na bakala ya beno. Ya kele kieleka. Ntangu yayi, ya kele musiku mpe yina ba me ndima, mpe ya kele nionso ya kulunga. Ya kele Nzambi yina tubaka ti bawu sala mutindu yina. Kento yankaka lenda sala yina kento ya beno ke salaka; mosi ya bawu, beno kele ya kulunga na meso ya Nzambi; mpe kusala mutindu mosi na kento yankaka, beno ke fundisama na ntuala ya Nzambi, na lufwa. Yinki ya kele? Mbote yina ba me bebisa, beno me mona, mbote yina ba me bebisa. Ntangu yayi,

diabulu lenda kuganga ve, kasi yandi ke bebisaka yina Nzambi salaka dezia.

228 Yinki kele luvunu? Ya kele kieleka yina ba me bebisa. Muntu ke tuba, “Oh, beno tala, ya vwandaka na Kilumbu ya sambanu na nkokila, na ngunga ya makumi mosi, yinga, Bill Branham vwandaka na Jeffersonville,” kieleka. “Kuna na nganda ya Antz, ya kulawuka malafu,” luvunu. Ya vwandaka yinki? Mu vwandaka na Jeffersonville. Yina kele kieleka. Ya vwandaka mbote yina ba me balula na luvunu. Beno me mona yina mu zola tuba? Beno me mona, luvunu ke bebisaka yina kele kieleka. Ya kele kima mosi kisika ba vwandaka zonzila na kisika yina mu zolaka vwanda. Ntangu yayi, kana bawu tubaka ti, “Na dibuundu, vwandaka longa,” ya kele kieleka. Yina kele mbote. Yandi me tuba kieleka. “Na nganda, vwandaka kunwa,” ya kele luvunu. Yina ba me balula; beno me mona, kieleka yina ba me bebisa. Beno me mona yina mu zola tuba? Kukondwa mbote kele mbote yina ba me bebisa.

229 Lufwa, yinki ya kele? Luzingu, yina ba me bebisa. Kimbevo? Mavimpi, yina ba me bebisa. Beno fwana vwanda muntu ya ngolo, ya mbote. Mbote mingi. Kana beno kele na kimbevo, yinki ya kele? Mavimpi ya beno ba me bebisa yawu. Beno me mona? Nionso yina ya yawu kele. Yinki ya kele? Beno vwandaka na ntangu ya ntama bantwenya mosi, ya bakento ya kitoko mingi; mpe ya ngolo, babakala ya kitoko mingi. Ntangu yayi mpusu ya beno ke na kufutamaka, beno ke na kukumaka kiboba. Yinki ya kele? Luzingu, yina ba me bebisa, beno me mona, ya ke vutuka diaka. Beno me mona? Mpe ya fwana vutuka diaka. Bika Nkumbu ya Mfumu kusakumunwa! Nzambi silaka na kuvutula yawu. Mpe kaka mutindu ya—mutindu ya kele kieleka (beto zaba ti ya kele awa), na yina kaka mutindu kieleka ya kele, Nzambi ke nata diaka yawu. Yandi silaka mpe kudiaka ndefi ti Yandi ke sala yawu. Yina kele yina ke basisaka yawu.

230 Ntangu yayi, wapi mutindu, mutindu ya bantu beto fwana vwanda? Ntangu yayi beno tala wapi mutindu bima yayi ke salamaka. Ntangu yayi, bayina Yandi zabaka ntete, Yandi bokilaka bawu; bayina Yandi bokilaka, Yandi nungisaka bawu ya kudedama. Yinki ntangu? Na ntwala ya mbatukulu ya yinza, na ntwala yinza kubanda. Ntangu yayi, kana beto lenda baka Masonuku yayi mpe samu na kutendula yawu mbote, beto ke baka bangunga na zulu ya yawu, kasi beto—beto zola ve kusala yawu. Kasi nionso ya kukondwa kudedama awa, kele kudedama yina ba me bebisa na kukondwa kudedama. Ya kele yina diabulu ke salaka.

Ntangu yayi, ntangu beno ke kumaka na mvula ya mbanzulu, mpe beno me zaba yinki kele yimbi mpe mbote, beno fwana bika mavanga ya beno ya yimbi. Samu ti, beno butukaka na disumu, ba butaka beno na disumu ya nkú, kwisaka na yinza na kutubaka baluvunu. Kuna beno—beno butamaka ya kieleka

na luzolo ya kuvukana ya bakala na kento, mpe na manima beno fwana butuka diaka mbala zole, samu na kuzwa Lubutuku ya mbala zole, samu na kukota na Zulu. Samu ti, mutindu ya lubutuku yayi kele na beno awa . . .

²³¹ Beno me mona kisika Bimbangi ya Yehowa kele na kati ya kifu kuna, na kubanzaka ti Lubutuku ya mbala zole kele mvumbukulu ya nzutu? Beno me mona, ya lenda vwanda ve. Beno me mona? Ya fwana vwanda kima . . .

²³² Beno, beno kele na kati ya mpwasika ya ntangu. Mpe ya kele kaka na Seko kele yina kele na mbatukulu to na nsuka ve. Nionso ya Seko kele na mbatukulu ata fioti ve, to ya ke vwanda ata fioti ve na nsuka. Beno me mona? Na yina kana beno kele kitini ya Nzambi, Mpeve yina kele na kati ya beno kele ata fioti mosi ve na mbatukulu to ata fioti ve ya ke kusuka, mpe beno kele Seko na Mpeve yina kele na kati ya beno. Beno me mona? Mutindu mosi na zola ya *Agapao*, kuna na nsi ya kele na zola ya *phileo*, mpe kuna na nsi ya kele na zola ya nsuni. Ya ke landila kaka na kukulumuka mpe na kukulumuka, na kulandila na kubeba tii ya ke kuma kaka kuvukisa mosi ya muvusu. Mbote, nzila kaka mosi, Yesu kulumukaka na kikadi kaka yina, tii awa samu na kutelemisa diaka mpe kuvutula diaka na mutindu ya zulu mingi, na kukatukaka mutindu ya nsi mingi; na kukatukaka na lufwa tii na Luzingu, na kimbevo tii na mavimpi, na kukondwa kudedama tii na kudedama. Beno me mona? Yandi me katuka na mutindu ya Zulu mingi tii na mutindu ya nsi mingi, samu ti Yandi kunata na kisika ya Zulu mingi yina vwandaka na nsi mingi. Yandi me kuma munu samu ti munu, na nzila ya lemvo ya Yandi, mu kuma Yandi, héritier ya Kiti ya kintinu na Nkembo. Beno me mona yina mu zola kutuba? Bima yayi.

Ntangu yayi beno tala. Ntama mingi na ntuala yinza yayi kubanda mwa bambuma ya yawu kuna, ntangu Nzambi monaka yina ke salama, kaka kuna Yandi monaka beno, Yandi monaka munu, Yandi monaka konso sidi, konso nzinzi, konso kiula, konso ngungu. Kima nionso yina zolaka vwanda na ntoto, Yandi monaka yawu kuna. Kieleka, Yandi monaka.

²³³ Ntangu yayi, ata mbala mosi ve ti Yandi tubaka, “Mu ke tinda Mwana ya Munu na nsi kuna mpe bika ti Yandi kufwa, mpe ya lenda vwanda na muntu ke mona Yandi mawa. Mpe ya ke vwanda diambu mosi ya mawa, na kutala ti ya lenda vwanda na muntu yina lenda vuluka.”

²³⁴ Yandi zabaka nani ke vuluka! Yinga, tata. Yandi tubaka, “Mu me yina Esau, mpe Mu me zola Jacob,” na ntuala ti mosi na mosi ya bawu kuzwa siansi ya kumonikisa nani bawu vwandaka, samu ti Yandi zabaka nani bawu vwandaka. Yandi zabaka. Yandi zaba nionso. Yandi zabaka yinki beno ke sala, na ntuala beno kubutuka, to ntangu yinza kubandaka.

²³⁵ Ntangu yayi beno tala. Mutindu beno zaba, mu—mu—mu kele muntu yina ke bulaka munduki. Mu—mu zola minduki. Mpe kento mosi na Texas, mu banza ti ya vwandaka na Texas, yandi natinaka munu Swift, Swift mosi ya nkama zole na makumi zole. Ntangu nionso mu vwandaka zola kuzwa yawu. Mu zolaka kulunguka yawu. Ya kele mwa munduki mosi ya kulutula ngolo na kubula. Ya kele ya disasi ya nkama zole na makumi zole, ya disasi ya bambuma makumi yiya na nana. Mpe beno lenda fulusa yawu na diboko. Ntangu yayi, kompani ya yawu ke tuba ti, “Beni fwana sala yawu ve; ya kele na kigonsa mingi.” Kasi beno lenda fulusa disasi yango na diboko samu mbangu ya yawu kukuma tii na fundu mosi na nkama tanu ya ba-metre na seconde mosi, mpe kukanga yawu na nzila ya yawu. Fundu mosi na nkama tanu ya ba-metre na seconde mosi, yina kele kilometre mosi na tanu na seconde mosi. Na mutindu yankaka, mbemba kele ya kuvwanda, ntama nkama zole ya bametele. Beni ke kubula mbemba, beno tala mansala kudumuka na ntwala beno kuwa munduki kuvutuka. Beni me mona? Ya kele yina, kasi kana beno kotisa kitini ya kupatamana ya mwa yinti yina, ba ke katulaka yina ke kangamaka na meno, mpe beno kotisa yawu na mfututu ya beno, mpe beno tula kaka *yina* kuna, kaka yina lendaka kangama na mwa yiti yina ba ke katulaka yina ke kangamaka na meno; mpe beno kubula kibulu ya marmote yina kele ya kuvwanda na nsuka ya yinzo yayi awa, yawu ke vwanda kaka kuna mpe ke tala beno. Wapi diambu? Disasi ke tiamuka, ya ke na kwendaka mbangu mingi, un- . . . Mpe beno lenda tula lele ya mbeto na kati-kati awa mpe kuna, mpe beno ke mona ata fioti ve mosi ya mwa bitini-bitini kubwa na zulu ya lele ya mbeto. Ya me vutuka; na—na mbombi ve, na mbombi ya volkan, kasi ya ke kwenda ntama mingi na yina. Ya ke vutuka na ngayi ya ntete yina ke pesaka nsongo mpe disasi yina kele na kati kuna. Ya ke vutuka mutindu ya vwandaka nkama ya mafuku na mafuku ya bamvula yina me luta. Ntangu yayi, awa kele na mwa disasi, ya makumi yiya na nana ya bambuma ya disasi yina mu me simba na diboko ya munu, mpe na manima ya seconde mosi ya me vutuka na yina yawu vwandaka nkama ya mafuku ya bamvula me luta. Mpe kana yinza lendaka vwanda diaka nkama ya mafuku ya bamvula, ya lendaka vutuka diaka disasi, ba lendaka vutula diaka yawu, samu ti ba ke yidika diaka yawu cuivre.

²³⁶ Ntangu yayi beno tala yinki Nzambi salaka, mpe kuna beno ke zola Yandi. Na manima beno ke kwenda na yinzo, mpe na suka beno ke lala mwa mingi. Mpe—mpe beno—beno ke zola Yandi mingi diaka. Ntangu yayi, Nzambi kele Mfumu ya kisalu. Bantu yikwa zaba yawu? Yandi kele Mutungi. Mbote mingi. Beni kuwa mbote-mbote. Ntangu yayi, Nzambi ntama mingi, to, bawu ke tubaka. . . Awa beto ke tala dibanza ya bantu yina ke talaka mayele ya bantangu na yawu. Nzambi, nkama ya mafuku na mafuku ya bamvula me luta, ntangu Yandi zolaka sala yinza,

mbote, Yandi bandaka kaka. Ntangu yayi, Yandi vwandaka . . . Yandi vwandaka na dibanza na yintu ya Yandi.

²³⁷ Ntangu yayi beno ke tuba, “Kana Yandi kele nene mutindu yina, Mpangi Branham, wapi mutindu Yandi bikaka ti diabulu kusala disumu?” Mbote, Yandi zabaka, na ntwala diabulu kuvwanda, ti yandi zolaka vwanda diabulu. Nkembo! Ntangu yayi mu ke kukimona mukwikidi. Oh, la la! Yandi zabaka, na ntwala diabulu kuvwanda, ti yandi zolaka vwanda diabulu. Ntangu yayi beno ke kuyufula, “Wapi mutindu yina?” Beno ke tuba, “Samu na yinki Yandi bikaka yandi kuvwanda diabulu?” Samu ti Yandi kumonisa Nzambi. Ya kele samu na yina Yandi salaka yawu. “Samu na yinki ya vwandaka na bantu ya kukondwa kudedama? Samu na yinki?”

²³⁸ Yinki vwandaka ntete, Mvulusi to sumuki? Yinki vwandaka ntete? Mvulusi. Yinki vwandaka ntete, Munganga to muntu ya kubela? Samu na yinki ya pesamaka muswa ti sumuki kuvwanda? Samu ti bisalu ya Yandi kele Mvulusi. Kana ya vwandaka ata fioti ve na musumuki, Yandi zolaka zabana ata fioti ve mutindu Mvulusi. Alleluia! Yandi lenda sala bima nionso kubaluka na nkembo ya Yandi. “Muyidiki banzungu lenda tuba na . . . To, nzungu lendaka tuba na muyidiki banzungu, ‘Nge me yidika munu mutindu yayi?’” Yinki kele na kizunga? Nani kele na ntoto? Yawu kele na maboko ya nani? Paul tubaka, “Oh, muntu ya bulawu, Yandi zonzaka ve ti Yandi tulaka Pharaon samu na lukanu mosi?” Kieleka. Yandi zabaka yawu. Na ntwala ya vwanda na yinza, Yandi zabaka yinki zolaka vwandaka yinki. Mpe Yandi bikaka ti ya vwanda na disumu, samu ti Yandi kuvwanda Mvulusi. Yandi bikaka ti ya vwanda na kimbevo, samu ti Yandi kuvwanda Munganga. Yandi bikaka ti kuyina kuvwanda, samu ti Yandi kuvwanda Zola. Kieleka, Yandi salaka yawu. Yandi kele Nzambi, mpe yawu yina Yandi kele. Mpe Yandi fwana vwanda na kima yina ke talisa binama ya Yandi.

²³⁹ Wapi mutindu beno zolaka zaba ti mpimpa kele, wapi mutindu beno zolaka zaba yawu? Kana nionso vwandaka nsemo ya kilumbu, wapi mutindu beno zolaka zaba ti ya kele na mpimpa? Ya kele na mpimpa, samu yawu talisa nsemo ya kilumbu. Kieleka, ya ke mutindu yina. Amen. Beno me mona yina Yandi salaka?

²⁴⁰ Kasi ntangu Yandi vwandaka kuna, na ntwala ya mbatukulu ya yinza, na ntwala Yandi baka mwini ya nkulu yayi mpe ti Yandi kusala yawu kubaluka pene-pene ya mbwetete ya nkulu yayi yina beto ke zingila ntangu yayi, ntoto yayi, mpe Yandi me sala yawu awa na mwini, mpe me tula yawu na kizunga ya mwini yango. Beto tuba ti, *awa* kele mwini. Yandi me sala yawu na lweka *yayi*, mpe me bika yawu kuvwanda kuna nkama ya mafuku na mafuku ya bamvula. Yinki Yandi vwandaka sala kuna? Mwa gaz. Yandi me kwenda lweka *yayi*, Yandi me yidika kima yankaka. Yinki Yandi vwandaka sala kuna? Mwa potasse.

Yandi me baluka lweka *yayi*, mpe yinki Yandi vwandaka sala awa? Yandi vwandaka sala calcium. Yinki Yandi vwandaka sala? Yandi vwandaka sala beno na munu. Yinki Yandi vwandaka sala? Mutindu mfumu ya ksalu yina me kukubika bayinti ya yandi nionso ya muludi zole na yiya mpe zole na nana, bapano ya yandi, nionso ya yandi ya kubongisa, yandi zabaka bayinzo ya nene yikwa yina yandi zolaka kutunga. Mpe beto kele ya kusala na bima kumi na sambanu ya ntoto, mpe Yandi vwandaka sala beto nionso, mpe tulaka beto kuna na ntwala yinza kuvwanda. Mpe Yandi... Yawu lendaka vwanda yinda mingi na ntangu yina; mu zaba ve yinki yawu vwandaka. Samu na yinki Yandi vwandaka sala wolo, mpe cuivre, mpe kisengo, mpe masa, mpe bima nionso yina? Yandi kele Mfumu ya ksalu. Yandi kele keba ve... Mutungi, Yandi tulaka nionso kuna, nionso vwandaka ya kuzenga mpe ya kuyidika mbote. Ntangu Yandi salaka yawu nionso, ya vwandaka kaka kubasika ya bima ya nene ya volkan. Yandi bikaka bima ya volkan ya nkulu yayi kubasika kuna nkama ya mafuku ya bamvula, samu na kusala calcium. Yinki ya kele? Ya kele kitini ya beno.

²⁴¹ Mpe kuna, na ntwala ya vwanda na mwa ndambu mosi ya luzingu na zulu ya ntoto, baluzingu ya beto vwandaka awa. Alleluia! Na ntwala ditanga mosi ya madidi kuvwanda na ntoto, beto vwandaka awa. Ntangu Adam vwandaka mata mpe kukulumuka disamba ya Eden, mu vwandaka awa. Amen. Yinga, tata. Oh, nkembo! Ntangu Biteki ya bambazi, bambwetete ya suka vwandaka yimba kintwadi, mpe ti bana ya babakala ya Nzambi vwandaka sala mulolo, mu vwandaka awa mu vwandaka vingila mupepe ya luzingu na kukwisa. Mu vwandaka awa. Yandi salaka munu awa, nzutu ya munu vwandaka awa. Yinga, tata. Kana ya vwandaka ve mutindu yina, wapi kisika ya me katuka? Huh? Wapi mutindu ya me kuma awa? Nzambi tulaka yawu na kati awa. Nzambi salaka yawu. Beto kele ya kusala na bima kumi na sambanu: petrole, potasse, mpe nsemo ya yinza, mpe mingi diaka. Beno me mona, beto vwandaka awa.

²⁴² Na manima yinki salamaka? Kuna Nzambi tubaka na Mpeve-Santu, beto ke monisa yawu mutindu kifwanisu, "Ntangu yayi Nge kwenda, mpe Nge kwenda lakisa zola na yinza yayi. Samu ti, Mu kele zola, mpe Nge kele yina me basika na Munu, na yina ntangu yayi Nge kwenda lakisa zola na yinza." Mpe Mpeve-Santu ya nene, beto banza, kwisaka kuna; na mutindu ya kivudi ntangu yayi. Ya vwandaka ve mutindu yina. Samu ti, Mpeve-Santu na Nzambi kele kaka lukanu mosi, kaka lukanu mosi, kaka Muntu mosi. Beno lemvokila munu. Mpe beto tuba ti Yandi kangaka ntoto na mapapu ya Yandi, Yandi bandaka na kufika. Kufika yina kele yinki? Ya kele mutindu nsusu na bana ya yandi, yina ke sala makelele, yina ke lakisa luzolo, "Cott, cott, cott." Oh!

243 “O luzingu, monana!” Yandi bokaka. Yandi talaka bisika nionso. “Mu zola kitoko na zulu ya ntoto yayi. Nsemo, monana!” Mpeve-Santu kele na kati ya kisalu. Mpe ntangu Yandi salaka yawu, mu ke tala; ke na kwisa, mwa masa yina me katuka na mongo ya fioti kuna, yina me katuka na zulu ya calcium yina ke na kubwa na nsi, mpe yina me vukana na potasse. Samu na kusala yinki ba ke na kutula yawu kintwadi? “Luzingu, monana!” Mpe mwa felele mosi ya Paki me basisa yintu ya yandi na nsi ya ditadi. “Kwisa awa, Tata, tala yayi.”

244 “Ya kele kitoko. Landila kaka na kufika.” Na kufikaka Yandi me monikisa bafelele. Yandi monikisaka musitu nionso. Yandi monikisaka luzingu ya baniamu. Bandede basikaka na kati ya mfundu-mfundu bawu dumukaka. Na manima ya ntangu fioti, bakala mpe kento me monana; bakala me monana, mpe bakala vwandaka bakala mpe kento na mbala mosi. Muntu ya banzutu zole ve, ntangu yayi. Ya ke kaka ti, na kati ya yandi, ya vwandaka na mpeve ya kento.

245 Ntangu beno ke baka bakala yina kele mutindu kento, yandi lenda vwanda ya kulunga, nionso ya kulunga, kasi ya kele na kima mosi yina kele mbote ve. Mpe ntangu beno ke baka kento, yina zola kuzenga nsuki mpe kulwata salopete, mpe yina ke kwenda kuna, mpe, “Nzambi kusakumuka, mu ke zonza na beno!” Ya kele na kima mosi yina kele mbote ve. Kento ke na mpeve ya kento, mpe bakala kele bakala. Beto zaba yawu. Mpe beno zaba yawu. Ya ke monana mbote ti kento, kumeka na kuvwanda, kusala mutindu bakala?

246 Beno tala, mu vwandaka ya kuvwanda kilumbu mosi, mu vwandaka mukengi-mbingu awa, mpe mu vwandaka ya kuvwanda na bus mpe mu vwandaka kuna mpe mu vwandaka bula na dikulu ya kento yayi, na diboko ya munu, kuzonzaka na yandi, mpe mu vwandaka zaba ve ti yandi vwandaka kento. Yandi lwataka mosi ya bayimpu ya bisadi-bisengo, na mineti mosi ya nene ya kisalu mutindu *yayi*, mpe mu vwandaka ya kuvwanda kuna, mpe yandi vwandaka zonza diambu mosi yina salamaka. Yandi tubaka, “Nge zaba,” mpe yandi tubaka, “mpe mazono na nkokila,” na kutala yandi vwandaka na nzutu ya ngolo, yandi vwandaka kunwa tabaka. Yandi tubaka, “Mazono na nkokila, mu zonza na nge, muntu yina syelumukaka, na zulu ya kima yina. Yandi tubaka, ‘Oh, la la!’ Yandi kubwaka na nsi kuna.” Yandi tubaka, “Mu me sekaka ntete mingi ve mutindu yina na luzingu ya munu.”

247 Mpe mu vwandaka seka, beno zaba, mutindu *yayi*. Mu tubaka, “Mwana, yina vwandaka diambu, mutindu yina ve?” Beto vwandaka ya kuvwanda kuna kwenda zonzaka mutindu yina. Mpe kana yandi katulaka kima yina ve mpe ti yandi ningisaka yintu ve, mpe yandi vwandaka na kubongisa kuna, ti mu zabaka ti yandi vwandaka kento. Ata mbala mosi ve na

luzingu ya munu mu me kukimonaka fioti. Mu—mu tubaka, “Nge kele kento?”

Yandi tubaka, “Samu na yinki, mu kele kento!”

²⁴⁸ Mu tubaka, “Lemvokila munu.” Ata mbala mosi ve mu me monaka mambu ya mutindu yayi. Ntangu yayi, ti, yayi kele kieleka.

²⁴⁹ Mu monaka kilumbu mosi bisono mosi, yina salaka mutindu ya kupesa munu nsayi. Ya vwandaka na bisono ya nene kuna, yina vwandaka tuba, “Bakento me kubama na kulwata bilele.” Mu banzaka, “Nkembo na Nzambi samu na yawu.” Beno me mona? Kasi, mu bakulaka ti, ya vwandaka kaka mutindu mosi ya bilele yina bawu salaka dezia, beno zaba. Kieleka mu—mu banzaka ti bawu ke banda na kulwata bilele. Kieleka mu banzaka mutindu yina. Ya vwandaka tuba, “Bakento me kubama na kulwata bilele.” Mu tubaka, “Nkembo na Nzambi samu na bawu. Yina kele mbote. Kieleka ti, mu me tonda Mfumu samu na yawu.” Kasi, beno me mona, ya vwandaka kaka mutindu mosi ya bilele yina bawu salaka dezia, kima mutindu yina. Ya vwandaka kima mosi ya ngitukulu, mutindu yina ve, na yinsi yayi? Mbote mingi.

²⁵⁰ Kuna ntangu Adam kumonanaka. Mpe na manima ya monanaka ti Adam vwandaka yandi mosi, na yina Yandi bakaka na lweka ya yandi lumpanzi mpe salaka Eve, kigangwa na nzila ya yandi. Yandi salaka. . . Yandi katulaka mpeve ya kento na Adam, mpe kotisaka yawu na kati ya kento, mpeve ya luzolo, bukento, zola, lembami. Mpe Yandi bikaka mpeve ya bakala na kati ya Adam. Ntangu yayi, kana ya kele na kima ya luswaswanu, kubeba kele kisika mosi kuna. Ntangu yayi, mpe kuna bawu zole vwandaka mosi.

²⁵¹ Mpe na yina bika beto baka mwa kifwanisu na ntwala beto manisa. Beno tala. . . Awa, ya kele Adam yina bakaka Eve na diboko mpe bawu me kwenda. Mu zola mingi disolo yayi. Mpe bawu kwendaka, beno zaba. Mpe Eve tubaka, “Oh, ya zola, nge zola tuba ti nge salaka yawu?”

“Yinga, mu pesaka yawu nkumbu.”

“Kasi wapi mutindu nge ke bokilaka yawu?”

“Ya kele mpunda. Uh-huh.”

“Yayi kele yinki?”

“Ya kele ngombe ya kento. Uh-huh.”

“Nge pesaka yawu nkumbu yina?”

“Yinga. Uh-huh.”

²⁵² “Wapi mutindu nge ke bokila yina, bawu zole yina kele ya kuvwanda kuna na bayintu ya bawu kintwadi?”

“Bawu kele bandeke ya zola.”

253 “Oh, mu me mona. Mu me mona.” Mpe bawu me landila mutindu yina. “Mpe yayi na zulu awa kele yinki?”

“Mu ke bokila yawu, *yayi*, mpe yayi awa.”

254 Mpe, “Oh, mu me mona. Uh-huh. Ya kele kitoko mingi.” Mpe nkosi mosi me boka. “Wapi mutindu nge ke bokilaka yandi yina?”

“Yina kele nkosi.”

“*Yayi* kele yinki?”

“Tigre.”

255 Mpe, oh, mutindu. . . “Oh, mu me mona.” Mutindu kaka bana ya nyawu, beno zaba, yina ke na kusalaka makelele.

256 Kuna, na manima ya mwa ntangu, yandi me tala bisika nionso. Yandi me tuba, “Cherie, tala kuna, mwini ke na kukota. Ya me kuma ntangu ya kukwenda na yinzo-Nzambi.”

Beno zaba, ya kele na kima mosi na ntangu mwini ke kotaka, beno ke zolaka kukembila. Kana beno ke kwenda ve na yinzo-Nzambi na nkokila yina, beno ke zola kukwenda kota na kivinga mosi, kutanga Biblia. Bantu yikwa ke zolaka kusala yawu, kuvwanda nge mosi? Beno me mona? Ya kele ya kulunga na muntu na kusala mutindu yina. Beno fwana sala yawu.

“Ntangu ya kukwenda na yinzo-Nzambi.”

257 Awa, ata mbala mosi ve ti bawu tubaka, “Awa, vingila minuti mosi ntangu yayi, ntangu yayi, Jones kele mosi ya ba-Assemblée, mpe beto kele ya. . .” Ve, ya vwandaka ve kima ya mutindu yina kuna, na yina bawu kwendaka kaka. Bawu vwandaka ve na dibuundu, na bakiti ya mbote ya kuvwanda mutindu yina. Bawu kwendaka kaka na nsi ya cathedrale ya nene ya bayinti, mpe bawu fukamaka.

258 Mpe nsemo ya Halo yina vwandaka na zulu kuna na mulaka kuna. Beno me mona? Mu lenda kuwa Ndinga kuzonza kuna mpe kutuba, “Bana ya Munu me sepela bubu yayi, na zulu ya ntoto, yina Mfumu Nzambi ya beno me pesa beno?”

259 “Yinga, Mfumu, beto me sepela bubu yayi.” “Cherie, beto me sepela ve?”

260 “Yinga. Yinga, ya zola, beto me sepela.” “Mfumu, kieleka beto zola Nge mingi. Ntangu yayi mu ke lala.” Beno me mona? Mpe yandi me lambula diboko ya yandi ya nene, mpe yandi me lala, na zulu ya diboko ya yandi, mpe yandi me lalisa tigre mpe nkosi, mpe me lalisa nionso; nionso vwandaka na ngemba.

261 Na yina Nzambi kulumukaka mpe Yandi nataka, oh, nkonga ya Bawanzio, Gabriel, kigangwa ya Yandi ya Mazulu. Kuna bawu me kulumuka mpe ke kota na kutambulaka na nsongi ya makulu na kivinga mosi, beno me mona, bawu me mona bisika nionso. Gabriel ke tuba, “Kwisa awa, Tata. Kwisa awa. Tala awa. Yandi yayi. Tala awa, bana ya Nge me lala awa.”

262 Bantu yikwa na kati awa me kwendaka na lweka ya mbeto, ndambu ya beno bamama, nge na papa kintwadi, mpe kutala mwana-bakala ya leki, mwana-kento ya leki, mpe mosi na mosi ya beno ke tuba, “Yandi kele ve—kele ve mutindu mosi na nge, ti *yayi* mpe *yina* mutindu mosi na nge?” Beno me salaka ntete yawu? Oh, bambala mingi mu ke kwenda mpe ke tuba na Meda, na yina me tala Joseph. Yandi ke tuba, “Bill, yandi kele na mbunzu ya yinda mutindu mosi na nge.”

263 “Yinga. Kasi, Meda, yandi kele na meso ya nene mutindu nge.” Samu na yinki? Yandi kele ndambu ya mbu- . . . Yandi kele mbuma ya makwela ya beto—ya beto.

264 Ntangu yayi, mpe Tata tubaka, yandi lenda tuba yawu samu na yayi. Yandi tubaka, “Beni zaba . . .” Mpe Gabriel ke tuba, “Nge zaba, yandi kele kaka mutindu mosi na Nge.” Ya kele mutindu yina Nzambi kele; kukitala. Ya kele mutindu yina Nzambi kele. Yandi kele mutindu mosi na beno. Beno kele bana ya Yandi. Bantu yikwa zaba yawu? Beno me mona?

265 Ntangu yayi beno tala mbote. Wapi mutindu ya luzingu yina kele na nsi mingi? Kiula. Wapi mutindu ya luzingu yina kele na zulu mingi? Muntu. Kieleka. Mpe wapi mutindu yina kele ya zulu mingi? Ya ke katuka na ya nsi mingi, ya ke kwenda na ntwala, ya ke katuka na kiula na *yayi* mpe na *yina*, mpe na ndeke, tii, nionso yina, na mutindu ya luzingu ya zulu mingi, tii ya ke kuma na mutindu ya zulu yina ya lenda kuma, kuna ya vwandaka na kifwanisu ya Nzambi. Beno bawu yayi. Mpe bawu salaka kento na kifwanisu ya Nzambi ve, kasi na kifwanisu ya bakala. Beno me mona?

Ntangu yayi, ntangu yayi, bawu yayi. Mpe Nzambi ke talaka bawu, ke tubaka, “Yinga, bawu kele—bawu kele kitoko.”

266 Yina vwandaka yinki, mpangi-bakala? Bawu zolaka kufwa ata mbala mosi ve. Yina vwandaka mwa diboko mosi ya calcium, potasse ya ntete, mpe nionso bandaka mutindu yina. Ya kele ve kitoko mingi? Kasi disumu me kwisa mpe me bebisa kifwanisu. Ntangu yayi, Nzambi kele . . . Yinki Nzambi pesaka yawu muswa na kusala? Samu na yinki Yandi pesaka yawu muswa na kuvwanda mutindu beto vwandaka zonzila yawu na mwa ntangu me luta? Yandi pesaka yawu muswa samu Yandi kulakisa ti Yandi vwandaka Mvulusi. Yandi salaka yawu. Yandi bikaka ti kimbevo kuvwanda, samu Yandi kulakisa ti Yandi vwandaka Munganga. Yandi bikaka ti lufwa kuvwanda, na kulakisa ti Yandi vwandaka Luzingu. Beno me mona? Yandi bikaka ti nionso ya yimbi yayi kusalama, na kulakisa ti Yandi vwandaka mbote, yina Yandi vwandaka. Beto ke . . .

267 Beno ke tubilaka kuyimba disolo ya mpulusu! Oh, mpangi-bakala, ntangu Yesu ke kwisa, Dibundu yayi—yayi ke vwanda kuna na nsongi ya ntoto yayi mpe ke yimba masolo ya mpulusu, ntangu Bawanzio ke kulumusa bayintu ya bawu, bawu ke zaba

ve yina beto ke na kuzonza. Mbote, ata mbala mosi ve bawu kuzimbanaka. Bawu zaba ve na yinki beto me luta. Beto zaba yinki zola kutuba kuvwanda ya kuzimbana mpe kusengumuka diaka. Oh, mutindu beto lenda kembila Yandi! Yandi kele ve Mvulusi samu na bawu. Ata mbala mosi ve ti bawu me vwandaka na nsatu ya mpulusu. Yandi vwandaka ve Munganga samu na bawu. Ve. Nkembo! Yandi kele ve—Yandi kele ve Luzingu samu na bawu. Kieleka ve. Ata mbala mosi ve ti bawu kufwaka na disumu mpe na mambi. Beto kufwaka, mpe ba vutulaka beto na luzingu. Beto bawu yayi. Yinki beto ke tuba, na manima ya kukatula yimpu ya beto, “Oh, nge kele Reverend *Kingandi*”? Ve, ve, ve, ve, ve. Nkembo nionso na Yandi! Ya kele yina. Beno bawu yayi. Kuna beto ke zonza disolo ya wapi mutindu beto nungaka. Ntama mingi ve beto ke zaba yawu mbote.

²⁶⁸ Kuna, na manima kuna, yinki salamaka? Kuna Nzambi tubaka kaka, “Mbote, Mu lenda kaka kubebisa potasse ya Munu nionso mpe calcium. Ya kele nionso ya kubeba”? Ve, ve. Yandi zabaka ti ya zolaka vwanda mutindu yina.

Ntangu yayi, awa, kana Mpeve-Santu me sala munu yina mu kele, mpe ti mu ke kudiaka mpe ti mu ke pesaka yawu na nzutu ya munu, mpe kusala yina mu kele ntangu yayi. Ntangu yayi, na kutala, mu vwandaka ya kusala na mutindu mosi. Konso kifwanisu yina Nzambi monaka, na ntwala ya mbatukulu ya yinza, ya kukula, me monana. Beno me mona? Ya me katuka na kento, mutindu Yandi tubaka ti ya ke vwanda; mbala yankaka yina, ya katukaka na Nzambi. Ya me katuka ntangu yayi, na nzila ya kento; ya me katuka mbala yayi, na nzila ya Bakala. Beno me mona? Ya kwisaka mbala yina, na nzila ya kuvukana ya bakala na kento; ya me kwisa mbala yayi na nzila ya Ndinga yina Nzambi me tuba. Beno me mona?

²⁶⁹ Mbote, ntangu yayi, ya lenda vwanda na kima yina lenda sala munu mpasi? Ve, tata. Ya kele na kima ve yina lenda sala munu mpasi. Paul tubaka, “Ata mambu ve ya ntangu yayi, mambu yina ke kwisa, kubela, lufwa; diambu ve lenda kukabula beto na zola ya Nzambi yina kele na Klisto.” Ya kele na kima ve yina lenda kukabula beto.

²⁷⁰ Mutindu mwa disolo yina mu ke zonzaka. Ya me bikana na munu kaka bansuki tanu samu mu kuma na dibandi, ya kieleka. Mpe mu vwandaka sanda mwa fioti yina awa mwa bilumbu me luta, kento ya munu tubaka, “Billy, na kutala nge me kuma na dibandi.”

Mu tubaka, “Kasi mu me zimbisaka ata mosi ve.”

Yandi tubaka, “Wapi yawu?”

²⁷¹ Mu tubaka, “Wapi kisika yawu vwandaka na ntwala mu kuzwa yawu?” Beno me mona? “Ya kele kisika yina yawu vwandaka ntete na ntwala mu kuzwa yawu.”

Na kutala, ya vwandaka na ntangu mosi, na nkama ya bamvula me luta, bansuki nionso yayi vwandaka awa ve, kasi ya vwandaka awa na mfundu-mfundu. Ya kele kieleka? Na manima ya bamvula makumi tanu me luta, yawu bandaka na kwisa na zulu ya yintu ya munu. Yawu me katuka wapi kisika? Na mfundu-mfundu. Mpe ntangu yayi yawu ke na kuvutuka na kisika yawu vwandaka. Ya kele kieleka? Yawu vwandaka ve, na manima yawu me vwanda, mpe ntangu yayi yawu kele ve. Yinki ya kele? Yinki me sala yawu yina ya kele? Nzambi! Yandi yayi. Yandi salaka kifwani, mpe tubaka, “Ya kele mutindu yayi Mu zola ti yawu kuvwanda.”

²⁷² “O Lufwa, wapi ntunga ya nge? Ntoni, wapi lununga ya nge?” Beno ke zika munu na mosi ya bilumbu yayi awa. Mu zaba ve. Kasi, mpangi-bakala, mu ke vwanda ya kufwa ve. Mu ke zabisa beno. Ve, tata. Oh!

Beto ke vumbuka na lufwa, (Alleluia!)
 Beto ke vumbuka na lufwa!
 Na suka ya mvumbukulu,
 Na yina bisengo ya lufwa ke tiamuka,
 Beto ke vumbuka na lufwa, (Alleluia!) beto ke
 vumbuka na lufwa!

Kima ve ke kanga munu na kuyimba. Ya ke vwanda ve na mingi ya bampeve ya yimbi na difelo nionso yina lenda kanga munu na kuvumbuka na lufwa. Ya kele na kima mosi ve na kisika mosi ve yina lenda kanga munu na kuvumbuka na lufwa. Mu ke na nsilulu ya Nzambi. Mu ke na Mpeve-Santu. Mu ke na Zoe, Luzingu ya Seko ya Nzambi, ya ke na kuzinga na kati awa. Mikwa ya kununa yayi katukaka kuna, mpe Nzambi fikaka munu na kubasika na ntoto. Mpe kana Yandi Yina fikaka munu na kubasika na ntoto. . .

²⁷³ Ntangu mu kumaka mbuta, kuna, ntangu nionso mu vwanda kuwa ngunga ya yinzo-Nzambi, Kima mosi vwandaka tuba na munu, mu vwandaka mwana-bakala ya leki. Wanzio mosi zonzaka na mulaka mosi, Yandi tubaka, “Kunwa malafu to makaya ata fioti ve. Mu ke na kusalu ya kusala na nge. Kusumukisa nzutu ya nge ve, na kubasikaka na bakento mpe bima yina. Nge, Mu ke na kima ya kusala na nge ntangu nge ke kuma mbuta.”

“Nge kele nani? Nge kele nani?”

²⁷⁴ “Nge ke zaba yawu mbote na ntwala.” Na manima ya mwa ntangu fioti, Yandi yayi me kwisa. Yandi me vwanda na zulu kuna na ntangu ya mbotika. Yandi me monana Yandi mosi. Yandi me pesa kimbangi ya Yandi mosi. Yandi me pesa bamvutu. Mu ke mona Yandi ya kutelama kuna, bisika nionso, na balweka nionso.

²⁷⁵ Wapi mutindu beno lenda, kana Yandi me sala munu yina mu kele, na kuvwandaka na ata na nsodolo mosi ve ya kusala. . . ?

Ata mbala mosi ve ti mu vutukaka kuna mpe tubaka, “Ntangu yayi, Charlie Branham, nge kwela Ella Harvey mpe basisa munu na ntoto.” Ve, tata. Ata mbala mosi ve ti mu soolaka yawu. Ya kele Nzambi salaka yawu.

Mpe kana Yandi me sala munu yina mu kele, kukondwa ti munu soola; wapi mutindu ya kulutila, ntangu Mpeve-Santu ke kwisa fika munu, mpe mu ke tuba, “Yinga, Mfumu, Nge kele Ngangi. Mu zola Nge, mpe mu me ndima Nge mutindu Mvulusi ya munu!” Wapi mutindu beno lenda kubumba munu na kati ya mfundu-mfundu? Beno lenda ve kusala yawu, mpangi-bakala. Beno lenda ve kusala yawu.

²⁷⁶ Ata mbala mosi ve ti Nzambi kusalaka kitini ya calcium yayi, to ya potasse, to ya kima nionso, samu ti yawu—yavu beba. “Nionso yina Tata pesaka Munu, na ntuala ya mbatukulu ya yinza, ke kwisa na Munu.” Fiuu! Mu ke na nsatu ya kuboka; kieleka mu zola kusala yawu. “Nionso yina Tata me pesa Munu ke kwisa na Munu, mpe ata mosi ya bawu ve ke zimbana, kasi Mu ke vumbula yandi diaka na mvumbukulu.” Mu kuwaka Yandi kubokila, mpe me kwisa na Yandi. Wapi mutindu bawu lenda kukanga munu na kati ya mfundu-mfundu ya ntoto? Ya kele na ata mfumu ya kisalua ya yinzo ya bamvumbi na yinza ve yina lenda bula munu pawu na kizizi, bawu ke lenda ve kukanga munu na kati ya mfundu-mfundu ya ntoto. Mu ke vumbuka kilumbu mosi mpe mu ke vwanda mutindu mosi na Yandi, ya kusukula na Menga ya Yandi, ya kubutuka na Mpeve ya Yandi! Alleluia! Beno baka ba-denomination nionso beno zola; Mu ke baka Yesu. Amen!

²⁷⁷ Muntu ya kisalua ya assurance kwisaka na munu. Wilmer Snyder, mosi ya bankundi ya munu ya mbote. Yandi tubaka, “Billy, mu zola kutekisa nge police ya assurance.”

²⁷⁸ Mu tubaka, “Mu ke na yawu dezia.” (Kento ya munu talaka munu, mutindu ya kutuba, “Samu na yinki nge ke na kuvunaka, mwana-bakala?”)

Yandi tubaka, “Nge ke na assurance?”

Mu tubaka, “Yinga, tata.”

Yandi tubaka, “Nge salaka yawu na yinki kompani? Na wapi yina?”

²⁷⁹ Mu tubaka, “Assurance ya lukumunu, Yesu kele ya munu, oh, luwu ya ntete ya nkembo ya Nzambi! Héritier ya mpulusu, yina Nzambi futilaka, ya kubutuka na Mpeve ya Yandi, ya kusukula na Menga ya Yandi.”

²⁸⁰ Yandi tubaka, “Yina kele mbote, Billy, kasi yina ve ke tula nge na maziami.”

²⁸¹ Mu tubaka, “Ya ke basisa munu.” Alleluia! Mu ke na boma ve na kukota; yawu me tala kubasika.

²⁸² Na yina, mu ke na assurance yina ke tuba na munu, “Mu ke vutula. Nionso yina Tata me pesa Munu kele ya Munu.” Mu ke kipe ve yina papa ya munu kusalaka, yina mama ya munu kusalaka, yina nionso vwandaka. “Nionso yina Tata pesaka Munu ke kwisa na Munu, mpe ata muntu ve lenda kwisa kana Tata ya Munu kubenda yandi ve.” Alleluia! Samu na yinki Yandi bendaka bawu? “Mu zabaka bawu na ntwala ya mbatukulu ya yinza. Ntangu Munu fwaka Mwana-dimeme, Mu kufwaka yandi na Yandi.” Amen. “Mu soolaka ntete Dibuundu.” Kusoola ya ntete kele ya nani? Ya Dibuundu. Wapi mutindu beno ke kotaka na Dibuundu? “Na nzila ya Mpeve mosi beto nionso kele ya kubotama na Nzutu mosi.” Yandi zabaka, na ntwala ya mbatukulu ya yinza, ti beto ke vwanda kuna. “Mpe bayina Yandi zabaka ntete, Yandi me bokila bawu. Bayina Yandi me bokila, Yandi me nungisa bawu. Bayina Yandi me nungisa, Yandi me kembisa bawu dezia.”

²⁸³ Na Babuku ya Nzambi, Yandi tubaka ti Yandi ke kutana na munu kuna. Badiabulu nionso ya difelo lenda kubumba bawu bisika yankaka ve mpe kubumba bawu na kwisa kuna ve, samu ti Nzambi tubaka yawu dezia, mpe yina ke sukisa yawu. Nkama ya mafuku na mafuku ya bamvula na ntwala yinza kuvwanda, bambwetete ya suka vwandaka yimba kintwadi mpe bana ya babakala ya Nzambi bawu vwandaka sala milolo, na ntwala ya vwanda na mbatukulu ya yinza, beno me mona, ntete ya vwanda na mband- . . . , mpe Bambazi mpe nionso vwandaka na nsayi, bawu vwandaka sala miloolo samu na yina, ntete ya vwanda na mbatukulu ya yinza, wapi mutindu diabulu lenda kubumba munu na kati ya mfundu-mfundu ya ntoto? Yandi lenda ve kusala yawu. Beno me vuna ve.

²⁸⁴ Bika beto tala, ntangu yayi. Mu ke na ntangu ya ba-democrate, awa. Mu ke na ngunga ya makumi zole na zole na makumi yiya. Yina kele kaka ngunga ya makumi zole na mosi na makumi yiya. Ya kieleka, Mpangi Wood? Ya kieleka, ngunga ya makumi zole na mosi na makumi yiya. Bantu nionso ke na nsayi?

Oh, mu ke na nsatu ya kukwenda,
Mu ke na nsatu ya kukwenda;
Yinzo ya munu ya Mazulu kele kitoko,
Mpe mu ke na nsatu ya kukwenda.

Oh, mu ke na nsatu ya kukwenda,
Mu ke na nsatu ya kukwenda;
Yinzo ya munu ya Mazulu kele kitoko,
Mpe ntima ya munu ke na nsatu ya kukwenda.

²⁸⁵ Beno zola bankunga ya ntama ya mutindu yayi? Ya kele na mosi yina beto vwanda yimbila, ya vwanda kima ya mutindu, “Lemvo mpe mawa sengumunaka munu. Kuna Mbwetete ya Nsemo mpe ya Suka vwandaka sema.” Yinki yawu kele, Mpangi Gertie? Beto tala yawu. Wapi mutindu. . . Yinki yawu kele,

Mpangi Neville? Beno me mona, ya kele kima mosi mutindu, “Lemvo mpe mawa kusengumunaka munu. Kuna Mbwetete ya Suka vwandaka lakisa ya Yandi...?...pene-pene ya munu.” Uh-huh. Yinga. “Na kulunsi.” Pesa beto noti ya yawu, mpangi-kento, ya, *Pene-pene Ya Kulunsi*. Kwisa awa, Mpangi Neville. Oh, mu zola yayi. Bantu yikwa zola bankunga yayi ya ntama yina me twadisama na kimpeve? Beno lenda vwanda na nionso ya kumata mpe kukulumuka ya boogie-woogie yina beno zola. Beno pesa munu yayi, “Awa kele kisika lemvo mpe mawa kusengumunaka munu.” Ya kele yina. Mbote mingi, na malembe ntangu yayi.

Yesu, bumbaka munu pene-pene ya kulunsi,
 Ya ke na kiziba ya kitoko,
 Nzila ya kubeluka, ya mpamba samu na muntu
 nionso,
 Yina me katuka na mongo ya Calvaire.
 Na kulunsi, na kulunsi,
 Vwanda nkembo ya munu ntangu nionso;
 Tii mwela ya munu ke kwenda na zulu
 Kupema na manima ya nzadi.

²⁸⁶ [Mpangi Branham me banda na kuyimba na yinwa ya kukanga *Pene-pene Ya Kulunsi*—Mu.] Oh, wapi mutindu ya kele kitoko mingi! Beno banza na yawu! Yinki kana ya vwandaka ve na Mvulusi? Yinki kana beto kuzwaka ve Ndinga yayi? Yinki kana Yandi bokilaka beno ve? Yinki kana Yandi zabaka beno ntete ve, mpe ti beno vwandaka na nganda awa na bayankaka yayi ya yinza na nkokila yayi? Beno zola Yandi? Oh, la la! Beno kuzimbana ve balukutakanu na suka, awa, na ngunga ya yivwa na makumi tanu.

Na kulunsi, na kulunsi,
 Vwanda nkembo ya munu ntangu nionso;
 Tii mwela ya munu ke kwenda na zulu
 Kupema na manima . . .

²⁸⁷ Ntangu yayi pesa beto noti ya *Kisika Na Kiziba*. Nkunga yayi ya mbote ya ntama, “Ya kele na kisika na Kiziba.” Bantu yikwa zaba yawu? “Kisika, kisika, yinga, ya kele na kisika, kisika na Kiziba.” Na ntangu beno ke na kuyimba yawu ntangu yayi, beno baluka na malembe, mpe beno pesa mbote na mpangi-bakala, yina kele pene-pene ya beno. Beno zaba, ya kele na kisika ntangu yayi samu na ba-Methodiste nionso. Ya kele na kisika samu na ba-Baptiste. Ya kele na kisika samu na bantu ya Pentecote. Ya kele na kisika samu na beto nionso ntangu yayi, na Kiziba. Bantu yikwa zaba nkunga yayi ya ntama? Oh, kieleka beno zaba yawu. Ndambu ya beno bantu ya ntangu ya ntama ntangu yayi, yayi kele nkunga ya mbote, ya ntama ya Kentucky ntangu yayi.

Kisika, kisika . . .

Beno pesana mbote.

. . .yinga, ya kele na kisika,
 Ya kele na kisika na Kiziba samu na nge;
 Kisika, kisika, yinga, ya kele na kisika,
 Ya kele na kisika na Kiziba samu na nge.

Oh, kisika, kisika, ya kele na bisika mingi,
 Ya kele na kisika na Kiteko samu na nge;
 Oh, kisika, kisika, yinga, ya kele na kisika,
 Ya kele na kisika na Kiziba samu na nge.

²⁸⁸ Ntangu yayi, mu ke na mwa kima mosi ya kuyitukisa samu na beno. Malongi nionso ya nsuka, mpe babuku, mpe nionso, ke tekama na lweka yankaka ya nsuka ya dibuundu, sabala ke kwisa, na balukutakanu; babande mpe nionso, mpe nionso, na mutindu ya mikanda ya kitoko. Ya ke vwanda na mesa na manima kuna, na kati ya mosi ya bivinga. Mpe mikanda, malongi ya nsuka, mpe mwa masonuku ya mbote yina ba basisaka ntete, na babuku ya malu-malu, na kubasika ya malu-malu, ba ke tula nionso, na nsuka ya yinzo, na Kilumbu ya tatu yina ke na kwisa na nkokila.

Mpe beto ke na kuingila na kuzwa ntangu ya mbote na Mfumu. Beno kwisa, awa, na mpeve ya kusambila. Ntangu yayi, beno bokila bambevo mpe bayina ya beno yina ke na kudila, beno sonikina bawu mukanda. Beno nata bawu awa. Beto ke. . . Nzambi ke sala na ngolo. Mpe beto zaba ti Yandi ke sala yawu ntangu yayi.

²⁸⁹ Mpe ntangu yayi mu me kwenda na muntu nionso yina mu zabaka, vwandaka na mwa diambu mosi. Ntangu yayi kana ya kele na diambu yina kele na nzila ve, beno bambuka moyo, mu tubaka na beno ntama, ti beto ke sungika yawu. Mpe mu zaba ti beno zaba ti ya kele na mpeve ya mutindu yankaka awa na yina vwandaka ntete. Beno me mona? Beno me mona? Beno me mona? Ya kieleka. Ntangu yayi, beno bika yawu kukwenda ve ata mbala mosi ve. Mu me tula yawu na zulu ya beno na ntwala ya Yesu Klisto, beno bika yawu ve kukwenda. Beno vwanda kaka awa na yawu, beno me mona, kubumba nionso kaka mbote mpe kulandila na kukwenda. Beno kele bampangi. Ata mbala mosi ve ti ya kele mpangi ya beno ya bakala to ya kento yina ke salaka yimbi; ya kele mpeve yina ya diabulu yina ke kotaka na kati kuna. Beno me mona, yandi ke kwendaka bisika nionso. Mpe mona kaka mawa mpangi-bakala to ya kento, mpe beno zaba ti ya kele Satana yina ke na kukota na kati-kati. Kana beno kuzwa nsatu mosi samu na yawu, beno basisa yawu na mbangu nionso na kati ya beno, beno me mona, samu ti yawu ke kudia beno. Yinga, ya ke sala yawu. Na yina, beno vwanda ntama na yawu. Beno bambuka moyo na yawu.

Ya kele na kisika, kisika, bisika mingi,

Ya kele na kisika samu na ba-Methodiste, kisika samu na ba-Baptiste, kisika samu na ba-Presbyterien. Ya kele na bisika samu na beto nionso.

Kisika, kisika, yinga, ya kele na kisika,
Ya kele na kisika na Kiziba samu na nge.

²⁹⁰ Bantu yikwa ke na kubambuka moyo na nkunga ya beto ya ntama yina beto vwanda yimbaka ntete beto kukabuka, kuna?

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesaka nsayi,
Bisika nionso Yawu ke kwenda.

Mu zola ti nge vwanda na beto, Mpangi Jeffreys, nge na Mpangi ya kento Jeffreys, mpe bana-babakala kuna, mpe bawu nionso.

Mpe beto ke fukama na Nkumbu ya Yesu,
Beto ke fukama na makulu ya Yandi; (Oh, la la!)
Samu na kubyadisa Yandi ntinu ya bantinu na Mazulu,
Ntangu nzietolo ya beto ke suka.

Baka Nkumbu ya Yesu na nge,
Mutindu Kinwaninu ya kukeba bubu yayi;
Oh, ntangu bampukumunu ke finama,
Niunguta Nkumbu yango na kisambu.

Oh, mu zola yawu. Beno ve? Nkumbu ya kitoko ya Yesu! Ntangu yayi, beto telama awa, na yina beto ke yimba ntangu yayi. Mbote mingi.

Baka Nkumbu ya Yesu na nge,
Nge mwana ya mawa mpe ya kiadi;
Yawu ke . . . (. . . ? . . .)

Oh mutindu ya kele mbote!
Kivuvu ya ntoto mpe nsayi ya Mazulu;
Nkumbu ya kitoko (Oh Nkumbu ya kitoko), Oh mutindu ya kele mbote!
Kivuvu ya ntoto mpe nsayi ya Mazulu.

²⁹¹ Yayi kele mwa mutindu yankaka awa. Bika beto kulumusa bayintu ya beto ntangu yayi, mpe, kukondwa makelele, beto telemisa diboko mosi. Beno tuba:

Beto ke fukama na Nkumbu ya Yesu,
Beto ke fukama na makulu ya Yandi,
Samu na kubyadisa Yandi Ntinu ya bantinu na Mazulu,
Ntangu nzietolo ya beto ke suka.

Nkumbu ya kitoko, Oh mutindu ya kele mbote!
Kivuvu ya ntoto mpe nsayi ya Mazulu;
Yinga, Nkumbu ya kitoko, Oh mutindu ya kele
mbote!

Kivuvu ya ntoto mpe nsayi ya Mazulu.

²⁹² Na bayintu ya beto kaka ya kulumusa, beto tuba . . . [Mpangi
Branham me banda na kuyimba yinwa ya kukanga *Baka
Nkumbu Ya Yesu Na Nge—Mu.*]



SAMU NA YINKI BETO KELE DENOMINATION VE? KNG58-0927
(Why Are We Not A Denomination?)

Nsangu yayi ya Mpangi William Marrion Branham, kulongamaka na Kingelesi, na nokila ya Kilumbu ya sambanu, na kilumbu ya 27 ya Ngonda ya yivwa, na mvula 1958, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings. yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org